

**In yewal kichiwak
tanawatilme ka
Yehshwa-Kristo**

Hechos de los Apóstoles
en
Meshikan
Nahuat del Este de Durango



LigaBíblica[®]
INTERNACIONAL

In yewal kichiwak tanawatilme ka Yehshwa-Kristo

In tahtol melawak ka in EspirituSanto

1 ¹Tasotili Te'óPilos, pa no'amatTakwihkwilol in ta'ishpa, onihkwikwil in yewal okipewalti pa okichi Yehshwa wan okimashti, ²ma yok ipa in tonatim kimani omowik pa in takpakIlwikak, pa kimani otam okinmil nitahtolmeDyos nitatitanilme ka in EspirituSanto, yehwante yek ta'onanalme. ³Kwah opan Yehshwa nitakokoliste wan omik, omoneshti yolki ka miyak taneshtiliste kampa melak kimatiloaya kampa yoliyaya, pa ⁴0 tonatim moneshtiyaya ka yehwante wan kintakichili kina Dyos reynarowaya.

⁴Kwah katkaloya inak, okintake yehwante pa amo kisoloskya pa Yerushalém, hanwel kichiyaloskya nitateniwiliste in TATS, yewal newal annimishtakichili. ⁵Kina ankimatil Yuhanes takwatekiyaya ka at, han amo wehkawas pa inik tonatim anmehwante anyeske takwatekilme ka EspirituSanto.

Yehshwa takis pa in takpakIlwikak

⁶Kwakin inik nichikotikatkaloya inak yewal kitahtanilik:
—Tats, ashka o'as in tonat pa tikinmakawas in tal Isra'El pa reynaros isel total oksep kina takatkaya ya wehka?

⁷Wan Yehshwa kinnankili:

—Hanwel Dyos kipi chikawaliste pa kitalis in tonat wan shiwit wan anmehwante amo ankipiyal pa ankimatiske;

⁸ma yok kimani walas in EspirituSanto ipa anmehwante, pa

ankonanaske chi-kawaliste. Anyeske notanawatilme pa Yerushalém, pa mochi in tal Yudaya wan pa mochi in tal Samarya, wan pa kishki mochital.

⁹Kwah otam okinmil in, yehwan-te kitatikatkalo ya kwah mo'ahkoktiyaya Yehshwa wan ye tana-mikil ka se ayawit, yewal okitsakwil yahmo okitak. ¹⁰Kwah tachshtikatkaloya pa in takpakIlwikak wan kitatikatkalo ya kina mo'ahkoktiyaya, ome takam takemtikatkaloya ka shashalme

ihistak moneshtik inak yehwante, ¹¹wan kinmilik:

—Masewalme galileyo', pates anmokawal antachshtikat pa in takpakIlwikak? In Yehshwa yewal, omo'ahkok pa in takpakIlwikak, walas oksep yok kina ankitak opanoti.

Kitahtoltil Matyas pa kichiwas nitekipanoliste Yudas

¹²Kwakin inik tatitanilme kisak pa in tepetLom itok Oliwo', wan mokwepak pa Yerushalém, kampa yok hanwel katka pa nihnemiloskya se kilometro, yok kitowaya pa Nitanawatil-Moshé pa in se tonatmosewilyudiyo. ¹³Kimani asik pa Yerushalém kalakik pa in kal, tehkok kaha mochantiloya yehwante katkaloya. Petros wan Yakobo, Yuhanes, André'as, Pilipos, Tomás, BarTolomay, Matayos wan Yakobo nikon Halpayos niyok katkaya Shimón, kitokaltiyaloya yewal kaneyo, katka pa se tanichikol kaneyo, wan Yudas ninohni Yakobo. ¹⁴Moshte yehwante hanse kitahtaniLOYA Dyos, inak siwam, in Marya ninantsi Yehshwa wan niyok katkaloya ompa ninohniwan Yehshwa.



© 1996 David C. Cook

Yehshwa takis pa in takpakIlwikak (1:9)

¹⁵Pa inik tonatim Petros omokets ipanta kaha katkaloya inik taneltokaloya pa Dyos, yehwante katkaloya kina 120 wan Petros kinmili:

¹⁶—Nonohniwan taneltokalme, kipiyya pa tamiskya motachiwaskya in yewal kikwihkwilo in weRey Dawid ya wehka, yewal kito in EspirituSanto ika in Yudas, yewal okinwik melahka pa kikitskiloskya Yehshwa. ¹⁷Yudas ye se ka tehwan, wan tekipanowaya tonawak. ¹⁸[Ka in kishki kitashtawilik ka in ten okichi ten amokwal Yudas omokowil se kwahmil; ompa owets ka itsontek, wan okwepon nipansa wan kopinik mochi nitripa^a].

¹⁹Kwah kimatik moshte yehwante mochantiloya pa Yerushalém, kitokayoltik in kwahmil HakélDama, ka inintahtol aramteko in kinek kili ikwahmil yEste.

²⁰Kampa yok onka takwihkwiloli pa ni'amattakwihkwilol in Salmo' kito:

Ma ye takawal nikal,
wan amo'ik mochanti amo'ak ompa.

Wan niyok onka takwihkwilol:

Ma tikipan okse kaha yewal tekipanowaya.^b

²¹'Moteshmonek in ka inik yehwante mochi tonatim nehnemtinemiloya inak in Tats Yehshwa pa kishki oye ka tehwan, ²²pa kimani Yuhanes okipewalti takwatekiliste wan pa in tonat kimani Tats otakis pa in takpakllwi-kak. Niyok monek, pa taketsas ka tehwan kampa melak Yehshwa oyol oksep.

²³Kwakin kintenewak omente pa kipiyaloskya nitekipanoliste: Yudas, yehwante katkaloya Yosé BarSabás, niyok itokaya Yustus, in okse itoka Matyas. ²⁴Wan kitahtoltiloya Dyos kitoloya:

—TATS, tewal tikinishmat moshte ininyolme, shitishneshtil ashka kati ka in omente takam tewal tikonanas ²⁵pa kichiwaskya nitekipanoliste kina tatitanil yewal Yudas okika, pa yaskya kaha moteshmonekya.

^a 1:18 In takwihkwilol yewal onka ipanta korchetes hanwel onka pa in amatTapahwilme yahyankwik.

^b 1:20 In amattakwihkwilol kinek kitos kampa Yudas in nimoneshtilil okinamak Yehshwa yewal omomikti wan omoka nitekipanoliste.

²⁶Kwakin okichiwak mawiltiliste pa ak itonal yeskya, wan in owets pa Matyas, wan pa in tonat ye tapowal ka in onse tatitanilme.

Dyos okiwaltitan in EspirituSanto

2¹O'as in tonat itok Pentekostés,^c katkaloya yehwan-te moshte pa se kal. ²Pa haniman omokak kina se yehyekat chikawak, walaya pa in takpakllwikak, wan mokakiyaya yehyekat kalitik kaha yowatikatkaloya pa in kal. ³Kwakin nesik ka yehwante sek taptiwalaloya kina sek teshoshtim tipichim, mosesemanak wan mokawak ipa sesen yehwante kishki ompa katkaloya. ⁴Wan moshte oyek tatimiltilme ka in EspirituSanto, wan yehwante okipewak tahtolme ka oksek tahtolme, kina in EspirituSanto kinmaka-ya pa tahtoloskya.

⁵Pa inik tonatim mo-chantilo-ya pa Yerushalém yudiyoy' taneltokaloya miyak pa Dyos walaloya pa mochi in talme pa kaha han. ⁶Kwah kikakiloya in takomonaliste, monichikok myak masewalme wan mo'itatiekatkaloya ka tamaptiliste kampa kinkakiloya taketsaloya kina tahtoloya sesen. ⁷Momaptitiekatkaloya wan mo'itatiekatkaloya, wan mo'ilitiekatkaloya:

—Shikitak. Amo moshte inik masewalme kat galileyo', yehwante taketstikat? ⁸Kina haniman, tikinkakil in tahtol pa sesen yehwante ka totahtol yok kina titahtol? ⁹Nika kat sek mochantilme pa in talme Partya, Medos, wan Elam. Sek kat yudiyoy' yehwante pa MesoPotamya, Yudaya wan niyok Kapadokya, Pontos wan AsíYah, ¹⁰kat niyok in mochantilme pa



© 1996 David C. Cook

Kwakin nesik ka yehwante sek teshoshtim tipichim wan moshte oyek tatimiltilme ka in EspirituSanto wan yehwante okipewak tahtolme ka oksek tahtolme (2:4)

^c2:1 Pentekostes in kinek kitos wemitotiliste ka in tapishkaliste niyok kitokayoltil 50 tonatim.

in talme Perígya, Panpilya, wan pa Egipto, niyok pa in tepe-
tLom Libya ompa pa itenko in tal itok Kirene. Niyok nika kat
inik mochantilme pa in Wepweblo' Roma. ¹¹Sek kat yudiyo',
pa kimani takatik wan oksek yehwante amo takatik yudiyo',
timochiwak masewalme tiktankwaketsalil Dyos kina yudiyo'.
Sek timochantil pa Keréta wan pa in tal Arabya; ma yok tikin-
kaktikat inik galileyo' taketstikat ka totahtolme mochi sesen
kina tehwante, inik tachiwaliste wehwe kat yewal Dyos kinchi.

¹²Moshte yehwante motapololtiloya wan amo kimatiloya
ten kitoloskya, motahtanililoya:

—Ten kinek kitos in?

¹³Wan oksek kinwetskililoya wan kitoloya:

—Yehwante tawantikak.

Petros kintakichili masewalme

¹⁴Kwakin omokets Petros ka in onse tatitanilme, okin-
takichil in masewalme ka wehwe, kinmiliyaya:

—Masewalme yudiyo' wan moshte inik mochantilme pa
Yerushalém, shihmatik in, shihkakik notahtolme in ten an-
nimichilis. ¹⁵Kampa inik amo tawantikak, kina ankitotikat
anmehwante, kampa hyero kwalka ka chiknawi ora watsinko.

¹⁶Amo in yewal ankitatikak, in panotik yewal kito ya wehka
in niTaketsal nitahtolDyos YoEl:

¹⁷Dyos kito, pa in tonatim kimani ya tamtiwalas in
mochital,

nikinmakas moshte masewalme no'Espiritu;
wan inik anmopilwaTakam wan anmopilwaSiwam
anmehwante antaketsaske nitahtolDyos,
wan in masewalme yahyankwik tachishtiyaske kina
tatimiktiyaloskya,
wan niyok in Abwelolme tatimikiske.

¹⁸Melak ipa in tonat nikinmakas no'Espiritu ipa
notekipanolmeTakam wan notekipanolmeSiwam,
wan taketsaske nitahtolmeDyos.

¹⁹Wan newal nikinneshtilis notapololtiliste pa in
takpakllwikak,
wan kinchiwaske taneshtiliste ka chikawaliste pa in
talTatsinta:
yeske yEste wan teshoshte wan nitolnamikil pokte.

20 In tonat yahmo tawis,
 in meste mochiwas chichiltik kina yEste,
 kwah ayamo asis in TATS,
 in se tonat yes we ka tawiliste wan chikawaliste.

21 Wan moshte kishki kinotsaske ka ni'itokaliste in Tats
 yewal mokistilis niyoliliste.

22 'Nimasewalme isra'elita', shihkakik inik tahtolme:
 Yehshwa, in nasareteko, ye se takat yewal Dyos okiwaltitan.
 Wan yok Dyos anmishneshtil anmehwante ka tachiwaliste
 wehwe wan animishneshtil tapololtiliste wan taneshtiliste,
 ka chikawaliste kina anmehwante ankimatil. 23 Yok katka
 pa kimani ye ipewaliste mochiten, Dyos okital pa panoskya
 Yehshwa yolkokoliste wan kitemakak ka in kikokoliloya ka
 in masewalme amo taneltokaloya pa Dyos, yewal ankimiktik
 pa se kruskwawit. 24 Yehshwa moyokolti ka in mikiliste,
 ma yok Dyos okimakawalti; okiyolti kampa in mikiliste
 amokwal pa kitsakwiliskya. 25 Kampa toweRey Dawid, kito
 ipa Yehshwa:

Nikitaya in Tats hanse pa no'ishpa newal;
 yewal onka pa nomahwaKwal, pa nishpalewiskya pa amo
 niyeskya tatsehtselol.

26 Kampa yok noyol kwal tamat,
 wan nokamak kantarowaya ka miyak pakiliste.
 Nokwerpo mochistiyas ka sewiliste;

27 kampa amo tihmakawaltis kampa noyoliliste mokawas
 ta'ilkawal pa in Hades,
 wan amo tihmakawaltis pa palanis nikwerpo
 moTikipanol ta'onanal in niyol chipawak.

28 Tinishmashti pa nikinishmatiskya in otim pa in yoliliste,
 tinishmakawiltis pa nikpiyas miyak pakiliste inak tewal
 pa mo'ishpa.

29 'Nonohniwan, shinishkawak ma nitahto ika tonohni we-
 Rey Dawid yewal yoliyaya ya wehka. Newal animichili ka
 tahtol melawak, Dawid in weRey omik wan kitapachok, wan
 yewal tapachotik kaha koyonkeTeshkal ka tomihmihke ka-
 ha tehwan nika ashka. 30 Ma yok, in weRey Dawid ye se
 niTaketsal nitahtolDyos, wan kimatiya kampa Dyos kitene-
 wiliyaya ka se tahtol melawak pa reynaroskya se nikolinche.
 31 Wan Dawid, kimatiya kampa yoliskya oksep in Kristo

kampa amo yeskya ta'ilkawal pa in Hades^d wan amo palanskya ninakayo. ³²In Yehshwa, Dyos okiyolti oksep wan moshte tehwan tehmtil kampa melawak tikitak. ³³Yok yewal oye ta'ahkokil wan ashka yowatik pa nimahwaKwal Dyos, in TatsDyos okimak in EspirituSanto in yewal kitene-wili melawak; Yehshwa otishtikil ipa tehwan tehmtil, in yewal anmehwan tehmtil wan ankikakil ashka. ³⁴Kampa Dawid in weRey amo takis pa in takpakIlwikak; ma yok yewal kito:

Dyos in TATS kili noTats:

“Shimotal pa nomahwaKwal,

³⁵pa kimani newal nikintalis itsinta mo'ikshiwam pa moshte kishki mishkokolil ipa yehwan tehmtil tinehnemis.”

³⁶Kampa shihmatik moshte masewalme pa Isra'El kampa in Yehshwa, in yewal anmehwan tehmtil ankisalok pa in kruskwa-wit, yewal Dyos okichi pa yes in Tats wan Kristo.

³⁷Kwah kikakik in, moshte hyero tamatik kinkokowaya miyak ininyolme, wan kitahtanilik Petros wan in oksek tatitanilme:
—Tonohniwan taneltokalme, kwakin ten tikchiwaske?

³⁸Petros kinnankili:

—Shihkawak anmota'ihlakoliste wan shihkwepak anmoyol pa Dyos kina kinek, wan shimokwatekik pa sesen anmehwan tehmtil ka ni'itokaliste Yehshwa-Kristo, pa yok Dyos anmishpohpowas anmota'ihlakoliste; wan anmishmakas in EspirituSanto kina temakaliste. ³⁹Kampa ka in tahtol melawak anmishchiwili anmehwan tehmtil wan pa anmopilwam, wan niyok pa moshte yehwan tehmtil mochantil wEhka; in kinek kitos pa moshte kishki yehwan tehmtil in Tats toDyos kinnotsas.

⁴⁰Wan ka in oksek tahtolme, Petros kintahtaniyaya kina monek pa yoliloskya wan kinmiliyaya:

—Shimokistik ka in poliwiliste ka yehwan tehmtil kichiwal in ten hyero amokwal.

⁴¹Yok yewal, aki yehwan tehmtil taneltokak ka in tahtolme oye takwatekilme, pa in tonat miyak taneltokak kina

^d2:31 Hades in kinek kitos ka hebreteko She'ol, kaha kat mihmihke. Inik kaha yeske tahosgarilme moshte yehwan tehmtil kishki mikik, kwakin ompa yeske ta'ishtapolme inik amamtakwihkwilolme, wan pa in se amat-takwihkwilol amo moshte yeske tapahwilme ininitokalme; wan pa in okse amattakwihkwilol yeske moshte tapahwilme in ten kichiwak kwah yoli-loya pa in mochtal.

yey mil masewalme. ⁴²Wan moshte kichiwaloya in yewal ten kimashtiloya inik tatitanilme, moshte mochantiloya kina ininnohniwan, monichikoloya pa kikwaloskya pan pa ki'ilnamikiloskya in TATS wan kitahtaniloya Dyos hanse tonatim.

Kina mochantiloya yehwante taneltokaloya pa Kristo

⁴³Moshte masewalme momaptiloya, ka in myak tachiwaliste wehwe wan in kinneshtilis tapololtiliste wan taneshtiliste ka chikawaliste ika inik tatitanilme yewal kichiwaloya. ⁴⁴Moshte yehwante taneltokaloya katkaloya pa se tanichikoliste wan motemakaloya ten kipiwaloya yehwante; ⁴⁵kinnamakaloya inintalme wan mochten tapiyaloya, wan kinmakaloya tomi kishki kinteshmonektiya pa sesen. ⁴⁶Hanse tonatim monichikoloya pa in tyopWe, wan pa inik kalme kisheloloya pan wan takwaloya moshte ka pakiliste wan amo we tamatiloya pa ininyolme. ⁴⁷Kitoloya tahtolme wehwe pa Dyos, wan kipiwaloya ta'ihniliste moshte masewalme; hanse tonatim in Tats kinmiyaptiyaya yehwante taneltokaloya kaha monechikoloya yehwante mokistililoya ininyoliliste ka ininta'ihnakoliste.

Tapahtil se yewal amo nehnemiyaya pa nitatapoli in tyopWe

3 ¹Petros wan Yuhanes kisaloya pa in tyopWe pa in yey ora' pa tyotak, katkaya in ora kwah kitahtoltiloya Dyos. ²Katkaya ompa se takat amo nehnemiyaya pa kimani otakat. Hanse tonatim kiwikaloya wan kiwalikaloya kaha nitatapoli in tyopWe yewal itokaya KwalNes, pa kintahtaniskya tomi yehwante ompa kalakiloya pa in tyopWe. ³Kwah okinmit yewal Petros wan Yuhanes, kalaktiyaloya pa in tyopWe, kintahtaniyaya pa kimakaloskya tomi. ⁴Petros inak Yuhanes kitatikatkalo, melahka pa nishtololwam in takat wan kilik: —Shitichit.

⁵Kwakin omoka kinmitatik in takam, kichishtikatkaya ta kimakaloskya tomi yehwante. ⁶Wan Petros kito:

—Amo nikpi tomi ka plata wan tomi ka oro, ma yok in ten nikpi nimishmak: Ka ni'itokaliste Yehshwa Kristo in nasareteko, shimokets wan shinehmem.



© 1996 David C. Cook

*Katkaya ompa se takat amo nehne-
miyaya pa kimani otakat pa nitatapoli
in tyopWe yewal itokaya KwalNes (3:8)*

pa in tyopWe nitatapoli itok KwalNes, yewal tahtaniyaya to-
mi, wan hyero motapololtiloya wan momaptiloya ka in ten
panowaya.

Petros kintakichiliyaya inik masewalme kaha mosewiloya pa itatapoli Salomón

¹¹In takat yewal tapahtil katka amo kinkawaya Petros wan
Yuhanes, moshte masewalme, motapololtiloya, motaloloya
ompa kaha ta'itokaya Salomón, kampa yehwante katkaloya.

¹²Kimani Petros okinmit, kinmili:

—Nimasewalme Isra'El, ten yewal anmishtapololti? Pates
antachishtikat kina ta tehwanse tikchiwak ka topodero-
liste in takat pa nehnemiskya? ¹³IninDyos AbRaham wan
Itsak wan Yakob yewal ininDyos towichalme, yewal okimak
tanotsalisteWe akyewal nitekipanol nita'onanal in Yehshwa,
aki anmehwanse amo ankinetik wan ankitemakak i'ishpa
Pilatos, pa kimani Pilatos kitowaya pa yeskya tamakawal.
¹⁴Anmehwanse amo ankinetik in Chipawak wan kwal kimat
kichiwaya, pa yeskya tamakawal anmehwanse antahtanik
pa anmishmakawaltiloskya se tamiktiyan. ¹⁵Anmehwanse
ankimiktik in Kristo yewal temakaya yoliliste. Ma yok Dyos

⁷Kwakin Petros okikits-
ki nimahwakwal in takat
wan okikets, haniman mo-
chikawiltik ni'ikshiwam
wan ninkarapochim.

⁸Wan otsikwin omokets
ka ni'ikshiwam, wan neh-
nemiyaya. Wan okalak
inak yehwanse pa in
tyopWe, nehnemiyaya tsi-
kwiniyaya wan kiliyaya
tahtolme wehwe pa Dyos.

⁹Wan moshte in mase-
walme kitak nehnemiyaya
wan kiliyaya tahtolme
wehwe pa Dyos, ¹⁰wan
ki'ishmatiloya kampa ye-
wal katkaya in motaliyaya

okiyolti okikisti kaha kat in mihmihke, tehwan tehmatil kampa melawak tikitak. ¹⁶Wan ka nitaneltokaliste ka ni'itokaliste Yehshwa, in takat yewal anmehwan te ankitatikat wan anki'ishmatil wan ka nitaneltokaliste. Yehshwa onka tapahtil kina moshte ankitatikat.

¹⁷Wan ashka nonohniwan taneltokalme, newal nihmat kampa anmehwan te amo ankimatiloya ten ankichiwaloya wan niyok yehwan te reynaroloya. ¹⁸Ma yok, Dyos okichi kina yewal okital pa panoskya, yok kina taketsaloya moshte Taketsalme nitahtolmeDyos: in kinek kito kampa niKristo Dyos panoskya takokoliste. ¹⁹Ashka yok, shihkwepak anmoyol pa Dyos, pa yok mota'ihakoliste mokawas ka ta'ihniliste, ²⁰kwakin in TATS, kiwaltitanis ka inik tonatim yewal okital yeshke in tonatim ka tapahtiliste wan yankwiliste wan kiwaltitanis in Kristo yewal okonan, in yewal Yehshwa. ²¹In monek yewal kipiya pa mokawas pa in takpakIlwikak pa kimani in tonat kwah kinyankwikili mochten, yok kina kitoloya ka ininkamak nita'onanalmeDyos ya wehka ka in Taketsalme nitahtolmeDyos. ²²Kampa Moshé kito: "In TATS anmoDyos anmishtitanilis se niTaketsal nitahtolDyos yewal nesis pa anmopweblo yok kina newal yes niTaketsal nitahtolDyos anmehwan te, ankichiwaske mochi kina yewal anmichilis, ²³ta ak ka anmehwan te amo kichi kina kito in niTaketsal nitahtolDyos, yahmo tapowal yes pa nimasewalme Isra'El."

²⁴Kampa moshte niTaketsalme nitahtolmeDyos, pa kimani okipewalti tahtol SamuEl in taketsaloya moshte yehwan te ten panoskya pa inik tonatim. ²⁵Anmehwan te ankipiyal takawaliste niyok, ankat ininpilwam in niTaketsalme nitahtolmeDyos wan in taketsalisteYankwik yewal okichi Dyos ka towichalme, Dyos kili AbRaham: "Mokolinchim yeske tamashtinilme moshte mochantilme pa in mochtal." ²⁶Kimani Dyos okiyolti nikon, anmishtitan pa ta'ishpa, anmehwan te pa anyeloskya tamashtilme wan pa sesen pa anmehwan te yahmo ankichip-tiyaloskya takokoliste.

**Petros wan Yuhanes ininishpa yehwan te
inintanichikolme wehwetatakewalme yudiyo'**

4 ¹Kimani Petros wan Yuhanes tahtotikatkaloya inak in masewalme, walak sek TotatsimWehwe, wan in nikapitan in tyopWe wan sek saduseyo'. ²Hyeró

kwalantikakaloya kampa in tatitanilme taneshtililoya pa in pweblo, taketsaloya kampa Yehshwa yoliyaya oksep pa in mihmihke. ³Kinkitskik yehwante wan kintsakwak kina katka tyotak ompa kinkawak pa mostatik. ⁴Ma yok myak masewalme inik kikakiloya nitahtolmeDyos taneltokaloya; wan tapowalme han katkaloya inik takam, katkaloya kina makwil mil yehwante taneltokaloya pa Kristo.

⁵Pa mostatik monichikok pa Yerushalém inik niwetatake-walme yudiyo', wan inik Abwelolme Wehwetsim wan inik niTamashtinilme NitanawatilMoshé; ⁶niyok ompa ka yehwante katkaloya in toTatsWe Hanás wan Kaypas, Yuhanes, Alesandros wan moshte inik kishki katkaloya nikolinchim ka inik TotatsimWehwe. ⁷Petros wan Yuhanes okinketsak ipanta pa kintahtaniloskya:

—Ika ak nichikawaliste wan nitatakewaliste ankichiwak anmehwante in?

⁸Kwakin Petros, oye tatimilti ka in EspirituSanto, kinmili:

—Niwehwetatakewalme in pweblo wan Abwelolme Wehwetsim pa Isra'el: ⁹kampa ashka antishtahtanilitikat ka in ten kwal tikchiwilik in takat kokoshke, pa momatis kina oye tapahtil, ¹⁰Shihmatik anmehwante, wan mochi in pweblo



Inik Abwelolme Wehwetsim wan inik niTamashtinilme NitanawatilMoshé; niyok ompa ka yehwante katkaloya in toTatsWe Hanás wan Kaypas, Yuhanes, Alesandros wan moshte inik kishki katkaloya nikolinchim ka inik TotatsimWehwe (4:6)

Isra'El, nika onka anmo'ishpa anmehwante yewal oye tapahtil ka ni'itokaliste Yehshwa-Kristo in nasareteko, in anmehwante ki'ilpik pa se Kruskwawit. Ma yok, Dyos okiyolti oksep pa in mihmihke. ¹¹Ina yewal in tet, in yewal amo ankinetik ankitalik anmehwante ankichtipikatkaloya in kal, ma yok in tet omochi nitsontek mochi in kal.^e ¹²Hanwel pa Yehshwa onka takistiliste pa toyoliliste. Amonka okse itokaliste pa in mochital pa kati yewal inik masewalme pa yeloskya takistiliste pa in poliwiliste.

¹³Inik wehwetatakewalme motapololtiloya kampa kinmitaloya kina amo tamakasiloya pa tahtoloskya Petros wan Yuhanes, yehwante katkaloya takam kampa amo motaneshtililoya pa takwihkwiloloskya, ma yok yehwante okimatik kampa oyek inak Yehshwa. ¹⁴Wan niyok moketstikat kaya in takat ka yehwante yewal oye tapahtil, wan amo kipiwaloya ten amokwal pa kitoloskya inak in yewal. ¹⁵Kwakin kintakewak pa kisaloskya yehwante pa in kaha tahosgaroloya in tanichikolme tatakewalme wan taketsaloya yehwante ten kwal pa kichiwaloskya.

¹⁶—Ten tikinchiwiliske inik takam? Moshte pa Yerushalém kimatil kampa kichiwak se taneshtiliste, kampa melak ka in amo nehnemiya wan amokwal pa tikitoske kampa amoyok. ¹⁷Ma yok pa yahmo momashtitiyaloskya inik masewalme isra'elita' ika ten kipano in takat, ma tikinmaptik ka tahtolme chikawak pa yahmo taketstiyaske ka ni'itokaliste Yehshwa pa amo'ak.

¹⁸Kwakin kinnotsak, Petros wan Yuhanes wan kintakewak pa yahmo taketstinemiloskya wan yahmo tamashtinemiloskya ka ni'itokaliste Yehshwa. ¹⁹Wan otanankilik Petros wan Yuhanes kinmilik yehwante:

—Ta kwal katka pa ni'ishpa Dyos pa timishneltokaske anmehwante ma yok amo tihneltokaske ta'ishpa Dyos. ²⁰Kampa tehwan amokwal pa tihkawaske pa titaketsaske in mochiten yewal tikitak wan tihkakik.

²¹Wan yehwante kinmaptiloya ka tahtolme chikawak, wan kinmakawak. Amo okitak kina pa yeloskya takokolilme,

^e 4:11 “In tet kitalaloya yehwante kichtipikatkaloya in kal, ma yok in tet omochi nitsontek mochi in kal”, in takwihkwiloliste onka pa Salmu' 118:22-23.

kampa kwalaniloskya in masewalme kampa moshte kililoya tahtolme wehwe pa Dyos ka in ten panowaya. ²²Pa yewal oye taneshtiliste kwah oye tapahtil mopanol-tiyaya in 40 shiwim.

In taneltokalme kitahtoltiloya Dyos pa kinpalewiskya

²³Kimani oyek tamakawalme Petros wan Yuhanes oyak kampa katkaloya ninihniwan, kintakichilik mochten yehwante kinmililoya inik TotatsimWehwe wan inik Abwelolme Wehwetsim. ²⁴Kwah yehwante okikakik in, wan moshte ka se tahtaniliste wehwe kitahtoltiloya Dyos, wan kitoloya:

—TatsDyos, otikchi in takpakllwikak, wan in mochtal, wan in wehwe'atim wan mochten onka pa in mochtal. ²⁵Tewal, ika in EspirituSanto tikito pa ikamak Dawid, motekipanol:

Pates inik masewalme mo'onanal pa se pweblo' ika
okse pweblo',
wan yehwante masewalme kichiwal ten yewal
amo monots?

²⁶Inik weReye' pa in tal,
wan wehwetatakewalme monichikoloya
pa mochiwililoskya se taketsaliste
pa momiktiloskya ika in TATS wan ika niKristo.

²⁷Wan melak monichikok nika pa Yerushalém in weRey Herodes wan Pontyus Pilatos ka in masewalme amo yu-diyo' wan nimasewalme Isra'El, pa ika moTikipanol ta'onanal Yehshwa, yewal tiktaholti pa yeskya in Kristo. ²⁸Yehwante kichiwaloya yok kina tewal tiktaliyaya pa panoskya; mochi in yewal opan ka mochikawaliste kampa yok otiktal pa yok motachiwaskya. ²⁹Wan ashka, TATS, shikit kina kinmaptitikat yehwante, wan shikinmak motekipanolme pa tamashtiske motahtolme pa amo kipiwaske tamaptiliste, ³⁰ma yok, shihmela momahwa pa mopahtiske kokoshkim wan pa moneshtiske tachiwaliste wan mochiwaske taneshtiliste ka tapololtiliste ka ni'itokaliste moTikipanol mota'onanal Yehshwa.

³¹Kimani tamik kitahtoltik Dyos, kwakin omolin tal ompa kaha nichikotikatkaloya; wan moshte oyek tatimiltilme ka in EspirituSanto, wan taketsaloya nitahtolmeDyos wan amo tamakasiloya.

Inik taneltokalme motemakaloya ininyashka

³²Wan moshte inik taneltokalme, kipiyaloya se han tamati-
liste pa ininyolme. Amo'ak kitowaya kampa katkaya pa iselte
in ten kipiyaloya, kampa in ten kipiyaloya katka pa moshte
yehwante taneltokalme. ³³Wan ka chikawaliste taketsaloya
nitahtolmeDyos in tatitanilme kampa yehwante yoliloskya
oksep ka in Tats Yehshwa, wan nita'ihnliste Dyos ma kin-
mashti miyak ipa moshte yehwante. ³⁴Wan amo'ak katkaya ka
yehwante yewal amoten kipiyya, kampa moshte kishki kin-
piyaloya inintalme wan ininkalme kinnamakaloya, wan in tomi
yewal tanamakaloya kinwikililoya ³⁵wan kinmakaloya inik
tatitanilme, in tomi pa kinmakaloskya kina kinteshmonekya
pa sesen. ³⁶Katkaya se itoka Yosé, yehwante inik tatitanilme ki-
tokayoltiloya BarNabás, in kinek kito, yewal masewal tayolsewi,
katka lewita, otakat pa Kipros; ³⁷yewal kipiyya se kwahmil
okinamak wan okinmak tomi in tatitanilme.

Ininta'htakoliste HananYah wan Sapíra

5 ¹Wan katkaya se takat itoka, HananYah, inak nisiwa
Sapíra, okinamak se kwahmil. ²In takat omokawil tipit
tomi, ka in kwahmil yewal okinamakaya, wan nisiwa kima-
tiya. Wan in okse nitahko okinmak in tatitanilme. ³Kwakin
Petros kili:

—HananYah, pates otiha Satan pa kalakiskya pa moyol pa
tikchiwaskya tekwananaliste ka in EspirituSanto pates otimo-
kawil tipit in tomi yewal mishtashtawilik ka in kwahmil? ⁴In
kwahmil katkaya pa tewal? Pa kimani ayamo tihnamakaya,
kampa pa tewal katka in tomi? Pates yok otikchi in? Amo
otikinkwaman takam, hanwel Dios.

⁵Kimani HananYah, okikak in tahtolme owets mihke. Wan
moshte kishki kimatik hyero momaptik. ⁶Kwakin omoketsak
sek takamYahyankwik, kilyarok nimihke wan okiwikak
okitapachok.

⁷Kina pa yey ora takwitap, okalak nisiwa yewal amo
kimatiya ten panowaya. ⁸Wan Petros kitahtanili:

—Shinichil, kishki ka ankinamakak in kwahmil?

Wan yewal kinankili:

—Haha, yok ka tihnamakak.

⁹Wan Petros kili:

—Pates anmotalik ka in tahtoliste tewal wan motawikal pa ankichiwaloskya tikwamanaliste ka in EspirituSanto? Shikit, mokaktiwalal pa in tatapoli nikshiwam inik yehwante kitapachok motawikal; wan ashka niyok tewal mishwikaske.

¹⁰Wan haniman owets mihke Sapra pa nikshiwam Petros. Wan kimani kalakik in takamYahyankwik okitak mihke, wan okikistik kiwikak kitapachok kaha tapachotikatka nitawikal.

¹¹Wan katkaloya ka se tamaptiliste hyero we, ipa moshte in taneltokalme wan ipa moshte yehwante momashtik ika yewal ten panowaya.

Kichiwal miyak taneshtiliste wan tapololtiliste

¹²Wan ka nimahwam in tatitanilme kinchiwaloya miyak taneshtiliste wan tapololtiliste ka in masewalme; wan moshte kishki taneltokaloya monichikoloya pa in tyopWe ka nitatapoli Salomón. ¹³Ma yok in oksek yehwante amo taneltokaloya amo monichikoloya inak yehwante, ma yok in masewalme kinmawishtililoya. ¹⁴Wan hanse tonatim momiyaptitiyaloya takam wan siwam, ika taneltokaliste ka in Tats. ¹⁵Kwakin kinwalikaloya kokoshkim pa in otim, kinwalikaloya pa tapeshtim wan pa petatim pa yok kwah panoskya Petros, hanwel kintasowaltiskya ka nitasewal inik kokoshkim. ¹⁶Niyok walaloya yehwante mochantiloya pa inik Wepweblo' pa itenko Yerushalém, kinwalikaloya kokoshkim wan yehwante kinpiyaloya yehyekatim kahkatsak; wan moshte katkaloya tapahtilme.

Kintohtokaloya pa kintsakwaloskya in tatitanilme

¹⁷In TotatsWe wan moshte yehwante ompa katkaloya inak yewal, wan in nitamashtiliste saduseyo', amokwal tamatiloya, ¹⁸wan kinkitskik tatitanilme, kintsakwak ompa pa in Wepweblo. ¹⁹Ma yok se nitanawatilanelTats pa in yowal kinishtap tatapolilme in kalitik kaha katkaloya tatsakwalme, wan inik okinkisti kinmili:

²⁰—Shiyak, wan shimoneshtik pa in tyopWe wan shikintakichilik masewalme mochi in taketsaliste ka in yoliliste yankwik.

²¹Yok kwah okikakik in, okalakik in tatitanilme pa in tyopWe kwah tahtaneshtiyaya wan okipewaltik tamashtilisteKwal.

Kwah o'as in, TotatsWe inak ininnihniwan in kipalewiloya wan in tanichikolme tatakewalme yudiyo' wan moshte Abwelolme Wehwetsim pa Isra'El wan otatakewak pa kinwalikaloskya inik tatitanilme ompa kaha tsaktikatkaloya. ²² Kwah in gwacho' ompa asik kaha tsaktikatkaloya, amo okinmitak; kwakin walmokwepak tanawatiloya, ²³ kitoloya:

—Tikitak in tatsakwal kwal tsaktikatka, wan yehwante ompa takwitaptikatkaloya ompa moketstikatkaloya pa in tatapolme; ma yok kwah tikishtapok, amo'ak tikitak pa kalitik.

²⁴ Kwah kikakik in tanawatiliste, ininkapitan in tyopWe wan inik TotatsimWehwe motapololtiloya, amo kimatiloya ten yewal katka in. ²⁵ Kwakin owal se, in yewal okinnawat:

—Shikitak inik masewalme yehwante ankintsakwak ashka kat pa in tyopWe, kinmashtitikat masewalme.

²⁶ Kwakin oy inikapitan gwacho inak ni'algwasilme wan kinwalikak, tatitanilme amo ka momiktiliste, kampa kinmakasiloya masewalme pa yeloskya tamohmotalme ka tetelme.

²⁷ Kimani kinwalikak, kintalik ipanta kaha tahosgaroloya in tanichikolme tatakewalme yudiyo', wan in totatsWe kinmili:

²⁸ —Hanwel amo antimichilik pa amo antamashtitiyaloskya ka ni'itokaliste Yehshwa. Wan shikitak? Moshte pa Yerushalém kimatil in tamashtilisteKwal, wan ankinakil antishteshpawiliske ka nimikiliste in takat.

²⁹ Kwakin kinnankili Petros wan inik tatitanilme kitoloya:

—In monek ta'ishpa kineltokaske Dyos, kwakin shikinneltokak takwitap masewalme. ³⁰ IninDyos towichalme okiyolti oksep Yehshwa, in yewal anmehwante ankimiktik, ankisalok pa se krusKwawit. ³¹ Ka nichikawaliste Dyos okichi kampa Yehshwa motaliskya pa nimahwaKwal, wan okital ka se monotsalisteWe wan takistiliste pa in poliwiliste, kampa in masewalme pa Isra'El ma kichiwak ten kwal pa kineshtiske kampa kikweptikat ininta'ilnamikiliste wan kineshtitikat kampa kikweptikat ininyolme ka Dyos ka inintachiwaliste kwahkwalmelme, wan ka ta'ihniliste ka ininta'ihntakoliste. ³² Wan tehwane tihmatil kampa melawak tikitak, wan niyok kina in EspirituSanto, yewal Dyos okinmak moshte kishki kineltokal.

³³ Wan yehwante kikakiloya hyero kwalaniloya, wan kipewaltiloya kina kwal kinmiktiloskya. ³⁴ Kwakin omokets ompa pa in tanichikol se ka yehwante kineltokaloya

nitamatiliste in parisheyo', yewal itokaya Gamali'El, yewal katka se niTamashtinilme NitanawatilMoshé, wan kimawishtililoya moshte masewalme wan otatake pa kinkistiloskya tipit in tatitanilme pa kiyawak. ³⁵Kwakin otakets ka yehwan-te kinmili:

—Nitakam Isra'El, shitamatik kwal, ten ankinakil ankichi-waske ka inik takam. ³⁶Shihilnamikik in ten opan ka in se itok Tehudas, yewal kitowaya kampa katka se takat monotsayaWe, wan kitokaloya kina 400 takam. Ma yok okimiktik wan yehwante kineltokaloya mosesemanak wan yok amoten omotachi. ³⁷Takwitap, owal se itoka Yudas, in galileyo, pa in tonatim kwah kichiwaloya tapowaliste pa moshte masewalme pa mochi kishki tal wan okichi pa kitokaloskya myak masewalme niyok okimiktik wan moshte inik kineltokaloya mosesemanak yehwante kitokatinemiloya. ³⁸Wan ashka annimichili in: shikinkawak inik takam ka sewiliste. Shikinkawak, kampa ta in yewal kichiptikat kat hanwel pa takam, kwakin amo wehkawas moshitinis; ³⁹ma yok ta in wal pa Dyos, amokwal pa kinshitiniske; kwakin anmehwante anmomiktitiyaske inak Dyos. Wan moshte mokawak ka nitaketsaliste Gamali'El.

⁴⁰Kwakin kinnotsak inik tatitanilme wan kinwitekik, wan okintakewak pa yahmo taketstiyaloskya ni'itokaliste Yehshwa; kwakin kinmakawak. ⁴¹Yok yehwante kisak in tatitanilme ka pakiliste kaha tahosgarol, in tanichikolme tatakewalme yu-diyo' kampa Dyos okinmakawilti pa panoloskya takokoliste ka ni'itokaliste Yehshwa-Kristo. ⁴²Wan hanse tonatim pa in tyop-We wan pa kalme, amo momakawaltiloya pa tamashtiloskya wan kintakichililoya nitamashtilisteKwal Yehshwa-Kristo.

Kinonanal chikome takam tapalewilme

6 ¹Pa inik tonatim, momiyaptitilaloya inik moneshtililme, ma yok inik yehwante tahtoloya gereko' kwalantikatkaloya ka inik tahtoloya hebreteko', kampa in siwam inintakam mihmihki amo katka ak pa kintamakaskya pa hanse tonatim. ²Kwakin in 12 tatitanilme kinnotsak pa monichikoloskya moshte in taneltokalme, kinmilik:

—Amokwal onka kampa tehwan-te tatitanilme pa tihkawaske nitamashtiliste nitahtolmeDyos pa tikintakistiliske

ten kikwaske. ³Yok yewal nonohniwan ika anmehwante shimotemok ka chikome takam inik mo'ishmatil ka inintachiwaliste kwal, yehwante tatimiltilme ka EspirituSanto, wan inintamatiliste kwal pa kichiwaske in tekipanoliste. ⁴Yok tehwante tiyaske tiktahtaniske Dyos wan titekipanoske pa tikinnawatiske moshte nitanawatiliste Dyos.

⁵Kwakin moshte kitak kampa kwal katka in tahtolme, wan okonanak Estepan, se takat ka miyak taneltokaliste pa Dyos wan omotimilti in EspirituSanto, wan Pilipos, Perókoros, Nikanor, Timón, Pármenas wan NikoLa'os, se yewal mochantiyaya pa in Wepweblo Anti'okya yewal omochi ka nitaneltokaliste yudiyo'. ⁶Yehwante kinwalikak ininta'ishpa ka inik tatitanilme, kitahtoltiloya Dyos pa yehwante wan kintalilik ininmahwam.

⁷Wan nitahtolme Dyos momiyaptiyaya, wan miyak taneltokaloya pa Yerushalém, wan niyok miyak Totatsim-Wehwe yudiyo' taneltokaloya pa Kristo.

Kikitskil Estepan

⁸Wan Estepan katka tatimilti in ta'ihniliste wan in chikawaliste Dyos, kichiwaya wehwe taneshtiliste wan tapololtiliste wan kichiwaya pa moneshtiloskya ininishpa masewalme. ⁹Kwakin sek yehwante pa in tyopYudiyo katkaloya itokalme tamakawalme, wan katkaloya oksek yudiyo' yewal inintal itok Kirene, wan oksek pa in Wepweblo Alesandría, wan oksek pa in tal itoka Kilikya wan pa in tal itoka AsíYah, wan moshte yehwante waltahtoloya ka kwalaniliste inak Estepan; ¹⁰ma yok amokwal kina kitanililoskya ka nitamatiliste, yewal kimakaya in EspirituSanto yewal tahtowaya Estepan. ¹¹Kwakin kintashtawilik sek takam, pa tikwamanalokskya pa kitoloskya otihkakik yewal taketstikatmaya ika Moshé wan ika Dyos. ¹²Yok kinkwalantitikatkaloya in masewalme wan in Abwelolme Wehwetsim wan Tamashtinilme NitanawatilMoshé; wan kikitskik Estepan, wan kiwikak kaha tahosgaroloya in tanichikolme tatakewalme yudiyo'. ¹³Kintalik sek pa tikwamanalokskya kampa kitoloskya kampa kimatiloya kampa melawak kitoloya, ika Estepan kitoloya:

—In takat amo kimakawalti hyero takets ika in tasotili tyopWe wan ika NitanawatilMoshé. ¹⁴Kampa tihkakik yewal

kitowaya kampa in Yehshwa in nasareteko kishitinis in tyopWe tasot wan kichiwas oksek taneltokaliste yewal otishkawil Moshé.

¹⁵Wan moshte yehwante ompa yowatikatkaloaya, kaha tahosgarol in tanichikolme tatakewalme yudiyo' okitak nishayak Estepan, kina se nishayak nitanawatilanelDyos.

**Mopalewiyaya Estepan ininishpa yehwante
tahosgarol in tanichikolme tatakewalme yudiyo'**

7¹Kwakin in totatsWe kili Estepan:

—Melak in yewal kitol?

²Wan Estepan kito:

—Nonohniwan taneltokalme wan totahwan, shinishkakik.

In totawiliste Dyos omoneshti ka totats AbRaham katkaya pa in tal itok MesoPotamy, kwah ayamo'ok mochantiyaya pa in tal itok Harán, ³Dyos kili: “Shihka motal wan inik moparyente, wan shi pa in tal yewal newal nimishneshtilis.” ⁴Kwakin okis pa inintal in kaldeyo', oy omochanti pa Harán. Kwah omik nitats, Dyos okwalik AbRaham pa mochantis nika pa in tal, kaha anmehwante anmochantitikat ashka. ⁵Dyos amo okimak in tal pa yeskya niyashka ni han tipit kaha kitaliskya nitankwa; ma yok kitenewili pa kimakaskya mochi in tal pa mokawiliskya pa yeskya ininyashka yewal wan nikolinchim; kampa AbRaham ayamo'ok kipiyyaya nikon. ⁶Kwakin in Tats-Dyos kili AbRaham: kampa mokolinchim yaske mochantiske pa se tal yewal amo inintal, pa in tal kintekipanoltiske amo kintashtawiliske wan hyero kinkokoltiske, pa 400 shiwim.

⁷Ma yok Dyos kili: “Newal niyok nikinchiwilis takokoliste inik masewalme pa in tal yehwante kintekipanoltitikat kat kina tatsakwalme,^f kimani panos in mokolinchim kisaske ompa wan nishtekipanoliske newal nika.” ⁸Kwakin okichi Dyos take-tsalisteYankwik, ka taneshtiliste in takotonili nikwerit kaha mashishal. Kwakin AbRaham okitakatilti Itsak, yewal kikotonili nikwerit kaha mashishal kwah kipiyyaya chikweyi tonatim takatil, ni'itokaliste nikon katka Itsak, wan Itsak yok okichi ka Yakob wan Yakob yok okichi ka inik 12 ininpilwam.

^f7:7 Takam takowalme wan tanamakalme in kinek kitos, katkaloaya kina tatsakwalme, mochi'as tekipanoloaya pa hanse tonatim ka ininwehwetatakewalme.

⁹Wan Yosé katka in se tanichikol Isra'El nikon Yakob, kina ninnohniwam kikwalanililoya kinamakak kina se tekipanol amo kipi tashtawiliste pa in tal Egipto. Ma yok Dyos katka inak Yosé, ¹⁰wan okikisti pa mochi nitakokoltiliste yewal panowaya, wan Dyos okimak tamatiliste pa i'ishpa para'ó, in weRey pa Egipto wan okichi pa yeskya nireynaroliste wetatakewan pa in tal Egipto wan pa moshte yehwante katka-loya pa nikal para'ó.

¹¹Kwakin owal se mayanaliste pa mochi in tal Egipto wan pa tal Kanán, katka miyak mayanaliste wan towichalme amo kipiyaloya takwaliste. ¹²Kwakin otakak Yakob kampa katkaya trigo pa Egipto, kwakin okintitan ininpilwam yehwante yek towichalme. Ina yewal katka in se ta'ishpa kampa yaloya pa Egipto. ¹³Kimani oksep Yakob okintitan pa Egipto, wan Yosé omoneshti ka ninohniwan kampa yewal katka ininnohni wan yok okimat para'ó kaha walaloya nikolinchim Yosé. ¹⁴Kwakin Yosé okintitan ninohniwan pa kwalikaloskya Yakob wan moshte yehwante ompa mochantiloya pa nikal, katkaloya 75 masewalme. ¹⁵Yok otem Yakob pa in tal Egipto, kaha omik, wan niyok towichalme. ¹⁶Wan okinwikak ininmihmihke pa Sikem, wan ompa okintalik kahakoyonkeTeshkal yewal kinkowili AbRaham ka tomiPlata ininpilwam Hamor pa Sikem.

¹⁷Astiwalaya in tonatim pa monamikiskya ka in tahtol melawak ten kitiniwiliya Dyos AbRaham, wan momiyaptitilaloya myak masewalme isra'elita' pa Egipto. ¹⁸Kwakin o'as okse weRey pa in tal Egipto in weRey amo kimatiya amoten pa Yosé. ¹⁹In weRey kinkwamanaya tomasewalme, wan kinkokolliyaya towichalme wan okinchiwalti pa kinkawaloskya iselte ininpilwam, yehwante takatiloya pa yok mikiloskya. ²⁰Pa inik tonatim otakat Moshé. Wan Dyos kwal okit okitasot, wan pa yey meste oye inak nitahwan. ²¹Kimani okikawak piltonte, nikonSiwat para'ó okipehpen wan oki'apa kina nikon. ²²Wan kitenamiki Moshé inintamatiliste egiptiyo', wan kipiyyaya chikawaliste ka nitahtolme niyok ika ten kichiwaya.

²³Kimani oki'asilti 40 shiwim, oki'as tamatiliste pa niyol pa yaskya kinpashaloskya ninohniwan, isra'elita'. ²⁴Wan okit se egiptiyo kitehteptikatka se takat yudiyo. Moshé oy okipale wan okikwepil ka miktiliste in egiptiyo. ²⁵Moshé tama-tiya kampa ninohniwan isra'elita' kimatiloskya kikakiloskya

kampa Dyos kinkistiskya pa Egipto ika yewal; ma yok yehwante amo kimatik kikakik. ²⁶Pa mostatik, okinmit Moshé omente isra'elita' momiktitikatkaloya, wan kichiwaya pa mokawaloskya ka sewiliste, kinmiliyaya: “Takam anmehwan-te ankat anmonohniwan; pates anmomiktitikat se ka okse?” ²⁷Ma yok yewal momiktitikatka ka ninihni in walmomalin okitope Moshé, wan kili: “Wan ak mishnots tewal pa tiyes se wetatakewan wan se hwes ipa tehwan-te? ²⁸Hanwel yok tihnek tinishmiktis newal, kina yalwa otihmikti in takat egiptiyo?” ²⁹Kwakin Moshé okikak in tahtol, ochol wan oy omochanti pa in tal itok Midyán. Se tal yewal amo nital, ompa omonamikti okinpi ome ininpilwam.

³⁰Wan kipiyyaya ompa 40 shiwim, omoneshti se nitanawatilanelDyos ka yewal pa in se tal kaha tawak, amo wehka katka in tepetLom itok Sinay, pa se kwawitWiste tatatitikatka. ³¹Wan Moshé motapololtiyaya kampa



© 1996 David C. Cook

*Moshé okit kampa in kwawitWiste
amo mochichinowaya (7:30)*

tachiyaya kina tatimiktiyaskya, omo'asilti pa kitaskya kwal, okikak nitahtol in TATS yewal kitowaya: ³²“Newal ininDyos mowichalme, niDyos AbRaham, wan niDyos Itsak wan niDyos Yakob.” Moshé moyoyokatikat kaya, wan amo mochikawaya pa kitaskya. ³³Kwakin in Tats kili: “Shikinkisti mowarachim pa mokshiwam, kampa timoketstik pa in tal kaha tatatsot. ³⁴Melawak onikit kina moyokoltitikat nomasewalme isra'elita' pa Egipto, wan onikinkak kina tsatsitikat ka takokoliste. Wan nitemos pa nikinkistis ompa wan ashka shiwal, newal nimish-titanis pa timokwepas pa Egipto.”

³⁵In Moshé, in yewal isra'elita' amo okinekik wan kili-loya: “Wan ak mishnots tewal pa tiyes se towetatakewan wan se hwes?”, ma yok Dyos okititan pa yeskya se wetatake-wan wan pa kinmakawaskya in isra'elita', ka nichikawaliste in tanawatilanhel pa ilwikak yewal omoneshti pa in kwawit-Wiste tatatitikatkaya. ³⁶In Moshé okinkisti in isra'elita' pa in tal Egipto, kichiyaya kampa motapololtiloya wan nesiloya taneshtiliste ka chikawaliste pa Egipto pa in weh-we'atim chichiltik, wan pa in tal kaha tawak pa kwarenta shiwim. ³⁷Yewal in se Moshé kinmili yehwante isra'elita': “Dyos tishwaltitanili pa takatis se niTaketsal nitahtolDyos ika tehwan, pa tonohniwan taneltokalme yewal yes kina newal.” ³⁸In Moshé katkaya ka towichalme pa in tal kaha tawak, wan okintakichil mochi tanawatilisteKwal yewal nitanawatilanhelDyos kiliyaya pa in tepetLom itok Sinay, wan akyewal kinonan tahtolme timakal yoliliste pa tishnawatiskya.

³⁹Ma yok towichalme amo okineltokak Moshé, amo okinekik kikakik hanwel kinekiloya mokwepaloskya pa Egipto. ⁴⁰Kwakin kilik Arón: “Shitishchiwil dyose' pa yap-tiyaske to'ishpa; kampa amo tihmatil ten okipan Moshé yewal otishkisti pa Egipto.” ⁴¹Kwakin pa inik tonatim kichiwak se mono nesiya kina se beserro, wan kiwalikilik tamiktiliste ka tachichinoliste in mono, wan kipiyaloya pakiliste kampa kichiwak in beserro ka ininmahwam. ⁴²Kwakin Dyos opanoti ka yehwante, wan okinka pa kintankwaketsaliloskya in sitalme pa in ilwikak, kampa yok onka pa in amat yehwante nitakwihkwilolme niTaketsalme nitahtolmeDyos:

Pates anmehwante nimasewalme Isra'El, amo
 annishwalikilik temakaliste wan amo nishtenewilik
 tamiktiliste ka tachichinoliste
 pa 40 shiwim pa in tal kaha tawak?

⁴³Ma yok ankimamtiyaloya in kalWe tachiwali ka tilma
 itskat pa kililoskya tahtolme wehwe Molok,
 wan in nitakopinal sital in dyos itok Rempan.
 Inik katkaloya mono' yehwante ankinchiwak pa
 ankintankwaketsaliloskya.

Kampa yok newal annimishtitanis wEhka achompa
 pa Babilonya.

⁴⁴In kalWe tachiwali ka tilma itskat, kaha kinahkokiloya
 in tabla nitakwihkwiloliste Dyos katkaya inak towichalme pa
 in tal kaha tawak, kaha Dyos kili Moshé, pa yok kichiwaskya
 kina okineshtil. ⁴⁵Towichalme okonanak in kalWe tachiwali
 ka tilma itskat katka tatasot, in oye temakal pa inik tonatim
 ka YehoShu'a wan ompa oye inak yehwante pa inik tonatim
 kimani omokawilik inik talme ka in oksek pweblo, yewal
 Dyos okinkistil yehwante ompa mochantiloya. Yok oye pa inik
 han tonatim pa weRey Dawid. ⁴⁶In weRey Dawid kipiyya
 pakiliste ka ta'ihniliste pa Dyos, wan okitahtan pa kimaka-
 waltiskya pa kichiwaskya se tyopWe pa niDyos Yakob; ⁴⁷ma
 yok katka Salomón nikon Dawid yewal okikalchiwil Dyos ni-
 TyopWe. ⁴⁸Ma yok in Dyos HyeroTakupak amo mochanti pa in
 tyopalme yehwante kinchiwak masewalme. Kina kito niTake-
 tsal nitahtolDyos:

⁴⁹In takpakIlwikak han kan kaha nimotalis,
 wan in tal han kan kaha nikintalis no'ikshiwalmé.
 Ten kal annishchiwiliske pa newal? kito in TATS,
 hanwel nishteshmonek se kal kaha nimosewis?

⁵⁰Hanwel amo nomahwam okichiwak inik mochten?

⁵¹Anmehwante ankipiyal anmoyolme chikawak, anmomatil
 kina yehwante amo ki'ishmatil Dyos. Amo ankimatil takakil
 wan anmehwante hanse ankat ika in EspirituSanto. Yok ki-
 na momatiloya anmowichalme. ⁵²Pa kati inik niTaketsalme
 nitahtolmeDyos amo ankintohtokaloya inintowichalme?
 Yehwante kinmiktik inik taketsaloya kampa walaskya in
 takat yewal amo kipi ta'ihntakoliste hanwel Chipawak, wan
 yewal in takat anmehwante ankitemakak, wan okimiktik.

⁵³Anmehwante ankipiyaloya nitahtolmeDyos ipa nitanawatil-anhelme, wan amo kinekik kikakik.

Kimiktil Estepan

⁵⁴Kwah okikakik in mochten, hyero mokwalantiloya wan kahkakitiloya inintankochowam ika yewal. ⁵⁵Ma yok pa niyol Estepan, omokawil miyak in EspirituSanto, yewal tachiyaya pa in takpakIlwikak, okit nitawilisteKwal Dyos, wan ompa moketstikatka Yehshwa pa nimahwaKwal Dyos.

⁵⁶Kwakin Estepan, kito:

—Shikitak! Nikitatik tapotik in takpakIlwikak wan in NitakaTakpakIlwikak moketstik pa nimahwaKwal Dyos.

⁵⁷Kwakin tsatsiloya hyero chikawak wan kintsatsakwak innnakaswam wan moshte monichikok kaha yewal. ⁵⁸Wan kikistiloya pa kiyawak pa Yerushalém; kimohmotaloya wan inik kitoloya kampa kimatiloya kampa melawak kitaloya Estepan yewal ininshashalme kikawililoya in se takatYankwik itok Sha'ul pa kinkwitawiliskya, ⁵⁹kimani kimohmotaloya, Estepan yewal kinotsaya ka ni'itokaliste Dyos wan kitowaya:

—Tats Yehshwa, shikonan no'ihyo.



© 1996 David C. Cook

Kimani kimohmotaloya, Estepan omotankwakets otsats chikawak kito: TATS, amo shikinteshpawil ika yehwante ininta'htakaliste. Kwah otam okit in, walmik (7:57)

⁶⁰Kwah omotankwakets otsats chikawak kito:
—TATS, amo shikinteshpawil ika yehwante ininta'htakoliste.
Kwah otam okit in, walmik.

Sha'ul kintohtokaya inik taneltokalme

8 ¹Wan Sha'ul kinekiya pa kimiktiloskya Estepan.
Wan pa in se tonat kintohtokaloya pa kinkitskiloskya yehwante taneltokaloya pa Yehshwa-Kristo pa Yerushalém. Moshte, pa in tyopalme ocholok, mosemanak kaha han pa in tal Yudaya wan pa in tal Samarya. Hanwel in tatitanilme mokawak pa Yerushalém. ²Sek takam taneltokalme pa Dyos okitapachok Estepan wan okichokilik hyero miyak. ³Wan Sha'ul kinkokolliyaya inik tanichikolme taneltokaloya pa Kristo, kalakiyaya pa inik kalme wan kinkitskiyaya takam wan siwam wan kintemakaya pa kintsakwaloskya.

Kintakichiliyaya nitamashtilisteKwal Yehshwa-Kristo pa Samarya

⁴Ma yok inik yehwante oyek tasesemanalme tamashtiloya nitamashtilisteKwal Yehshwa-Kristo pa kaha han yaloya. ⁵Wan Pilipos, otem pa in Wepweblo Samarya, ompa kintakichiliyaya nitamashtilisteKwal ka Yehshwa-Kristo. ⁶Wan myak masewalme monichikoloya wan moshte takaktikatkaloya amo nawatiloya in ten kinmiliyaya Pilipos, wan kitaloya inik tachiwaliste ka taneshtiliste yewal kichiwaya ka nichikawaliste Dyos. ⁷Myak masewalme yehwante kipiyaloya yehyekatim kahkatsawak mokawaloya tapahtilme, in yehyekatim kahkatsawak tsatsiloya kongana; kwah kisaloya wan miyak yehwante amokwal moliniloya wan yehwante amokwal nehnemiloya mokawaloya tapahtilme. ⁸In masewalme pa in Wepweblo kipiyaloya miyak pakiliste.

⁹Wan ompa katkaya se takat itoka Shimón yewal kichiwaya tashoshaliste wan kintapololliyaya in masewalme pa Samarya, kampa yewal katka se takat hyero we tamatiya. ¹⁰Moshte masewalme tihtipichim wan wehwe kikakiloya, wan kitoloya:

—In takat kipi in ten kitokayoltil niwe poderoliste Dyos.

¹¹Moshte kineltokaloya pa miyak shiwim kampa motapololtiloya ka mochi in ten kichiwaya ka in tashoshaliste. ¹²Pa kimani kineltokaloya Pilipos kintakichiliyaya in

nitamashtilisteKwal Dyos pa kimatiloskya nireynaroliste Dyos wan in ni'tokaliste Yehshwa-Kristo, wan mokwateki-loya takam wan siwam. ¹³Wan Shimón niyok otaneltok wan oye takwatekil, kwakin kitokatinemis hanse Pilipos, wan kinmitaya taneshtiliste wan tachiwaliste ka taneshtiliste wehwe yewal Pilipos kichiwaya.

¹⁴Kimani kimatik inik tatitanilme pa Yerushalém kampa yehwante pa in tal Samarya taneltokaloya pa nitahtolmeDyos, okintetanilik Petros wan Yuhanes. ¹⁵Inik yehwante temoloya pa Samarya okitahtoltik Dyos pa inik yehwante taneltokaloya pa kitenamikiloskya in EspirituSanto. ¹⁶Kampa ayamo'ok kipiyaloya pa amo'ak ka yehwante in EspirituSanto, hanwel katkaloya takwatekilme ka ni'tokaliste Yehshwa-Kristo. ¹⁷Kwakin Petros wan Yuhanes kintalilik ininmahwam wan yehwante, kitenamikik in EspirituSanto.

¹⁸Kwah okit Shimón kampa ka yewal kintalililoya ininmahwam, inik tatitanilme temakaloya in EspirituSanto wan okinteniwil tomi yehwante, ¹⁹wan kintahtani:

—Shinishmakak newal niyok in poderoliste, kampa pa moshte aki han newal niktalilis nomahwam kitenamikis in EspirituSanto.

²⁰Kwakin Petros kili:

—Shi shimik ka motomi, pates yok titamatitik pa timokowilis ka tomi in ten Dyos temak. ²¹Tewal amo tikpi amoten ka in tekipanoliste, kampa pa moyol amo tikpi melawaliste ni'ishpa in Dyos. ²²Ashka shihkwepak anmota'ilnamikiliste wan shihneshtik kampa kikweptikat anmoyolme ka Dyos ka anmotachiwaliste kwahkwalmé pa mochi in ten amokwal tikchi wan shiktahtan in TATS kampa ta kwal yeskya pa mishihniliskya tewal ka in ten titamat pa moyol. ²³Kampa nimichit tewal ka kwalaniliste pa moyol wan mishpi ta'ilpil ta'ihetakoliste.

²⁴Kwakin Shimón kito:

—Shiktahtanik pa newal in Tats, pa amoten nishpanos, in ten yewal anmehwante ankitol.

²⁵Yehwante kintakichilik ipa in ten kimatiloaya melawak kampa kitaloya ka Yehshwa-Kristo wan kintakichililoya nitahtolmeDyos, kwakin walmokwepaloya pa Yerushalém. Pa in ot panoloya pa myak ranchito' pa in tal Samarya taketsaloya nitamashtilisteKwal Dyos.

Pilipos wan se wetatakewan pa in tal Etyopya

²⁶Wan se nitanawatilanel in Tats pa in takpakllwikak kili Pilipos:

—Shimokets wan shi kaha tatsintaSur, shikonan in ot yewal kis ompa pa Yerushalém wan temo pa Gasa.

In ot yewal pano kaha tawak. ²⁷Kwakin omokets Pilipos opanoti; wan okit se takat yewal mochantiyaya pa Etyopya. In takat katka se ewnuko^g katka tanotsal we nitekipanol weRey siwat itoka Kandake yewal reynarowaya pa in tal Etyopya, in kikwitawiliyaya mochi nitomi yewal. In takat ewnuko walaya pa Yerushalém pa kitankwaketsaliliskya Dyos. ²⁸Ashka mokweptiyaya pa Etyopya wan yowatiyaya pa niyawaltik tatilanal ka kabayo', wan momashtitiyaya ka in amatTakwihkwilol yewal kikwihkwilo niTaketsal nitahtolDyos YeshaYah. ²⁹Kwakin in EspirituSanto kili Pilipos:

—Shimo'asilti pa in yawaltik tatilanal ka kabayo'.

³⁰Wan yok motalo Pilipos wan okikak in takat in ten momashtitiyaya pa ni'amattakwihkwilol YeshaYah niTaketsal nitahtolDyos. Wan Pilipos kitahtanili:

—Hanwel tihmat ten kinek kito in yewal timomashtitik?

³¹Wan in takat ewnuko kito:

—Kina nihmati ta amonka amo'ak pa nishnawatis?

Kwakin kitahtani Pilipos pa takisaskya pa in yawaltik tatilanal ka kabayo' pa motaliskya inak.

³²In takwihkwiloli ika ni'ama in TatsDyos yewal momashtitikatka katka in:

Kina se borrego yewal kiwikaloya pa kimiktiloskya,
wan kina se borregit yewal amo chok kwah kishimal,
yoke katka in takat,
amo kitap nikamak pa kitoskya ten.

³³Oye tapinawiltil wan amo'ak otahto pa kipalewiskya;
ma yok ak kinpowas ininkolinchim?

Kampa niyoliliste okikistilik pa in tal.^h

^g8:27 Ewnuko, in kinek kitos se takat takaparil.

^h8:33 YeshaYah 53:7-8.



In takat ewnuko kitahtanili Pilipos kili: Nimishtahtani tewal, ak in se yewal tahtotik niTaketsal nitahtolDyos, yewal isel, hanwel okse? (8:34)

³⁴In takat ewnuko kitahtanili Pilipos kili:

—Nimishtahtani tewal, ak in se yewal tahtotik niTaketsal nitahtolDyos, yewal isel, hanwel okse?

³⁵Kwakin Pilipos okipewalti taketsaliste ka in takwihkwilol ni'amaDyos wan kitakichiliyaya nitamashtilisteKwal ka in Yehshwa. ³⁶Kina yaloya pa in ot, asik kaha katka at, wan in takat ewnuko kito:

—Shikit tewal. Nika onka at; Ten nishtakwili pa niyes takwatekil newal?

³⁷Wan Pilipos kili:

—Ta tamelak titaneltok pa moyol, kwal timokwatekis.

Kwakin in takat ewnuko kinankili:

—Nitaneltok kampa in Yehshwa-Kristo yewal nikonDyos.

³⁸Wan otatake pa kiketsaloskya in yawaltik tatilanal ka kabayo'; wan temok in omente pa in at, Pilipos wan in takat ewnuko wan Pilipos okikwatek. ³⁹Kimani kisak pa in at, wan ni'Espiritu in Tats okipololti Pilipos, wan in takat ewnuko yahmo okit; ma yok yawiya pa ni'ot ka miyak pakiliste. ⁴⁰Ma yok Pilipos omo'it pa in Wepweblo itok Ashdod, wan ompa kintakichiliyaya tamashtilisteKwal, pa Dyos pa mochi inik Wehwepweblo' yewal panowaya yok o'as pa Kaysareya.

Sha'ul otaneltok pa Yehshwa

(TaMeTaⁱ 22:6-16; 26:12-18)

9¹Wan Sha'ul kinmiliyaya kampa melak kinmiktiskya ak yehwante taneltokaloya pa in Tats. Kampa in oy okit in totatsWe, ²okitahtan pa kimakaskya amatTakwihkwilolme, pa kinwikiliskya yehwante kipiyaloya poderoliste pa in nityopalmeYudiyo' yehwante katkaloya pa in Wepweblo Damaskos ta Sha'ul kinamikiskya se yewal kitok ni'ot Yehshwa, hanwel ta yeskya takat wan siwat kiwikaskya pa kitsakwaloskya Yerushalém. ³Kimani katkaya amo wEhka pa asiskya Damaskos, pa haniman se tawilisteWe ka tapitaniliste pa in ilwikak okiyawal. ⁴Wan owets pa tal Sha'ul, okikak se tahtol kiliyaya:

—Sha'ul, Sha'ul, Pates tinishtohtokatik?

⁵Wan Sha'ul kitahtanili:

—Ak tewal, Tats?

Wan in tahtol kinankili:

—Newal niYehshwa, in ak tewal tiktohtokatik.

⁶Shimokets wan shikalak pa in Wepweblo, ompa michiliske ten monek pa tikchiwas.

⁷Wan inik takam yehwante yaloya inak Sha'ul ompa katkaloya, amokwal kina tahtoloskya kikakiloya in tahtol ma yok amo'ak kitaloya. ⁸Kwakin omokets Sha'ul kaha katkaya pa in tal, kimani nishtololwam kinishtapowaya amoten kita-ya. Kwakin in takam kikitskik pa nimahwam wan okiwikak pa Damaskos. ⁹Wan oye pa yey tonatim amo tachiyaya, amo takwaya wan amo takoniya.

¹⁰Katkaya pa Damaskos se moneshtili itoka HananYah, in yewal Tats Yehshwa okinots, kampa tachiyaya kina tatimiktiyaskya:

—HananYah!


Wan yewal kinankili:

—Nika ni'onka, Tats.

¹¹Wan in Tats Yehshwa kili:

—Shimokets shi pa in ot itok Melahka, shiktem nikal se takat itok Yudas, ompa shitahtan in takat itok Sha'ul yewal pa

ⁱ9:1 TaMeTa in kinek kito: Tapewaliste Melawak Tanawatilme/Hechos.



In yudiyo' motalik taketsak kina kwal kimiktiloskya Sha'ul; ma yok okimat Sha'ul in ten kinekilo ya kichiwililoskya; ma yok nimoneshartilme okikwikak pa tayo wan okitemowik pa se kakashte ka se mekat pa in tatsakwal pa Yerushalém (9:25)

in Wepweblo Tarso. Yewal kitahtoltitik Dyos, ¹²okipi tachiya-
liste kina tatimiktiyaskya yewal okit se takat yewal itokaya
HananYah, yewal kalaki wan kitalili nimahwam ipa yewal pa
tachiyaskya oksep.

¹³Kwakin HananYah, kinankili:

—Tats, kampa nitakak miyak taketsaliste amokwal ika in
takat kampa hyero kichiptionem ika momasewalme taneltokal-
me pa Yerushalém. ¹⁴Wan nika kipi chikawaliste ka inik
TotatsimWehwe pa kintsakwaskya moshte yehwante mishno-
tsal ka mo'itokaliste.

¹⁵Ma yok in Tats kili:

—Shi, kampa newal onikonan in Sha'ul pa nishtekipanolis
pa kintakichilis nahnewal ka no'itokaliste pa moshte
yehwante amo yudiyo' ka in ininweReye', pa inintal wan
ininmasewalme Isra'El. ¹⁶Kampa newal nikneshtilis Sha'ul
kishki miyak panos takokoliste ka no'itokaliste.

¹⁷Kwakin oy HananYah, wan okalak pa in kal kaha katkaya Sha'ul. Wan kitalili nimahwam ipa yewal kili:

—Nonohni Sha'ul, onishtake in TATS, yewal omoneshti ka tewal pa ot kaha tiwalaya, onishtake pa nikchiwas pa itachiwas oksep wan pa timotimilti in EspirituSanto.

¹⁸Haniman pa nishtololwam Sha'ul walwetsiyaya kina mich nitomitonte, haniman oksep waltachi. Wan omokets wan oye takwatekil. ¹⁹Kwakin otakwa wan yok okonan chikawaliste, omoka sek tonatim ompa ka in taneltokalme pa Kristo yehwante katkaloya pa Damaskos.

Sha'ul kintakichili masewalme pa Damaskos nitamashtilisteKwal Kristo

²⁰Wan haniman okintakichil nitamashtilisteKwal pa inintyopalmeYudiyo', kinmiliyaya kampa Yehshwa katka nikonDyos. ²¹Moshte yehwante kishki kikakiloya motapololtiloya, wan kitoloya:

—Amo in takat yewal kintakokoltiyaya pa Yerushalém yehwante ka inintanotsaliste ka ni'itokaliste Yehshwa? Hanwel amoyok walaya pa kinwikaya ta'ilpilme pa kintemakaskya ka in TotatsimWehwe?

²²Ma yok Sha'ul taketsaya ka miyak chikawaliste, wan amo kimatiloya kikakiloya inik yudiyo' yehwante mochantiloya pa Damaskos, kinneshtiliyaya kampa Yehshwa katka in Kristo.

Sha'ul cholo pa amo kimiktiloskya in yudiyo'

²³Wan kimani panok myak tonatim, in yudiyo' motalik takesak kina kwal kimiktiloskya Sha'ul; ²⁴ma yok okimat Sha'ul in ten kinekiloya kichiwililoskya yehwante, pa tahka wan pa tayo kikwitawiloya in tatapoli pa in Wepweblo pa yok kimiktiloskya; ²⁵ma yok inik nimoneshtililme okiwikak pa tayo wan okitemowik pa se kakashte ka se mekat pa in tatsakwal pa Yerushalém.

Sha'ul pa Yerushalém

²⁶Kimani o'as Sha'ul pa Yerushalém, wan kinekiya moneiloskya ka in moneshtililme; wan moshte kimakasiloya yewal, amo kineltokaloya kampa melak katka se nimoneshtilil Kristo. ²⁷Ma yok, BarNabás okichi pa okiwik wan okintenewil inik tatitanilme. Wan okintakichil yehwante kina Sha'ul, kitaya pa

in ot in TATS kina yewal okitakichil. Niyok kinmili kina pa Damaskos amo momaptiyaya kina kintakichiliyaya nitamashtilisteKwal ka ni'itokaliste Yehshwa. ²⁸Yok omoka Sha'ul ka yehwante, wan nihnentimen kaha han pa Yerushalém wan taketsaya ni'itokaliste in TATS amo tamakasiyaya. ²⁹Wan amo momaptiyaya kwah taketsaya wan kinahwaya ka inik yudiyo' ka tahtol gereko; wan yehwante kinekiloya kimiktuloskya Sha'ul. ³⁰Kimani okimatik ininnohniwan taneltokalme, wan kiwikak Sha'ul pa Kaysareya, ompa okititanik pa in pweblo Tarso.

³¹Kwakin inik tanichikolme taneltokalme pa in tal Yudaya, wan Galileya wan pa in tal Samarya, wan moshte kipiialoya sewiliste wan yoliloya ka tamawishtiliste pa in TATS, wan mochiptiyaloya miyak ka nitapalewiste in EspirituSanto.

Petros kipahti Áyne'as

³²Kampa Petros panowaya pa miyak pweblo' wan oy okin-pashal inik nita'onanalme taneltokalme pa Dyos yehwante mochantiloya pa Lida. ³³Ompa okit se takat itok Áyne'as, in kipiayaya chikweyi shiwim, tastikatkaya pa se tapeshte yewal amo nehniemiyaya. ³⁴Wan Petros kili yewal:

—Áyne'as, Yehshwa-Kristo mishpahti. Shimokets wan shik-so motapech wan haniman omokets. ³⁵Wan okitak moshte yehwante ompa mochantiloya pa Lida wan pa in tal Sharón, moshte taneltokak pa in Tats Yehshwa.

Dorkas yoli oksep

³⁶Katkaya pa Yope se siwat niTaketsal nitahtolDyos, itoka Tabita, ka in tahtol gereko kinek kitos Dorkas. Yewal hanse tonatim kichiwaya ten kwal wan kinpalewiayaya miyak yehwante amoten kipiialoya. ³⁷Pa in tonatim omokok wan omik; Kwakin ki'altik nimihki wan okiwikak okitalik pa se kalitik ompa takpak. ³⁸Inik moneshtililme katkaloya Yope amo wEhka pa Lida, kimatik kampa Petros katkaya pa Lida; okintitanik omente takam ka Petros pa kililoskya:

—Amo shiwehka shiwal ka tehwanse.

³⁹Haniman omokets Petros. Oy ka yehwante kwah o'as pa Yope kiwikak pa in se kalitik ompa takpak wan walak ka Petros inik siwam inintakam mihmihke, chokatikatkaloya wan

kineshtililoya in shashalme wan takemtil yewal kintso-maya kwah yoltikatka Dorkas.


⁴⁰Kwakin okinkisti Petros moshte pa kiyawak, wan omotankwakets okitahtolti Dyos; kwakin omomalin Petros ka-ha katka in mihki, kito:
—Tabita, shimokets.

Wan yewal okinishtap nishtololwam, okit Petros wan omotal. ⁴¹Kwakin Petros okimak nimahwa pa kipalewiskya pa moketsaskya; Dorkas. Kwakin okinnots yehwante okinonanDyos wan inik siwam inintakam mihmihke, wan okineshti yolki. ⁴²Wan kimatik moshte masewalme pa Yope, wan miyak taneltokak pa in Tats Yehshwa. ⁴³Wan Petros omoka pa Yope sek tonatim, pa nikal se itoka Shimón yewal kiyokshiti kwero.



© 1996 David C. Cook

Tabita, shimokets (9:40)



© 1996 David C. Cook

Dorkas yoli oksep (9:41)

Petros wan Kornelyus

10 ¹Katkaya se takat pa in Wepweblo Kaysareya, yewal itokaya Kornelyus in katka kapitan ka 100 gwacho' yewal motokayoltiyaya italyano. ²Wan yewal katka se takat kwal,

wan moshte yehwante ompa mochantiloya pa ni'icha, kitankwa-ketsaliloya Dyos wan momaptiloya ni'ishpa Dyos. Kornelyus kinpalewiyaya miyak ka nitemakaliste pa masewalme in yudiyo' yehwante amoten kipiylaloya wan hanse tonatim kitahtoltiyaya ka miyak tamawishtiliste Dyos. ³Pa se tonat kina pa yey ora' pa tyotak, Kornelyus, tachiyaya kina tatimiktiyaskya okit se nitanawatilanelDyos omo'asilti kaha yewal wan kili:

—Kornelyus!


⁴Kornelyus kitatikatkaya wan momaptitkatka, kili:

—Ten tihnek, Tats?

Wan in tanawatilanel kili:

—Dyos okikak in yewal ten otiktahtan wan yewal kimat kina tikipalewi yehwante amoten kipiylal. ⁵Wan ashka, shikintitan masewalme pa yaske Yope, wan shitatake pa kwalikaske in se itok Shimón yewal niyok kitokayoltil Petros. ⁶Yewal ompa moseptikatka pa nikal se itoka Shimón yewal kiyokshiti kwero in katka nikal pa itenko in We'at.

⁷Kimani opanoti in tanawatilanel, yewal inak otakets, Kornelyus okinnots omente nitekipanolme wan se gwacho yewal kineltokaya Dyos yewal hanse kitokatinemi. ⁸Kwakin okintakichil Kornelyus in mochten kipanowaya wan okintitan pa Yope.




© 1996 David C. Cook

Petros tehko pa ikpak kal pa kitahtoltiskya Dyos (10:9)

⁹Pa mostatik, kimani yehwante yaloya pa in ot wan astiya-loya pa in Wepweblo Yope. Wan Petros tehko ikpak kal pa kitahtoltiskya Dyos, katkaya takwalispa. ¹⁰Walmayan Petros, wan kinekiya takwaskya. Kimani kitayokshilititkatkaloya Petros, tachiyaya kina tatimiktiyaskya, ¹¹okit in takpakIlwikak ishtapotikatka wan temotiwalaya se nesiyyaya kina se shashalWe, katkaya ta'ilpilme pa inik nawi nitehtenko, temowaya ipa in tal. ¹²Pa in shashal katkaloya mochi inik yolikilme ka nawi inintankwam wan mochiten yewal mowilanal ipa tal wan inik moshte pa in ilwikak kishki nesil kina totom. ¹³Kwakin omokak se tahtol, kili:

—Shimokets, Petros shihmikti wan shikwa.



© 1996 David C. Cook

Petros, tachiyaya kina tatimiktiyaskya, kit in takpakIlwikak ishtapotikatka wan temotiwalaya se shashalWe, katkaya ta'ilpilme pa inik nawi nitehtenko pa in shashal katkaloya mochi inik yolikilme ka nawi inintankwam wan mochiten yewal mowilanal ipa tal (10:12)

¹⁴Petros kili:

—Newal amoyok nikchiwaskya, Tats, kampa amo nikwas ten yewal tatatsot pa tehwante in yudiyo', kina kito in tahtol in ten amo chihchipawak.

¹⁵Wan in tahtol oksep kito:

—Ina yewal kili Dyos yewal ten chipawak, amo shikit kampa katsawak.

¹⁶In opan yeshpa wan haniman in shashal oye ta'ahkokil oksep pa in takpakllwikak. ¹⁷Yok omoka Petros ki'ilnamikti ten kinek kitoskya in tachiyaya kina tatimiktiyaskya, kimani inik takam yewal okintitan Kornelyus, yehwante tahtantikatkaloaya pa in tatapoli kaha mokawaya nikal Shimón. ¹⁸Wan ka wehwe otahtanik ta ompa moseptikatkaya se itoka Shimón yewal niyok kitokayoltiloaya Petros. ¹⁹Petros ki'ilnamiktikatka ten kinek kitoskya in tachiyaya kina tatimiktiyaskya, in Espiritu kili: —Shikit; yey takam mishtemotikat. ²⁰Shimokets, shitem wan shi ka yehwante, amoten shikintahtanil, kampa newal onikinwaltitan.

²¹Kimani temowaya Petros kaha katkaloya inik takam, kinmili:

—Shikitak. Newal ninewal yewal ankitemotikat. Ka ten anwalal?

²²Yehwante kinankilik:

—Ka se itok Kornelyus, yewal ininkapitan 100 gwacho', yewal se takat kwal, wan kimat momaptiyaya pa ni'ishpa Dyos moshte kimawishtililoaya masewalme yudiyo'. Se nitanawatil-anhelDyos chipawak kili pa timishwikaloskya tewal pa ni'icha yewal pa mishkakis in ten tewal tikilis.

²³Kwakin Petros okintake pa kalakiloskya wan ompa panoloskya yowal. Wan mostatik omokets Petros, wan panoti inak yehwante, wan niyok kitokatyaloya sek ininnohniwan taneltokalme, mochantiloaya ompa Yope.

²⁴Mostatik asik pa Kaysareya, ompa kinchishtikatkaya Kornelyus ka ninohniwan wan nihniwan kintasotaya pa oksek kalme, kinnichiko pa nikal. ²⁵Kimani Petros kalaktiyaya, okis Kornelyus pa kinamikiskya, omotankwakets pa ni'ikshiwam Petros, kiliyaya tahtol kwahkwal. ²⁶Wan Petros kikets, kili: —Shimokets, kampa hanwel newal niyok nitakat.

²⁷Pa kimani kalaktiyaloya taketstiyaya inak Petros wan okinmit nichikotikatkaloya myak masewalme. ²⁸Kwakin Petros kinmili:

—Anmehwante ankimatil kwal kampa tishneshtili NitanawatilMoshé, motatasot pa monelos se yudiyo ka yehwante amo kat yudiyo' niyok pa mopashaloske. Ma yok onishneshtil Dyos kampa amokwal newal pa nikitos amo chipawak pa amo'ak ka in amo yudiyo'. ²⁹Yok oniwal kampa

otitatitan pa niwalaskya, amoten onikit. Ashka annimish-tahtanilis, pates antatitanik pa niwalaskya?

³⁰Kwakin Kornelyus kinankili:

—Kipi nawi tonatim ka in ora', pa yey ora' pa tyotak, nik-tahtoltitkatka Dyos pa no'icha wan shikit omoneshti se takat pa no'ishpa tatakimiltili katka ka shashal tipitak. ³¹Wan nichili: “Kornelyus Dyos okikak ten otiktahtan wan niyok ki'ilnamik in kwal tikinchiwili yudiyo' yehwante amoten kipi-yal. ³²Ashka, shitatitan pa in Wepweblo Yope pa tikchiwas pa walas in Shimón yewal niyok kitokayoltil Petros, yewal ompa mochantitik pa nikal in okse itok Shimón in yewal kimat kiyokshiti kwero ompa mochanti itenko in wehwe'atim.” ³³Haniman, onitatitan pa mishnotsaloskya wan tewal otinishchiwil kwal kampa otiwal. Ashka, moshte tikat nika pa ni'ishpa Dyos pa tihkakiske mochi in ten TATS omichil pa titichilis.



*Kintakichiliyaya Petros yehwante
katkalo ya pa nikal Kornelyus (10:33)*

**Kintakichiliyaya Petros yehwante
katkalo ya pa nikal Kornelyus**

³⁴Yok okipewalti tahtol Petros wan kinmili:

—Ashka melak nihmat kampa Dyos kit se kina kit okse, ³⁵hanwel yewal pa mochi kishki tal yewal kwal kinmit inik kimatilo ya momaptilo ya pa ni'ishpa Dyos yewal wan kimatil

kichiwal kwal. ³⁶Dyos okintitanil in tahtolme isra'elita' wan okintakichil in tamashtilisteKwal ka sewiliste pa toyoliliste ika Yehshwa-Kristo, yewal ininTATS moshte inik masewalme. ³⁷Anmehwante ankimatil in yewal mochiten opan pa inintal in yudiyo'. Mochi in omopewalti pa in tal Yudaya, takwitapit ka in takwatekiliste yewal taketstinem Yuhanes. ³⁸In Yehshwa nasareteko, yewal Dyos okitahtolti wan okimak in EspirituSanto, wan kichiptinem ten kwal ka chikawaliste wan kinpahtitinem moshte yehwante kinkokolliyaya tawalilot kampa Dyos katka ka Yehshwa. ³⁹Wan tehwan tehwante tikat tatitanilme, tihmatil kampa melawak tikitak mochiten yewal okichi Yehshwa pa inintal in yudiyo' wan pa Yerushalém, kimiktik kisalok pa se krusKwawit. ⁴⁰Ma yok, Dyos okiyolti pa yey tonatim, okimakawalti pa moneshtiskya. ⁴¹Amo moshte masewalme, hanwel tehwan tehwante, akyehwan tehwante Dyos okinonan pa ya wehka, hanwel tihmatil kampa melawak tikitak. Tehwan tehwante inik titakwatinemil wan titakontinemil inak yewal, takwitapit kwah yewal oyol oksep. ⁴²Wan otishtitan pa tikintakichiloskya in tamashtilisteKwal ka in yudiyo'. Wan otishtitan pa tikinmililoskya melak kampa in Yehshwa oki'onan Dyos kina se hwes pa yohyolke wan mihmihke. ⁴³Yoke kitol melak mochi in amatTakwihkwilolme yewal kinkwihkwilok niTaketsalme nitahtolmeDyos, kampa mochi yewal aki taneltok pa yewal konanas, ika ka ni'itokaliste yeske ta'ihnililme ka ininta'htakoliste.

Inik amo yudiyo' konanaske in EspirituSanto

⁴⁴Ayamo'ok tamiyaya kinmiliyaya in tahtolme Petros, owal in EspirituSanto ipa moshte yehwan tehwante kikaktikatkaloya in tamashtilisteKwal. ⁴⁵Wan motapololtiloya in taneltokalme yudiyo' yehwan tehwante katkaloya pa nitatekiliste ikwerit itenko kaha mashishal yehwan tehwante walak inak Petros, kampa kitak kina owal in EspirituSanto niyok ka in takam amo yudiyo'. ⁴⁶Kampa kinkakiloya tahtoloya ka oksek tahtolme wan kiloloya tahtolme wehwe Dyos.

⁴⁷Kwakin Petros kinnankili:

—Hanwel ak kwal pa kitsakwilis at, pa amo yeske takwatekil? Inik yehwan tehwante konanak in EspirituSanto niyok kina tehwan tehwante?

⁴⁸Wan otatake pa yeloskya takwatekilme ka ni'itokaliste Yehshwa-Kristo. Kwakin kitahtanik pa mokawaskya sek tonatim ka yehwante.

**Petros kinmashti in Abwelolme Wehwetsim
wan in tanawatinilme pa Yerushalém in
yewal ten opan pa nikal Kornelyus**

11 ¹Inik tatitanilme wan inik tonohniwan taneltokalme yehwante katkaloya pa Yudaya kimatik kina inik amo yudiyo' okineltokak nitahtol Dyos. ²Kwah Petros omokwep pa Yerushalém, in yudiyo' yehwante kineltokaloya in tahtol kampa moshte kipiylaloya pa yeloskya tatekiliste ikwerit itenko kaha mashishal ki'ahwaloya. ³Kililoya:

—Kina otikalak pa nikal yehwante amo kipiylal nitatekiliste ikwerit itenko kaha mashishal wan niyok otitakwa inak yehwante?

⁴Kwakin okipewalti Petros taketsaliste mochi sesen tachiwaliste yewal ten okipan, kinmili:

⁵—Nikatkaya pa in Wepweblo Yope, niktaholtitikatka Dyos, nitachiyaya kina nitatimiktiyaskya, wan onikit temotiwalaya nesiya kina se shashalWe, katka ta'ilpitilme inik nawi nitehtenko temotiwalaya pa in takpakIlwikak kampa newal nikatkaya. ⁶Onimoka nikitatik ten kipiylal itik, wan onikinmit pa in shashal katkaloya mochi inik yolikilme ka nawi inintankwam, wan inik tekwanim wan inik mochten yewal mowilanal ipa tal, wan moshte inik kishki nesil kina totom pa ilwikak. ⁷Kwakin onihkak se tahtol, nichiliyaya: “Shimokets, Petros; shihmikti wan shikwa.” ⁸Ma yok nihnan-kili: “Newal amoyok nikchiwaskya TATS, kampa amo'ik nikwa nitipik yewal ten tatatsot in ten amo chipawak.” ⁹Ma yok in tahtol onichil oksep pa in takpakIlwikak: “Amo shikit kampa katsawak ina yewal kili Dyos yewal ten chipawak.” ¹⁰In opan yeshpa wan haniman oye ta'ahkokil oksep, pa in takpakIlwikak. ¹¹Shikit haniman asik yey takam pa in kal kaha nikatkaya, kinwaltetitaniloya ka newal pa in Wepweblo Kaysareya. ¹²Nichili in EspirituSanto kampa niyaskya inak yehwante. Niyok oyak nonawak inik chikwase tonihniwam. Wan tikalakik pa nikal in takat itok Kornelyus, ¹³otishmashti in Kornelyus kina okit se nitanawatilanhelDyos, pa nikal kalitik

moketstikatka wan in tanawatilanel hel kili: “Shitatitan pa Yope pa kinotsaske Shimón, in yewal niyok kitokayoltil Petros, ¹⁴wan yewal anmichilis kina tewal wan moshte yehwante mochantilme pa mokal anyeske takistiliste pa in poliwiliste.” ¹⁵Kwah onikinwaltakechil yehwante, in EspirituSanto owaltem ipa yehwante, yoke kina tehwan te oshpan ta'ishpa. ¹⁶Kwakin nikilnamik nitahtol in Tats Yehshwa: “Melak Yuhanes takwatek ka at, ma yok anmehwante anyeske takwatekilme ka in EspirituSanto.” ¹⁷Yok yewal, ta okinmak Dyos yehwante in poderoliste yewal otishmak tehwan te niyok kampa tihnel tokak in Tats Yehshwa-Kristo, ak ninewal pa niksakwilis Dyos?

¹⁸Kwah okikakik in, yahmo ki'ahwak Petros, wan kitoloya tahtolme wehwe wan kwahkwalm e pa Dyos, kitoloya:

—Hanwel yok Dyos okinmakawalti pa kichiwaloskya ten kwal pa kineshtiloskya kampa kikweptikat ininta'ilnamikiliste wan kineshtitikak kampa kikweptikat ininyolme ka Dyos ka inintachiwaliste kwahkwalm e yehwante amo yudiyo' Dyos kinmak yoliliste yewal amo'ik tamis!

In taneltokanilme pa in Wepweblo Anti'okya

¹⁹Inik yehwante mosesemanak katkaloya tatimoliste pa yeloskya tamiktiliste kampa oye tamiktil Estepan, kwakin ocholok in taneltokalm e wehka asik pa in tal itok Poynikya, wan pa in tal ipanta in Wehwe'atim itok Kipros, wan pa in Wepweblo' Anti'okya. Kintakichilitinemi loya nitahtolme Dyos hanwel yudiyo', yehwante ompa mochantiloya. ²⁰Ma yok katkaloya sek ka in taneltokalm e, yehwante mochantiloya pa Kipros, wan pa in tal itok Kirene, yehwante asiloya pa Anti'okya niyok yehwante masewalm e tahtoloya gereko', kintakichilitinemi loya nitamashtilisteKwal in Tats Yehshwa. ²¹Wan nichikawaliste in Tats katkaya ka yehwante, wan myak masewalm e taneltokak wan kitokak ni'ot in Tats Yehshwa.

²²Kwah kimatik in taneltokalm e ten panotikat kaya pa Yerushalém, okititanik BarNabás pa yaskya Anti'okya. ²³Kwah yewal o'as, okit kina kwal kinihniliyaya Dyos kwal kinchilwilitikatka in taneltokalm e, kwal tamat. Wan kintahtaniyaya pa kichikawaltiloskya ininyolme moshte pa taneltokaloskya

pa ni'ot in Tats Yehshwa. ²⁴Kampa katkaya BarNabás se takat kwal, mokawiliyaya miyak EspirituSanto wan kineltokaya in Tats Yehshwa. Kwakin yok miyak walmochiwak taneltokalme ka in TATS.

²⁵Kwakin oy BarNabás pa Tarso pa kitemoskya Sha'ul; ²⁶kwah okit Sha'ul yewal okiwik pa Anti'okya pa mochi se shiwit monichikoloya ka in masewalme taneltokalme pa Kristo. Wan kinmashtiloya myak masewalme. Wan ompa oye pa Anti'okya kaha okinpewaltik in se ta'ishpa kampa inik masewalme kintokayoltiloya kristyano' yehwante kineltokaloya toTats Yehshwa-Kristo.

²⁷Pa inik tonatim temok sek niTaketsalme nitahtolmeDyos yehwante katkaloya pa Yerushalém yaloya pa Anti'okya.

²⁸Wan omokets se ka yehwante, pa tahtoskya itoka Ágabos, wan kito ka nichikawaliste in EspirituSanto, kampa yeskya se mayanaliste we pa mochi kishki tal, in mayanaliste oye kwah Kela'udyus katka we rey. ²⁹Yok kichiwak pa sesen yehwante taneltokalme pa Kristo, hanwel kina sesen kipi-yaloya tomi, kintitanililoskya pa kishki kipi-yaloyoskya pa kinpalewiloskya ininnohniwan taneltokalme kampa amoten kipi-yaloya wan mochantiloya pa Yudaya. ³⁰Yok okichiwak, wan okititanik tomi ka BarNabás wan Sha'ul yehwante okin-wikilik Abwelolme Wehwetsim inik taneltokalme pa in Yudaya.

Kimiktik Yakobo wan kitsakwal Petros

12 ¹Pa inik tonatim otatake Herodes in weRey pa kin-kitskiloskya sek taneltokalme pa kintakokoltiloskya. ²Otatake pa kikotonililoskya ka teposte in Yakobo, yewal katka ninohni Yuhanes, ³okit Herodes kina kwal pakiloya in yudiyo', wan otatake niyok pa kikitskiloskya Petros. Katkaya inik tonatim ka mitotiliste kwah kikwaloya pan yewal amo kipi taposhawalti pa in mitotiliste itok Paskwa. ⁴Yok kikitskik Petros, wan kitsakwak wan kitemakak ka nawi tanichikolme ka nawi gwacho'. Kinek mochiyaskya pa kimani motamiskya in mitotiliste itok paskwa kwakin tatakewaskya pa kwalikaloskya pa ininishpa in masewalme. ⁵Kimani Petros katkaya tatsakwal, in taneltokalme hanse motahtaniloya wan mochikawaltiloya pa Dyos ika yewal.

Dyos kikisti Petros pa in tatsakwal

⁶Pa in yowal katkaya pa kimani Herodes mostatik kikis-tiskya Petros pa kiwikaskya pa inishpa in masewalme pa kihusgaroloskya, koshtikatka Petros ipanta ka ome gwacho', ilpitikatka ka kadena niyok takwitaptikatkaloya gwacho' pa nitatapoli in kal kaha tatsakwaloya. ⁷Kwakin ones se nitanawatilanhel in TATS, ka se tawiliste tipitak pa in kalitik. Wan in tanawatilanhel kikitski Petros kampa nakastikatka, ki'isilti, kili:

—Shimokets shimo'isiwilti.

Haniman wetsik kadena pa ininmahwam, ⁸wan in tanawatilanhel kili:

—Shimotakemilti wan shikintal mowarachim.

Yok okichi Petros, wan in tanawatilanhel kili:

—Shiktal motakemtil wan shinishtok.



© 1996 David C. Cook

*Se nitanawatilanhel in TATS, ki'isilti
Petros kikisti pa in tatsakwal (12:7)*

⁹Yok in tanawatilanhel kisaya Petros kitokatiyaya ikwitap. Amo kimatiya ta melawak panotikatka ta tachishtikat-kaya kina tatimiktiyaskya. ¹⁰Wan panok in ta'ishpa kaha takwitaptikatkaloya katkaloya in nawinte gwacho' yok asik kaha katkaloya in oksek gwacho' kwakin asik pa in tatapoli tatachiwali ka fyerro yewal kisaya pa in Wepweblo. In tata-poli mo'ishtap isel, wan kisak, panok se kaye, hanse yaloya

pa kimani asik pa okse kaye pa hani yahmo ones in tanawatilanelhel ka Petros. ¹¹Kwakin Petros walmo'ilnamik wan mo'il:

—Ashka nihmat melak; in TATS okiwaltitan se nitanawatilanelhel pa nishkistiskya pa nichikawaliste rey Herodes wan mochi in yewal masewalme yudiyo' kinekilo ya nishchiwililoskya.

¹²Kimani Petros kimat in mochiten, oy pa nikal Marya, ninantsi Yuhanes, in niyok kitokayoltilo ya Markus, ompa nichikotikatkaloya miyak wan kitahtoltikatkaloya Dyos. ¹³Kitehtewi Petros in tatapoli pa kiyawak, wan owal se tekipanol siwatYankwik itok Rode oy tachi ak katka. ¹⁴Wan ki'ishmat nitahtol Petros, kwakin omopakilti miyak amo ki'ishtapol in tatapoli, han motaloti omokwep pa kinnawatiskya inik oksek kampa Petros katkaya pa kiyawak in tatapoli. ¹⁵Yehwante kilik: —Amo tikpi ta'ilnamikiliste.

Ma yok yewal kitowaya kampa katkaya melak. Kwakin yehwante kilik:

—Yewal nitanawatilanelhel Petros.

¹⁶Wan Petros moka tatehtepik pa in tatapoli. Kimani oki'ishtapok in tatapoli wan okitak motapololtik. ¹⁷Ka nimahwa Petros kichiwaya taneshtiliste pa amo nawatityaloskya, kwakin okintakichil kina in TATS okikisti pa in tatsakwal, niyok kinmili:

—Shiyak shikinnawatik Yakobo wan tonohniwan taneltokalme inik yewal mochiten onishpan.

Kwakin okis wan panoti oksela.

¹⁸Kwakin kwah tanes, in gwacho' amo kimatilo ya ten kito loskya ten yewal kipanowaya Petros. ¹⁹Yok tatake Herodes pa kitemoloskya Petros, amo kitak, kwakin kintahtanili Herodes in gwacho', yehwante amoten kinankilik. Kwakin otatake pa kinmiktiloskya in gwacho' wan opanoti Herodes pa in tal Yudeya temo pa Kaysareya ompa omoka.

Herodes omik

²⁰Wan hyero kwalantikatika Herodes ka yehwante pa in Wepweblo Tiros wan in Wepweblo Tsidón, yehwante mokawak pa yaloskya tahtoloskya ka Herodes. Wan kitinewilik tomi in Belastos, se nitekipanol in rey Herodes, inik mochantilo ya pa tirtoteko' wan pa sidoneyo' kitahtanilo ya pa kintahtaniloskya

sewiliste ka Herodes, kampa yehwante motakowililoya pa inintal Herodes. ²¹Pa se tonat mokawak pa mo'italoskya Herodes inak yehwante, motakemilti ka nishashalme kwah-kwal kina motakemilti se weRey, wan motali ipa nisyawe kaha tahosgarol kwakin kintakichili ka miyak tahtolme in masewalme. ²²In masewalme tsatsiloya kililoya:

—Yewal tahtotik se dyos, amo se masewal!

²³Wan haniman se nitanawatilanelhel in TATS, okikokolti Herodes kampa amo okimak tahtolme wehwe Dyos, kwakin okikwak okwilme nikwerpo walmik.

²⁴Ma yok nitahtolmeDyos momiyaptitiyaya, wan katka tanawatiliste kaha han.

²⁵Wan BarNabás wan Sha'ul, kimani omotamik inintekipanoliste, walmokwepak pa Yerushalém kinwalikaloya ka yehwante Yuhanes, wan yewal kitokayoltiloya Markus.

Kintahtoltil BarNabás wan Sha'ul pa kichiwaskya okse tekipanoliste

13 ¹Inik niTaketsalme nitahtolmeDyos wan tamashtinilme. Yehwante taneltokaloya pa Yehshwa-Kristo pa Anti'okya. Katkaloya BarNabás, wan Shimón, (yewal niyok mo'itokaya Niger), wan Lukyus mochantiyaya pa in tal Kirene, wan Manahém yewal omo'apa pa nikal Herodes in weRey wan Sha'ul. ²Se tonat, kitahtoltitikatkaloya Dyos wan mosap-tikatkaloya, kinmili in EspirituSanto:

—Shikinkawak oksela BarNabás wan Sha'ul pa kichiwaske in tekipanoliste yewal nikinmakas.

³Kwakin, yehwante mosawak kitahtoltik Dyos, kwakin kintalilik ininmahwam ipa BarNabás wan Sha'ul wan okintitanik.

Inik tatitanilme taketsaloya nitahtolmedyos pa Kipros

⁴Yok yewal okintetan in EspirituSanto, Sha'ul wan BarNabás pa yaloskya pa in Wepweblo Seleukiya wan ompa okonanak barko oyak pa Kipros in tal katka ipanta pa in wehwe'atim.

⁵Asik pa itenko in wehwe'atim pa Salamis. kintakichililoya nitahtolmeDyos pa inintyopalmeYudiyo'. Niyok katka ka yehwante Yuhanes yewal kinpalewiya. ⁶Kwakin opanok mochi in tal pa in wehwe'atim o'asik pa in ranchit Papos. Om-pa kitak se takat yudiyo itoka BarYehshwa, yewal kichiwaya

tashoshaliste. Yewal tikwamanaya kitowaya kampa yewal katka niTaketsal nitahtolDyos. ⁷In tashoshan BarYehshwa katkaya inak in Wetatakewan Sergiyos Pawlos, yewal takat kimatiyaya tamatiliste. Wan otatake pa kinnotsaloskya pa walaloskya BarNabás wan Sha'ul, kampa kinekiya kikakiskya nitahtolmeDyos. ⁸Ma yok in tashoshan BarYehshwa, in kinek kitos ni'itokaliste Elimas, kintsakwiliyaya yehwante amo kinekiya pa Sergiyos Pawlos kineltokaskya Yehshwa-Kristo. ⁹Ma yok Sha'ul, yewal niyok itok Pawlos, mokawiliyaya miyak EspirituSanto, omoka kitati pa nishtololwam Elimas ¹⁰wan kili:

—Titewal, nikon tawalilot wan tikinkokoli inik ten kwahkwalmel, tikchi miyak tekwamanaliste wan tihmat tikchi mochi nimawiltiliste tawalilot! Amo'ik timo'ilka pa tihkoltilis ni'ot melawak Dyos? ¹¹Wan ashka, mishkokolti in Tats; yahmo titachishtiya pa sek tonatim amo tikit as nitawiliste tonat.

Pa haniman waltayoway wan tatiltik, omoka pa Elimas wan kitemowaya ak kiwikaskya pa kitilantiyaskya pa nimahwa.



© 1996 David C. Cook

Ashka, mishkokolti in TATS; amo titachishtiya pa sek tonatim amo tikit as nitawiliste tonat (13:11)

¹²Kimani okit in Wetatakewan Sergiyos Pawlos, yewal ten okipan Elimas, okineltok nitahtolDyos, motapololti kampa okit kina nitamatiliste in Tats Yehshwa kipiyya miyak chikawaliste.

Pawlos wan BarNabás oyak pa Anti'okya pa in tal Pisidya

¹³Pawlos wan yehwante kishki yaloya inak yewal, kisak pa barko ompa pa Papos asik pa in Wepweblo Perge pa in tal Panpilya, ompa Yuhanes okinka wan omokwep pa Yerushalém. ¹⁴Pawlos wan BarNabás okisak pa Perge, asik pa in Wepweblo Anti'okya pa in tal Pisidya. Oyak pa nityopYudiyo pa se tonatmosewilyudiyo ompa motalik pa siya. ¹⁵Kwah tamik momashtik NitawatilMoshé wan inik niTaketsalme nitahtolmeDyos, wan inik wehwetatakewalme pa in tyopYudiyo tatitanik in taketsaliste ka yehwante pa kinmililoskya:

—Nonohniwan taneltokalme, ta ankipiyal ten ankitoske, se taketsaliste ankinchiwaltis masewalme shikitok ashka.

¹⁶Kwakin omokets Pawlos, okichi taneshtiliste ka nimahwam wan kito:

—Masewalme isra'elita', wan anmehwante amo isra'elita' kishki melawak ankimatil momaptil pa ni'ishpa Dyos shinishkakik: ¹⁷IninDyos in Isra'El okinonan towichalme, okinchiwil kwal yehwante kwah mochantiloya pa in mochital Egipto yewal amo katkaya inintal; kwakin okineshti Dyos nipoderoliste wan okinkisti pa in tal. ¹⁸In masewalme nehnentinemiloya pa in tal kaha tawak pa 40 shiwim wan pa mochi in shiwim Dyos kinkwitaptnem, ¹⁹yewal kinshitin chikome pweblo ka ininmasewalme pa in tal Kanán, wan okinmak inik isra'elita' in talme kina ininyashka. ²⁰Mochi in opan kina pa 450 shiwim, kwah opan in Dyos okinmak hwese', pa inik tonatim ka niTaketsal nitahtolDyos SamuEl. ²¹Kwakin otahtanik se weRey, wan Dyos okinmak in Sha'ul, nikon Kish, ka in se tanichikol pa BenYamín yewal reynarowaya pa 40 shiwim. ²²Kwah Dyos okikisti Sha'ul, pa amo yeskya weRey, kwakin Dyos okital Dawid pa yeskya ininweRey yehwante, Dyos kito: “Newal niktasot miyak Dawid nikon Isay kampa yewal kichi mochiten niktake.”

²³Dyos oki'asilti in tahtol melawak yewal kito ya wehka, kwah kiwaltitan Yehshwa in katka niwichal Isra'El, pa kinkistiskya pa

in poliwiliste. ²⁴Pa kimani ayamo'ok walaya Yehshwa, Yuhanes kinmiliyaya pa mokwatekiloskya pa kichiwaloskya ten kwal pa nesiskya, kampa kikweptikat ininta'ilnamikiliste wan kineshtitikat kampa kikweptikat ininyolme ka Dyos ka inintachiwaliste kwahkwalmelme pa moshte masewalmelme pa Isra'El. ²⁵Kimani Yuhanes tamtiyaya nitekipanoliste, kitowaya: "Takwitap ka newal walas se, yewal newal amo nikpi amo nimonots pa nimopachos niktomilis nikorreya niwarach wan pa niktekipanolili nihan tipit."

²⁶'Pawlos kinmiliyaya: Nonohniwan taneltokalmelme, anmehwan-te nikolinchim AbRaham, wan anmehwante ankimatil momaptil pa ni'ishpa Dyos: melawak shihkakik in tanawatilisteKwal yewal takistili in poliwiliste. ²⁷Inik yehwante mochantil pa Yerushalém, wan yehwante kipiyaloya wehwetatakewaliste amo kimatiloaya ak katka Yehshwa, amo kimatiloaya ten kinek kitos in yewal ki-kwihkwilok niTaketsalmelme nitahtolmeDyos. Yok momashtiloaya pa mochi inik tonatim pa in tonatmosewilyudiyo; pa kimani tatakewak pa kimiktiloskya Yehshwa, yok tamik kichiwak in yewal onka takwihkwiloli. ²⁸Wan amo kitak ten, pa yok yeskya tamiktil Yehshwa, ma yok kitahtanik Pilatos pa kimiktiloskya. ²⁹Kimani tamik monamikik mochi in ten kitowaya pa in amat-Takwihkwilolme, yewal kipiayaya pa kipanoskya Yehshwa, kitemowik pa in kruskwawit wan kitalik kahakoyonkeTeshkal. ³⁰Ma yok Dyos okiyolti oksep ka inik mihmihke. ³¹Wan pa miyak tonatim okitak inik yehwante yaloya inak yewal pa in tal Yudaya asiloaya pa Yerushalém, ashka kat yehwante kimatil kampa melawak okitak yewal kintakechilil masewalmelme.

³²'Wan tehwan-te tikintakichilitinemil in tamashtilisteKwal yewal melawak Dyos kintenewil towichalmelme. ³³Tehwan-te kina nikolinchim yehwan-te, ki'asilti in tahtol melawak yok kina kito, kwah kiyolti Yehshwa, kina onka takwihkwilol pa in ome salmo: "Tewal tinokon; kili, ashka onimochi motats."^j

³⁴Haha, Dyos okiyolti Yehshwa, okikisti pa amo'ik palaniskya nikwerpo, yok monamikik inik tahtolme: "Nikinnamikiltis inik taketsaliste melawak ka in tamashtiliste kwahkwalmelme yewal oniktiniwil Dawid."^k ³⁵Kampa yok kito pa okse takwihkwilol:

^j 13:33 Salmo' 2:7.

^k 13:34 YeshaYah 55:3.

“Amo tihkawas pa palanis nokwerpo, newal moTikipanol in mota'onanal.”³⁶ Kampa melawak Dawid okintekipanolil yehwante yoliloya pa inik tonatim kimani yoliyaya yewal, okichi kina Dyos kinekiya. Kwakin omik, okitapachok ka inin-kolinchim wan tihmatil kampa opalan nikwerpo. ³⁷Ma yok in Yehshwa yewal Dyos okiyolti oksep, amo opalan nikwerpo. ³⁸Shihmatik ashka nonohniwan taneltokalme, kampa anmish-mashtitinemil inak Yehshwa ka ta'ihniliste ka ininta'ihetakoliste. ³⁹Kampa in NitanawatilMoshé amo okinkistil in masewalme ininta'ihetakoliste, ma yok yeske takistiliste ininta'ihetakoliste moshte kishki taneltokal pa Yehshwa. ⁴⁰Shitachishtiyak pa amo'ik anmishpanos kina takwihkwilok niTaketsalme nitahtolmeDyos:

⁴¹ Shikitak anmehwante tawetskiyanim, shimotapololtik wan shimikik;
 kampa newal niyas nikchiwas pa inik tonatim kwah anyoltiyaske
 se tachiwaliste kampa anmehwante amo taneltokaloskya, ta hanwel se yok anmichiliskya.

⁴² Kwah kisaloya pa nityopYudiyo' Pawlos wan BarNabás in masewalme kitahtaniloya kampa pa okse tonatmosewilyudiyo, pa kintakichiliskya oksep tamashtiliste. ⁴³Kwah tamik take-tsak pa nityopalmeYudiyo' myak yudiyo', wan sek amo yudiyo' otaneltokaloya ka inintaneltokaliste in yudiyo', kitokatiyaloya Pawlos, wan BarNabás, yehwante kintakichiliyaya pa mochikawaltiloskya pa taneltokatyaloskya pa nita'ihniliste Dyos.

⁴⁴ Pa mostatik pa in tonatmosewilyudiyo, hame moshte masewalme pa in Wepweblo monichikok, kampa kinekiloya kikakiloskya nitahtolDyos. ⁴⁵Kwah in yudiyo' kinmitak myak masewalme kinchawatik, wan ki'ahwaloya Pawlos kitoloya amo melawak katka kina taketsaya. ⁴⁶Ma yok amo momapti-loya Pawlos wan BarNabás, kinnankililoya kinmililoya:

—In moteshmonekiya ta'ishpa yewal anmehwante ankimate-loskya nitahtolmeDyos; ma yok amo ankinetik taneltokak wan amo ankiteshmonekil pa ankipiyaske yoliliste yewal amoTamis, ashka tiyaske tikintakichiliske nitahtolmeDyos inik amo yudiyo'. ⁴⁷Ina yewal tichili in TATS pa tikchiwaske:

Annimishtahtolti pa anyeske kina tawiliste pa
 ankinnawatiske notahtolme moshte yehwante pa
 in mochital,
 yok kimatiske kampa yeske takistiliste ka ininyoliliste,
 asis pa kishki mochi in tal.

⁴⁸Kimani inik amo yudiyo' okikakik in, kwal otamatik
 wan timakak tashtawaliste ka nitanawatiliste in TATS; wan
 taneltokak moshte yehwante Dyos kintahtolti pa kipiyaloskya
 in yoliliste yewal amo'ik tami. ⁴⁹NitahtolmeDyos kitaketsa-
 loya pa kishki mochi in tal. ⁵⁰Ma yok in yudiyo' taketsak
 ka in siwam kitankwaketsaliloya Dyos wehwemonotsalme
 wan yoliloya kina kitowaya inintaneltokaliste wan niyok ka
 inik takam wehwemonotsalme wan kinchikawaltik pa kin-
 temoloskya Pawlos wan BarNabás, pa kinkistiloskya wan
 kinwikaloskya pa kiyawak inintal. ⁵¹Ma yok motsehtselok
 nipokteTal pa ni'ikshiwam kina se taneshtiliste ika yehwante,
 kwakin oyak pa in Wepweblo Ikonyon. ⁵²Inik taneltokaloya
 pa Kristo kipiyaloya miyak pakiliste wan omokawilik miyak
 in EspirituSanto.

Pawlos wan BarNabás pa Ikonyon

14 ¹Pa in pweblo Ikonyon Pawlos wan BarNabás, okalakik
 in omente pa nityopYudiyo, ompa kintakichililoya
 nitahtolDyos kampa miyak taneltokaloya yudiyo' wan gereko'.
²Ma yok sek yudiyo' yehwante amo taneltokaloya pa Kristo,
 okichiwak pa kwalaniloskya masewalme amo yudiyo' wan
 okichiwak pa tamatiloskya amokwal pa yehwante kineltoka-
 loya Kristo. ³Ma yok Pawlos wan BarNabás ompa mokawaloya
 miyak tonatim, wan kintakichililoya in masewalme ka chi-
 kawaliste ika nita'ihniliste in TATS; amo momaptiloya wan
 in Tats Yehshwa kinneshtiliyaya masewalme pa Ikonyon
 kampa katkaya melawak in tahtol yewal kitoloya Pawlos wan
 BarNabás yehwante kichiwaloya tachiwaliste ka ininmahwam
 wan motapololtiloya. ⁴Ma yok amo katkaloya ka se tahtoliste
 in masewalme, sek katkaloya ka in ten kitoloya in yudiyo', ok-
 sek ka in ten kitoloya in tatitanilme. ⁵Yok kichiwak in yudiyo'
 se tahtoliste ka yehwante amo yudiyo' wan ka yehwante kipi-
 yaloya poderoliste kichiwak pa kinkokoltiloskya in tatitanilme
 wan pa kinmohmotaloskya. ⁶Kwah okimatik Pawlos wan

BarNabás, kwakin ocholok pa Derbe wan Listera niWehwepweblo Lika'onya, wan inik katkaloya itehtenko, ⁷ompa niyok kintakichililoya nitamashtilisteKwal Yehshwa-Kristo.

Pawlos pa Listera wan Derbe

⁸Wan katkaya se takat pa Listera amo nihnemiyaya. Pa kimani otakat amokwal ki'oliniskya ni'ikshiwam yowatiya han, amo'ik onihnem. ⁹Ompa kikaktikatka ten takets-tikatka Pawlos, yewal omoka kitatik kimat kampa in takat taneltokaya pa niyol kampa Dyos kipahtiskya. ¹⁰Kwakin ka tahtol chikawak Pawlos kili:

—Shimokets melahka ka mo'ikshiwam.

Yewal otsikwin wan haniman onehnem. ¹¹Yok kwah kitak in masewalme ten kichiwaya Pawlos, waltsatsik ka tahtol Lika'onya, kitotikatkaloya:

—Inik dyose' yewal mochiwak kina takam waltimok ka tehwantel!

¹²Wan kitokayoltiloya BarNabás ka in dyos Se'us, wan Pawlos ka in dyos Hermes kampa Pawlos katkaya in se yewal tahtowaya. ¹³In tyopWe ka Se'us, katka ta'ishpa in



© 1996 David C. Cook

In totats pa yewal nityopWe okinwalik sek toro' wan in masewalme kinsaloloya shochim; pa kiyawak pa nitatapoli inintyop kinekiloya kinmiktililoskya toro' pa yok kitankwaketsaliloskya Pawlos wan BarNabás (14:13)

Wepweblo, in totats pa yewal nityopWe okinwalik sek toro' wan in masewalme kinsalol shochim; pa kiyawak pa nitatapoli in tyop in masewalme kinekiloaya kinmiktililoskya toro' pa yok kitankwaketsaliloskya Pawlos wan BarNabás.

¹⁴Kwah takakik in tatitanilme Pawlos wan BarNabás haniman kintsayanak ininshashalme, wan motalok itsahtsala in myak masewalme, kintsatsililoaya:

¹⁵—Masewalme! Pates ankichiwal in? Tehwante niyok titakam kina anmehwante, in tamashtilisteKwal yewal titaketsal yok monek pa ankinkawaske in ten amo kipi tashtawaliste wan ankikwepaske anmoyol ka Dyos, yewal yoltik in okichi takpakIlwikak, in mochital, in wehwe'atim wan mochiten ta'onka pa yewal. ¹⁶Ya wehka Dyos kinmakawalti masewalme pa kinonanaloskya ininotim yehwante, ¹⁷ma yok hanse kineshtiyaya akyewal katka, kitimowaya ten kwal yeskya pa moshte. Yewal kichiwaya pa kyawiskya wan timakaya tapishkaliste kwah mo'asiltiyaya nitonat pa kipiyaloskya miyak takwaliste wan kipiyaloskya pakiliste pa toyolme.

¹⁸Ka in mochiten kitoloya Pawlos wan BarNabás mokistililoaya ka in masewalme pa amo kinmiktililoskya toro'.

¹⁹Kwakin walak in yudiyo' yehwante mochantiloaya pa Anti'okya wan Ikonyon, wan yehwante kinchikawaltik masewalme, pa kwalaniloskya ka Pawlos. Wan kimohmotak ka tetelme kikitikik kiwilanak pa kiyawak in Wepweblo wan ompa kikawak kampa tamatiloya katka mihke. ²⁰Ma yok kwah monichikok in taneltokalme pa Kristo kiyawaloloya Pawlos, yewal omokets wan okalak oksep pa in Wepweblo; Mostatik yewal wan BarNabás oyak pa in Wepweblo Derbe.

²¹Kwakin kintakichililoaya nitamashtilisteKwal Dyos ka takistiliste pa in poliwiliste pa Derbe, kampa myak masewalme taneltokaloya pa Kristo, kwakin mokwepak Pawlos wan BarNabás pa Listera, wan Ikonyon wan pa Anti'okya. ²²Kintahtaniyaya pa yoliloskya inik taneltokalme pa Kristo amo'ik momakawaltiloskya pa kineltokaloskya Yehshwa-Kristo kinmililoaya, monek pa tipanoske miyak takokoliste pa yok tikalakiske kaha reynaro Dyos. ²³Wan kintokayoltik sek takam Abwelolme pa sesen nintyop yudiyo' kwah tamik kitahtoltik Dyos wan mosawak Pawlos wan BarNabás kitahtanik Dyos pa kinpalewiskya pa yewal in taneltokaloya.

²⁴Kwakin opanok Pawlos wan BarNabás in tal Pisidya wan asik pa in tal Panpilya. ²⁵Ompa kintakichilitinemil nitahtolmeDyos pa Perge, wan temok pa AtalYah. ²⁶Kwakin oyak pa barko pa Anti'okya pa in mochital Sirya, ompa kaha in taneltokalme kintitaniloya ka nita'ihniliste Dyos pa kinpalewiskya pa amoten kinpanoskya Pawlos wan BarNabás kampa amo mokwalantiloskya masewalme ka in nitanawatilisteKwal Dyos wan tamik kichiwak in tekipanoliste. ²⁷Kimani asik pa Anti'okya, kinnichikok inik taneltokalme pa Yehshwa-Kristo kwakin kintakichilik in mochiten Dyos okichi ka yehwante, wan kina Dyos ki'ishtapol inik tatapoli kaha kalakiloskya inik taneltokaloskya yehwante amo yudiyo'. ²⁸Wan ompa omokawak miyak tonatim Pawlos wan BarNabás ka yehwante taneltokalme pa Kristo.

**Monichikol inik tatitanilme wan inik
Abwelolme Wehwetsim pa Yerushalém**

15 ¹Pa inik tonatim, sek takam walaloya pa Yudaya pa Anti'okya, okipewaltik tamashtiliste pa ininnohniwan, anmehwante amo mokistiliske ininyoliliste ta amo mokotonilik mokwerit kaha mashishal, yok kina kito NitawatilMoshé. ²Kwakin Pawlos wan BarNabás amo katkaloya ka in tamashtiliste wan mokwalantiloya ka yehwante. Kwakin omokawak kampa Pawlos wan BarNabás wan oksek taneltokalme pa yaloskya pa Yerushalém wan pa tahtoloskya ika in taketsaliste ka inik tatitanilme wan inik Abwelolme Wehwetsim.

³Inik masewalme pa in tyop okintitanik pa in ot, opanok pa tal Poynikya wan Samarya, ompa kintakichilik kina inik yehwante amo katkaloya yudiyo' okikawak inintaneltokaliste pa yewal taneltokaloya pa taneltokaloskya pa Dyos. Kwah kikakik in tanawatiliste, inik yehwante taneltokaloya pa Dyos miyak pakiloya.

⁴Kwah asik pa Yerushalém Pawlos wan BarNabás, oyek tanamikilme ka in taneltokalme wan inik tatitanilme wan inik Abwelolme Wehwetsim. Kwakin pawlos wan BarNabás kintakichilik pa mochi in ten Dyos okichi inak yehwante. ⁵Kwakin sek parisheyo' yehwante taneltokaloya, walmoketsak wan kitok:

—In monek kipiayaskya takotonili nikwerit kaha mashishal yehwante amo yudiyo', ma tikintakewak ma taneltokak pa NitawatilMoshé.

⁶Kwakin monichikok inik tatitanilme wan inik Abwelolme Wehwetsim pa yok kitaloskya in taketsaliste. ⁷Kwah tamik tahtok, Petros walmokets wan kinmili:

—Nonohniwan newal taneltokalme, anmehwante ankimatil, ya wehka Dyos onishonan newal itsala anmehwante pa animishmashtiskya nitamashtilisteKwal Dyos ka yehwante amo yudiyo' pa taneltokaloskya. ⁸Dyos kinishmat moshte ininyolme masewalme, niyok totamatiliste wan niyok kinnek yehwante amo yudiyo' taneltokaloya okinneshti kwah kinmak in ni'EspirituSanto yok kina tehwane. ⁹Wan Dyos yok kinmit kina tehwane yehwante, okinchipawalti ininyolme kimani yehwante taneltokak. ¹⁰Ashka, pates anmehwante amo antaneltokal in yewal ten Dyos okichi, pates kinchikawaltinik yehwante taneltokalme pa Kristo pa kineltokaske inik tahtolme kampa inik towichalme wan tehwane amoyok tikchiwal? ¹¹Ma yok tehwane titaneltokatikak kampa tikat takistiliste ka toyoliliste ka nita'ihniliste Tats Yehshwa wan yehwante niyok yok yeske takistiliste.

¹²Kwakin moshte amo nawatiloya, wan kikaktikatkaloya BarNabás wan Pawlos, in taketsaloya mochiten kichiwaya Dyos ka yehwante ka taneshtiliste wan tapololtiliste pa yehwante amo yudiyo'. ¹³Kwah tamik tahtok, Yakobo kinmili:

—Nonohniwan newal taneltokalme, shinishkakik: ¹⁴Shimón Petros otishtakichil kina Dyos okinihnil pa konanaskya sek ka yehwante amo yudiyo' wan yok niyok pa yeloskya nipweblo. ¹⁵Yok niyok okitok inik niTaketsalme nitahtolmeDyos, kina onka takwihkwilol:

¹⁶ Kwah tamiške panoske inik niwalmokwepas
wan oksep nikalchiwas nikal yewal owets Dawid;
wan nihwalkalchiwas yewal onka tashitinil,
wan oksep nihwalketsas,

¹⁷ kampa kitemoske moshte inik masewalme in TATS,
wan mochi inik pweblo', ika inik oyek tanotsalme ka
no'itokaliste yok kito in TATS yewal okichi inik
mochiten.

¹⁸ In okichi ya wEhka pa momatiskya pa kimani
omopewalti.

¹⁹Kampa nikito amo monek pa tikinchiwaltiske yehwante amo yudiyo' pa kinkawaske in kimatil kichiwal pa yok

kineltokaske Dyos. ²⁰Ma yok ma tikipahwilik se amat-takwihkwilol pa tikintahtaniske pa amo kikwaske tamakaliste yewal kintalilil i'ishpa inik dyose' tachiwal ka tal wan amo shimotekatiyak sek ka oksek ka yewal amo motawikal wan yewal amo mosiwa wan niyok amo shikwak nakat ka yolikilme yehwante oyek tasalolme, wan niyok amo shikwak yEste. ²¹Kampa NitanawatilMoshé momashtitiwal pa inik nityopalmeYudiyo' pa sesen pweblo wan momashtil pa mochi inik tonatmosewilyudiyo.

²²Kwakin in tatitanilme wan inik Abwelolme Wehwetsim, pa moshte in taneltokalme, sek ka yehwante okinonanak wan okintitanik pa Anti'okya inak Pawlos wan BarNabás. Ki'onanak Yudas yewal niyok itoka BarSabás wan Silas katkaloya takam wehwemonotsalme pa in tyop, ²³okichiwak se amat-takwihkwilol ka yehwante:

“Tehwante inik tatitanilme wan Abwelolme Wehwetsim, antimishtahpalotikat anmehwante tonohniwan amo yudiyo', wan yehwante mochantil pa Anti'okya, wan pa tal Sirya wan pa Kilikya. ²⁴Kampa tihmatik, kampa sek ka tehwanke kisak nika, wan oyak ka anmehwanke, tehwanke amo tikintitanik pa anmishmashtiske ashka anmehwanke amo ankimatil ten ankichiwaske pa anmoyoliliste. ²⁵Kampa yok kwal otikitak ka in tahtoliste, tikinonanak sek masewalme ika ka tehwanke otikintitanik pa anyaske anmichitaske anmehwanke, inak tonohniwan tatasotalme in taneltokalme BarNabás wan Pawlos, ²⁶inik yehwanke kitalik ininyoliliste pa kipololtiloskya ka ni'itokaliste toTats Yehshwa-Kristo. ²⁷Yok yewal antimishtitanilil in Yudas wan Silas, akyehwanke iselte taketsaske pa anmishmashtiske yok niyok. ²⁸Kampa tehwanke kwal tikitak in EspirituSanto wan tehwanke amo tikipahwalitiske pa antaneltokaske anmehwanke pa han kichiptyaske kina kito in amat amo shikilkawak in yewal ten kichiwal: ²⁹ta yok ankichiwal kwal, anmishyas amo shikwak in tamakaliste yewal kintalilil i'ishpa inik dyose' tachiwal ka tal, wan amo shikwak yEste, wan amo shikwak nakat ka yolikilme yehwante oyek tasalolme wan amo shimotekatiyak sek ka oksek ka yewal amo motawikal wan yewal amo mosiwa. Ma kwal anshiyek.”

³⁰Kwakin BarNabás, Pawlos, Yudas wan Silas oyak pa Anti'okya. Wan ompa monichikok moshte kishki yehwanke

taneltokalme wan kinmakak in amattakwihkwilol; ³¹ kwah kinmashtilik in amattakwihkwilol, pakiloya kinyolsewiya yok kina kitowaya in amattakwihkwilol. ³² Yudas wan Silas niyok katkaloya niTaketsalme nitahtolmeDyos, wEhka otahtotiyak ka ininnohniwan taneltokalme wan kinchikawaltiloya miyak. ³³ Mokawak sek tonatim ompa, kwakin okinkwepak ka sewiliste in ininnohniwan taneltokalme pa walmokwepaloskya inik yehwante kintitaniloya. ³⁴ Ma yok, Silas omoka mochantiti pa Anti'okya.^m ³⁵ Pawlos wan BarNabás, mokawak pa Anti'okya, tamashtiloya wan taketsaloya nitamashtiliste-Kwal Dyos inak in miyak oksek.

Pawlos wan BarNabás mosemanak

³⁶ Panok sek tonatim, Pawlos kili BarNabás:

—Ma tiyak tikinpashalok oksep in taneltokalme pa mochi inik Wehwepweblo kampa tikintakichilitinemil in nitahtolDyos, wan tikinmitaske kina kat.

³⁷ BarNabás kinekiya kinwikaskya inak yehwante Yuhanes, niyok itoka Markus; ³⁸ kili Pawlos kampa amokwal katka pa kiwikaloskya Yuhanes Markus ka yehwante kampa yewal okinka pa in mochital Panpilya wan amo kintokaya yehwante pa in tekipanoliste. ³⁹ Wan hyero mo'ahwak se ka okse; ka in kwalaniliste mosemanak. BarNabás kiwik Markus wan panotiyak pa se barko pa Kipros, ⁴⁰ Pawlos oki'onan Silas. Opanoti wan ininnohniwan taneltokalme kitahtaniloya ka nita'ihniliste Dyos pa kinkwitawiskya kwal, ⁴¹ panoloya pa in mochital Sirya wan Kilikya wan kinchiwaltiloya yehwante pa hanse taneltokatyaloskya in taneltokalme.

TimoTe'os kintokatiyaya Pawlos wan Silas

16 ¹ Asik Pawlos wan Silas pa Derbe wan pa Listera. Ompa katkaya se taneltokaya pa Kristo itoka TimoTe'os, nikon se siwat yudiya, nitats se takat gereko. ² Inik taneltokalme pa Kristo pa Listera wan pa Ikonyon, taketsaloya kwal ka TimoTe'os. ³ Yok Pawlos okinek okiwik inak yewal, ma yok okonan wan kikotonili nikwerit kaha mashishal kampa katkaloya

^m 15:34 In amatTakwihkwilolme kinkwihkwilok takwitap amo kikwihkwilok pa 34.

miyak yudiyo' pa inik pweblo', wan kimatiloaya kampa nitats TimoTe'os katka gereko. ⁴Kwah panoloya Pawlos wan Silas wan TimoTe'os pa inik Wehwepweblo' kampa kintakichililoaya inik taneltokalme kina mokawaloya ka in taketsaliste ka inik tatitanilme wan inik Abwelolme Wehwetsim pa Yerushalém, pa yok kichiptyaloskya. ⁵Yok masewalme taneltokalme kinchikawaltiloaya ininyolme ka in Tats Yehshwa, wan yok hanse tonatim mochiwaloya miyak taneltokalme.

**Tachiyaya kina tatimiktiyaskya Pawlos
kit se takat yoliya pa Makedonya**

⁶In EspirituSanto amo okinmakawalti pa kintakichililoskya nitahtol Dyos pa in mochital AsíYah. Ma yok, mopanoltik in tal itok Perígya wan in tal itok Galatiya ⁷kwakin asik pa in tal itok Misya. Kinekiloya yaloskya pa in mochital itok Bitinya, ma yok ni'espíritu Yehshwa amo okinmakawalti. ⁸Kwakin opanok hanse pa in tal itok Misya, wan temok pa Tro'as. ⁹Wan pa yowal Pawlos tachiyaya kina tatimiktiyaskya, okit se takat yewal yoliya pa in tal Makedonya, moketstikatka wan kitahtaniyaya miyak kiliyaya: “Shipan pa Makedonya wan shitishpale.” ¹⁰Kwah okit Pawlos in tachiyaya kina



© 1996 David C. Cook

Pa yowal Pawlos tachiyaya kina tatimiktiyaskya (16:10)

tatimiktiyaskya, haniman tiyaloya pa in tal Makedonya, tihmatik kampa Dyos tishnotsaya pa tikintakichililoskya in nitamashtilisteKwal ka yehwante pa Makedonya.

Taneltokaloya pa in mochital Lidya

¹¹Yok tipanotiyak pa barko pa Tro'as, wan otiyak hanse pa in tal onka ipanta pa in we'atTemtik itok Samotrake, pa mostatik ti'asik pa in Wepweblo Neá Polis. ¹²Wan ompa tikisak otiyak pa in Wepweblo Pilipos yewal onka se Wepwebloromano, yewal hyero wetanotsal pa ni'ipanta tal Makedonya. Ompa timokawak sek tonatim. ¹³Pa in tonatmosewilyudiyo tikisak pa kiyawak in Wepweblo, tiyak pa itenko atenko, ompa titamatiloya tikitaloskya kaha kwal tiktahtoltiloskya Dyos. Ompa nichikotikatkaloya sek siwam wan timotalik, tikpewaltik take-tsaliste inak yehwante. ¹⁴Katkaya ompa se siwat itoka Lidya, otakat pa in Wepweblo Tiyatira; kinamakaya shshalme yewal katkaya chichiltik hame tiltik yewal kitankwaketsaliyaya Dyos, wan tishkaktikatkaya; In Tats Yehshwa kimakawilti pa niyol nitaneltokaliste ka in ten yewal kitowaya Pawlos. ¹⁵Wan kimani oye takwatekil, wan moshte yehwante pa ini'icha yewal, otishtahtan miyak kitowaya:

—Ta anmehwante antamatil kampa newal melak nihneltok in TATS, shiwalak pa no'icha ompa shimosewik.

Wan otishtahtan miyak ka chikawaliste.

¹⁶Kwakin katkaya se tonat tiyaloya kaha kitahtaniloya Dyos, wan pa ot otiskis se siwatYankwik se tekipanol amo kitashtawililoya. In siwatYankwik, kipiyyaya se yehyekat amokwalⁿ yewal tanawatiyaya ten panoskya ka in poderoliste kitaniyaya miyak tomi pa kinmakaskya ininwetatakewan. ¹⁷Yewal tishtokatiyaya tehwan wan Pawlos, tsatsitiyaya, kitotiyaya:

—Inik takam yehwante nitekipanolme Dyos HyeroTakpak, wan yehwante anmishnawatitikat kina kwal anyeske takistiliste pa in poliwiliste.

¹⁸Yewal kichiwaya in pa miyak tonatim, kwakin okwalan Pawlos, wan walmomalin oki'ahwa in yehyekat amokwal kili:

ⁿ 16:16 In siwatYankwik kipiyyaya se yehyekat amokwal, mo'ishmatiya ka itokaliste Pitóm, in kinek kitos yewal tanawatiyaya ten panoskya ka in poderoliste.

—Ka ni'itokaliste Yehshwa-Kristo, nimichili shikis pa yewal.
Wan haniman in yehyekat okis pa yewal.

¹⁹Kimani okitak ininwetatakewalme in siwatYankwik kampa yahmo mochistiyaloskya pa kitaniloskya tomi kwakin kinkitskik, Pawlos wan Silas okinkwikak pa in plasa kaha kat-kaloya in masewalme pa ininishpa inik wehwetatakewalme.

²⁰Wan ompa kinwikak ka yehwante wehwetatakewalme Pawlos wan Silas, kitoloya:

—In takam, kat yudiyo', kichiptikat kwalaniliste ka toWepweblo, ²¹kimashtitikat kina kimatil kichiwal, kampa tehwan tehiromano onka tatasotal pa yok titaneltokaske wan tikchiwaske.

²²Kwakin moshte in masewalme okwalanik ka yehwante, wan in hwese' tatakewak pa kintsayanililoskya ininshashalme wan pa kinwitekiloskya ka barehon. ²³Kwah tamik kinwitekik, kinwikak pa in tatsakwal, wan kitakewak yewal takwitawiyaya pa in tatsakwal pa kinkwitawiskya kwal pa amo kisoskya. ²⁴Kwah kikak in tahtaniliste yewal okintsakwa pa wehkat kalitik, wan kinilpil ininikshiwam ka sek yewal kohkoyonki kaha kalakiloya ininikshiwam tachiwal ka kwawit.



Kwah tamik kinwitekik, kinwikak pa in tatsakwal, wan kitakewak yewal takwitawiyaya pa in tatsakwal pa kinkwitawiskya kwal pa amo kisoskya, wan kinilpil ininikshiwam ka sek yewal kohkoyonki kaha kalakiloya ininikshiwam (16:24)

²⁵Ma yok, pa ipanta yowal, kitahtolitikatkaloya Dyos Pawlos wan Silas wan kikantarolitikatkaloya Dyos, wan in oksek tatsakwalme pa kalitik kinkaktikatkaloya, ²⁶haniman hyero omolintal kampa ompa kalitik hyero omotamolin, haniman mo'ishtapok mochi tatapolilme, wan in tatsakwalme ninkadena motapok. ²⁷In nitakwitawil in tatsakwal o'is, wan okit inik tatapolilme pa in tatsakwal tapotikatkaloya, kwakin okikisti niteposte katkahan pa tipit pa momiktiskya, kampa tamatiya kampa inik tatsakwalme chololoya. ²⁸Haniman Pawlos okitsatsil kiliyaya:

—Amo shimomikti, kampa moshte nika tikat.

²⁹Otahtan in nitakwitawil in tatsakwal pa kwalikililoskya tawiliste, mo'isiwiltiyaya pa kalakiskya wan omotankwakets ka yoyokaliste pa nitankwa Pawlos wan Silas. ³⁰Haniman okinkisti pa kiyawak wan kintahtanili:

—Totatsim, ten nikpi pa nikchiwas pa niyes takistiliste pa in poliwiliste?

³¹Wan yehwante kilik:

—Shihneltok in Tats Yehshwa-Kristo wan tiyes takistiliste pa in poliwiliste, tewal wan moshte pa mo'icha.

³²Wan okintakichilik nitahtolmeDyos yewal wan moshte kishki ompa katkaloya ni'icha. ³³Wan haniman in yowal okinwik in nitakwitawil tatsakwal, okinpakil kaha tatikilme katkaloya, wan haniman mokwatekik yewal wan moshte kishki mochantiloya pa ni'icha. ³⁴In nitakwitawil kaha tatsakwalme okinwik pa ni'icha, wan okintalil takwal wan kipiyaloya pakiliste moshte pa ni'icha kampa ashka kineltokaloya Dyos.

³⁵Mostatik, in wehwetatakewalme okintitanik sek gwacho' ka nitakwitawil kaha kintsakwal ka in tahtolme. ³⁶In nitakwitawil kaha kintsakwal kinmili Pawlos wan Silas:

—Inik wehwetatakewalme tatakewak pa animishmakawas yok kwal shiyaptiyak ka sewiliste.

³⁷Ma yok Pawlos kinmili yehwante:

—Inik wehwetatakewalme tatakewak pa tishwitekiloskya pa ininishpa yehwante pa anmopweblo, amo tahtanik ta tikchiwak ten amokwal, kampa tikat romano', kwakin antishtsakwak wan ashka ankinekil pa tiyaske wan amoten tikitoske? Amoyok! Ma walak yehwante in wehwetatakewalme, ma tishmakawak yehwante.

³⁸Inik gwacho' kinnawatik inik wehwetatakewalme in ten yewal kito Pawlos kwah kimatik inik wehwetatakewalme kampa Pawlos wan Silas takatiloaya pa roma momaptik. ³⁹Yok oyak kaha Pawlos wan Silas, kintahtaniloaya pa kinihnililoskya kwakin kinkistik pa in kalitik kaha tsaktikatkaloya wan kintahtanik pa kisaloskya pa in Wepweblo. ⁴⁰Kwah kisak pa in kalitik kaha kintsakwal, kwakin oyak pa ni'icha Lidya, ompa kinmitak inik taneltokalme wan kinchikawaltiloaya miyak chikawaliste, kwakin opanotiyak.

Pawlos wan Silas pa TesaloNike

17 ¹Opanok Pawlos wan Silas in Wepweblo' ÁnfiPolis wan in Wepweblo Apolónya wan asik pa TesaloNike, ompa katkaya se inintyopYudiyo'. ²Kina kimatiya kichiwaya Pawlos, okalak pa nityopYudiyo yeshpa pa se tonatmosewilyudiyo, kintakechiliyaya ka yehwante ka in nitakwihkwilolisteDyos. ³Kinnawatiyaya kampa in nitakwihkwilolisteDyos kineshtiyaya kampa kipiyyaya pa panoskya takokoliste in Kristo wan pa mikiskya wan kipiyyaya pa yoliskya oksep. Kinmiliyaya: —In Yehshwa, yewal annimishmashtitik in yewal Kristo. ⁴Katkaloya sek yudiyo' yehwante taneltokaloya pa Kristo wan kitokaloya Pawlos wan Silas. Niyok taneltokaloya miyak masewalme gereko' yehwante kitankwaketsaliloaya Dyos, niyok myak siwam wehwemonotsalme. ⁵Ma yok inik yudiyo' amo taneltokaloya kipiyyaloya chawatiliste, wan kinonanak sek masewalme hyero momatil, ka yehwante kichiwak se tanichikol wan kichiwak kwalaniliste ka masewalme. Kwakin o'asik kalakik pa ni'icha Yasón, kintemotikatkaloya Pawlos wan Silas kinekiloya kinwikaloskya kaha tahosgaroloya pa in Wepweblo. ⁶Kina amo kinmitak Pawlos wan Silas kwakin kiwilantiyak Yasón wan sek ninihniwan taneltokalme, kinwikak pa ininshpa in wehwetatakewalme pa in Wepweblo, tsatsitiyaloya: —Inik takam walak kichiwak momiktiliste pa mochital wan ashka walak niyok kichiwak nika momiktiliste, ⁷moseptikat pa ni'icha Yasón wan amoyok kichiwak kina onka in takwihkwilol ka nitahtol in weRey Kaysar, kitol kampa onka okse weRey itok Yehshwa.

⁸Kwah kikakik in, in wehwetatakewalme wan in masewalme, hyero kwalanik. ⁹Okichiwak kampa Yasón wan inik

oksek ninohniwan taneltokalme, kipiyaloya pa tashtawaloskya kwakin kinmakawak.

Pawlos wan Silas pa in Wepweblo Beroya

¹⁰ Wan inik taneltokalme pa Kristo haniman tayopti okintitanik Pawlos wan Silas pa in Wepweblo Beroya. Kwah asik ompa, oyak pa nityopYudiyo. ¹¹ Yehwante in yudiyo' pa in tyop kipiyaloya ininta'ilnamikiliste kwal, amo katkaloya kina yehwante pa TesaloNike, hanse tonatim momashtiloya in nitakwihkwilolisteDyos pa kinekiloya kimatiloskya ta inik tahtolme katkaloya kina Pawlos kimashtiyaya. ¹² Kwakin myak ka in yudiyo' taneltokaloya pa Yehshwa, wan niyok miyak siwam gereka' wehwe monotsalme wan inintawikal. ¹³ Pa kimani kimatik inik yudiyo' ompa pa TesaloNike kampa Pawlos katkaya pa Beroya kimashtiyaya nitamashtilisteKwal Dyos, oyak niyok ompa kitoloya kampa amo melawak katka ten Pawlos kimashtiyaya, wan kichiwak pa kwalaniloskya inik masewalme. ¹⁴ Kwakin haniman in ninohniwan taneltokalme kititanik Pawlos pa yaskya pa in wehwe'atim, ma yok omoka Silas wan TimoTe'os ompa Beroya. ¹⁵ Yehwante yaloya inak Pawlos okiwikak pa in Wepweblo Aténa'. Kwakin Pawlos okinmil pa kinmililoskya Silas wan TimoTe'os pa mo'italoskya wan amo wehkawaloskya pa walaloskya pa Aténa' kaha katka yewal.

Pawlos pa Aténa'

¹⁶ Kwah Pawlos kinchishtikatka TimoTe'os wan Silas pa Aténa', okikok niyol kampa okit in Wepweblo katkaloya miyak mono' tachiwalme ka tal. ¹⁷ Yok, yewal kinnawatiyaya nitahtolmeDyos pa nityopYudiyo, wan ka inik yehwante kitankwaketsaliloya Dyos, niyok hanse tonatim kintakichiliyaya pa in plasa ka yehwante ompa katkaloya. ¹⁸ Wan sek momashtiloya nitamatiliste epikúreo wan estoyko', mo'onanalo-
loya inak Pawlos. Yehwante kitoloya:

—Ashka ten kinek kitos in taketsiyan?

Oksek kitoloya:

—Hanwel tahtotik ka in oksek dyose' pa oksek talme.

Kitoloya kampa Pawlos kimashtiyaya tanawatiliste ka tamashtilisteKwal ka Yehshwa wan kina yoliloskya oksep in

mihmihki. ¹⁹Kwakin okiwikak Pawlos, kaha monichikoloya kaha kintakichililoya in masewalme, kaha ta'itoka AreyóPago, wan kililoya:


—Tihnekil pa titichilis ka in yankwik tamatiliste yewal ti-taketstinem? ²⁰Kampa otichil tahtolme yahyankwik amo tihmatik tihkakit, amo'ik tihkakiloya, tihnekil tihmatiske inik ten kinek kitos.

²¹Wan moshte inik masewalme pa Aténa', wan inik mochantiloya pa oksek talme, hanse tonatim han amo ki-chiwaloya okse tachiwaliste han kikakiloya wan taketsaloya ka inik tachiwaliste yankwik.

²²Kwakin omokets Pawlos ipanta AreyóPago kaha yehwan-te monichikoloya pa taketsaloskya wan kinmili:

—Takam atenateko', newal nihmat kampa anmehwante hyero antaneltokal pa mochiten ankichiwal ka anmodyose'.

²³Kwah nipanowaya pa in Wepweblo, onikinmit moshte kaha ankinpiyal anmodyose' mono tachiwalme ka talme wan kaha kitalil tatamakal wan onikit se yewal ipa katka takwihkwilol in tahtolme: “In Dyos amo'ak ki'ishmat”. Anmehwante ankineltokal in Dyos yewal amo anki'ishmatil in yewal newal animishnawatitik.



© 1996 David C. Cook

*Kaha kitalil tatamakal wan onikit se
yewal ipa katka takwihkwilol in
tahtolme: “In Dyos amo'ak ki'ishmat” (17:23)*

²⁴Yewal in Dyos yewal okinchi in mochital wan mochten inik yewal kat. Yewal han TATS pa takpakllwikak wan pa in mochital, amo mochanti pa tyopalme tachiwalme ka nimahwam masewalme, ²⁵yewal amo kitishmonek pa kiteki-panoliske masewalme, hanwel moshte kinmak yoliliste, wan yehyekat wan mochten kinteshmonektiyas.

²⁶'Pa se han takat Dyos okichi moshte masewalme pa in mochital, okintake pa mochantiloskya pa kishki mochital wan okital Dyos kishki shiwim yoliloskya wan okital kaha mochantiloskya wan asiloya pa itehtenko in talme, ²⁷Dyos kinekiya kampa masewalme kitemoloskya wan kwal pa kitaloskya, melak Dyos amo wEhka onka ka tehwan. ²⁸Kampa pa yewal tiyolil, wan tinehnemil wan tikchiwal mochten inik; yok kito se ka in takwihkwilolme kilik: "Tehwanne melak ti'ikolinchim Dyos." ²⁹Ta tihmatil kampa tehwanne ti'ikolinchim Dyos, amoyok shitamatitiyak kampa kat diose' tachiwalme ka oro, ka plata ka tet, wan takopinalme tapahwilme inik kichiwak takam yok kina tamatiloaya kampa nesiloya, ³⁰Pa ya wehka in masewalme amo kimatiloaya kikakiloaya Dyos wan okinmakawalti pa kichiwaloskya kina kinekiyoaya yehwanne, ma yok ashka kinmili moshte pa mochtital shihkawak anmota'htakoliste wan shihkwepak anmoyol pa Dyos kina kinek. ³¹Yewal okital se tonat pa kinhusgaro moshte pa in mochital, wan kichiwas ipa in takat yewal ki'onan; wan oyol oksep kina se taneshtiliste pa moshte.

³²Kwah kintakichiliyaya Pawlos kikakik ka in yoliloskya oksep, sek kiwetskililoaya oksek kililoaya:

—Timishkakiske pa okse tonat.

³³Yok Pawlos okis ininishpa yehwanne pa in tanichikol.

³⁴Ma yok sek taneltokaloaya kina Pawlos kitowaya wan kitokatyaloya se ka yehwanne katkaya se itokaya Dionisyo, yewal katka se wetatakewan in AreyóPago, katkaya niyok se siwat itokaya Dámaris, wan katkaloya oksek ka yehwanne.

Pawlos ya pa in Wepweblo Korintos

18 ¹Otam omotachi in, Pawlos okis pa Aténa', oy pa in Wepweblo Korintos. ²Ompa okit se takat yudiyo itokaya Akwila, yewal otakatiya pa in mochital itokaya Pontos. Wan yoliya pa in tal itokaya Italya, kipiyoaya sek

tonatim ompa Italya wan nisiwa Periskila walak mochantik pa Korintos walak pa Korintos kampa in weRey itok Kela'udyus otatake pa kisaloskya moshte in yudiyo' pa in Wepweblo Roma. Yok Pawlos kinpashalowaya Akwila wan Periskila ³kampa yehwante kimatiloaya kichiwaloya in tekipanoliste yewal niyok kimatiya Pawlos, kimatiloaya kitsomaloya shashal tilawak kwakin Pawlos omoka tekipanotik inak Akwila. ⁴Wan mochi inik tonatim pa in tonatmosewilyudiyo, Pawlos kintakichiliyaya pa nityopYudiyo ka in yudiyo' wan yehwante gereko'.

⁵Kwah Silas wan TimoTe'os walaloya pa Makedonya, Pawlos pa hanse tonatim kintakichiliyaya nitahtolmeDyos in yudiyo' kampa Yehshwa melawak katka in Kristo. ⁶Ma yok kimani inik yudiyo' kinankililoaya yewal wan hyero kililoaya, kwakin Pawlos kitsehtsel nitakemtil kina inintachiwaliste in yudiyo' kampa kichiwaloya amokwal, kinmili:

—Ashka ta Dyos anmishtakokolti anmehwante ankipiyaske tateshpawiliste wan amo newal. Wan ashka niyas nikinnawatis yehwante amo yudiyo'.

⁷Kwakin okis Pawlos pa nityopyudiyo wan opanoti pa ni'icha se itok Tityus Yustus yewal kitankwaketsaliyaya Dyos wan mochantiyaya seladit kaha nityopYudiyo'. ⁸Wan niweRey nityopYudiyo' yewal itokaya Kerispus okineltok in TATS yewal wan moshte pa ni'icha. Niyok taneltokaloya myak masewalme pa Korintos wan oyek takwatekilme. ⁹Pa se yowal in TATS kili Pawlos tachiyaya kina tatimiktiyaskya:

—Amo shimomapti; tewal shikintakichiliti wan amo shihka pa titahtos. ¹⁰Kampa newal ni'onka ka tewal. Amo'ak kwal pa mishkitskis pa mishkokoltis, kampa pa in Wepweblo kat miyak yewal nishneltokal.

¹¹Yok omoka mochantiti Pawlos ompa pa se shiwit wan chikwase mestim, kimashtininem nitahtolDyos.

¹²Kwah Galyón reynarowaya pa in mochital itok Ahaya, wan sek yudiyo' kikwalanililoaya Pawlos. Wan okiwikak kaha monichikoloya pa tahusgaroloya ¹³kitoloya:

—In takat kinmashtitik masewalme kina monek pa kitahtol-tiske Dyos, ika yewal kina kito totanawatiliste yewal tikpiyal.

¹⁴Pawlos kinek tahtoskya kwah Galyón okintakichil yoke inik yudiyo':

—Newal annimishkakiskya anmehwante yudiyo' ta kitastiyaloskya se taketsaliste amokwal ta kichiwaskya se tamiktiliste; ¹⁵ma yok in ten anmehwante ankitotikat hanwel kat tahtolme, wan itokalme wan inik anmoselte anmotahtolme yewal ankipiyal, shimotalik ka se tahtoliste anmehwante newal amo nihnek pa niyes se hwes ka inik mochten.

¹⁶Kwakin Galyón otatake pa kinkistiloskya in yudiyo' ompa kaha monichikoloya kaha tahusgaroloya. ¹⁷Kwakin moshte kikitskik SóStenes, in yewal niweRey in tyopYudiyo', wan okiwaltehtewik ininishpa kaha monichikoloya kaha tahusgaroloya. Ma yok Galyón amoten tamatiya.

Pawlos walmokwepaya pa Anti'okya

¹⁸Ompa omoka Pawlos myak tonatim ka ninohniwan taneltokalme pa Korintos kwakin opanoti, okonan se barko pa Sirya, inak in Periskila wan Akwila. Asik pa Kenkereya, ompa omoshim Pawlos kampa kichiwaya melawak kina kiliyaya Dyos. ¹⁹Wan asik pa Epesos, Pawlos okinka ompa Akwila wan Periskila, wan okalak Pawlos pa nityopYudiyo' ompa kintakichiliyaya nitahtolDyos in yudiyo'. ²⁰Kwah yehwante kitahtaniloaya pa mokawaskya Pawlos oksek tonatim ka yehwante, wan yewal amo kinek. ²¹Kwah yayaptiyaya Pawlos kinmili:

—Ta Dyos kinek; oksep niwalas nika ka anmehwante.

Kwakin okis pa Epesos pa se barko. ²²Kwah o'as pa Kaysareya, oy pa Yerushalém pa kintahpaloskya inik taneltokalme, kwakin opanoti pa Anti'okya. ²³Omoka sek tonatim ompa, oy okinpashal sesen pa sesen kaha monichikoloya inik taneltokalme pa in tal Galatiya wan in tal Perígya, kinchikawaltiyaya pa ininyolme moshte inik taneltokalme pa Kristo.

Apólos pa Epesos wan pa Ahaya

²⁴Wan katka se takat yudiyo itoka Apólos, yewal takatiya pa in Wepweblo Alesandríya. Yewal kimatiya tamashtiyaya kwal niyok kimatiya kwal nitakwihkwilolisteDyos owal pa Epesos. ²⁵In Apólos katka taneshtilil pa ni'ot in TATS, wan taketsaya ka miyak pakiliste wan tamashtiyaya melawak in mochten ipa Yehshwa, hanwel kimatiya nitakwatekiliste Yuhanes. ²⁶In Apólos okipewalti taketsaliste

pa nityopYudiyo', amo momaptiyaya. Kwah okikak Periskila wan Akwila, kwakin okiwikak oksela pa kimatiskya kwal yewal ten kinek kitos ni'ot Dyos yewal ayamo'ok kwal kimatiya. ²⁷Kwah Apólos kinekiya panoskya pa in tal Ahaya, in ninohniwan taneltokalme pa Kristo kichikawaltiloya wan kinkwihkwiloliloya se amatTakwihkwilol ninohniwan taneltokalme yehwante mochantiloya ompa pa Ahaya kinmili-loya pa kinamikiloskya Apólos ka pakiliste. Kimani o'as pa Ahaya, okinpale miyak yehwante ka nita'ihniliste toTats inik taneltokaloya, ²⁸Apólos mo'onanaya ka tahtolme ka in yudiyo' kinneshtiliyaya nitakwihkwilolisteDyos ininishpa moshte kampa Yehshwa katka in Kristo.

Pawlos pa in Wepweblo Epesos

19 ¹Kwah katkaya Apólos pa Korintos, Pawlos opan in tepetLom wan o'as pa Epesos, kampa okinmit miyak yehwante taneltokalme pa Kristo. ²Wan kintahtanili:

—Anmehwante ankitenamikik in EspirituSanto, kimani antaneltokak pa Dyos?

Yehwante kinankilik:

—Amo'ik tihkakil ta onka se EspirituSanto.

³Wan Pawlos kintahtanili:

—Wan ten takwatekiliste ankonanak anmehwante?

Wan yehwante tanankilik:

—Pa nitakwatekiliste Yuhanes.

⁴Pawlos kinmili:

—Yuhanes kinmiliyaya masewalme pa mokwatekiloskya pa kinmitaloskya kampa yehwante yahmo kinekiloya kichiwaloskya ten amokwal yok kineshtiloskya kampa kikwep-tikatkaloya ininta'ilnamikiliste wan kineshtitikatkaloya kampa kikwep-tikatkaloya ininyolme pa Dyos ka inintachiwaliste kwahkwalm. Kinmiliyaya masewalme pa kineltokaloskya yewal walaya takwitap ka yewal, in kinek kito in Yehshwa.

⁵Kwah kikakik in, oyek takwatekilme pa ni'itokaliste in TATS Yehshwa; ⁶kwah kintalili Pawlos nimahwam ipa yehwante, in EspirituSanto owal ipa yehwante wan kipewaloya tahtolme ka oksek tahtolme yewal amo kimatiloya tahtoloya wan taketsaloya nitahtolmeDyos. ⁷Katkaloya moshte kina 12 takam.

⁸Okalak Pawlos pa nityopYudiyo' ompa yewal kintakichiliyaya nitahtolmeDyos pa yey meste, amo tamakasiyaya wan kinnawatiyaya kina reynarowaya Dyos. ⁹Ma yok sek kichikawaltik ininyolme pa amo kineltokaloskya in tahtolme. Hanwel pa ininishpa in masewalme kipewaloya taketsaliste amo kwahkwalmelme inak ni'ot Dyos. Kwakin Pawlos okinka yehwante, wan okinwik inik nimoneshtililme pa ni'eskwela se yewal itokaya Tiranos, wan pa hanse tonatim kimashtiyaya nitahtolmeDyos. ¹⁰Yok oye Pawlos pa ome shiwim, kampa yok moshte kishki ompa mochantiloya pa AsíYah, inik yudiyo' wan niyok inik gereko' kikakiloya nitahtolmeDyos in TATS. ¹¹Dyos kichiwaya wehwe taneshtiliste ika ka ininmahwam Pawlos, ¹²in masewalme kinwikaloya miyak paño' wan shahsalme yewal Pawlos kinkitskiyaya wan kintalililoya ipa kokoshkim, yehwante pahtiloya niyok yehwante kipiwaloya yehyekatim amokwahkwalmelme kisaloya pa yehwante.

¹³Wan niyok katkaloya sek yudiyo' amo motaliloya, yehwante kinkistililoya yehyekatim amokwahkwalmelme kinakiloya tanotsaloskya ka ni'itokaliste in TATS Yehshwa, kitoloya: —Annimishtake ankisaske ka ni'itokaliste Yehshwa, in yewal Pawlos tamashti.

¹⁴Yehwante katkaloya chikome ininpilwam se yudiyo itokaya Eskéwa, yewal katka se ka in TotatsimWehwe. ¹⁵Pa se tonat in yehyekat amokwal kinnankili:

—Melak in Yehshwa nikishmat, wan niyok nikishmat in Pawlos; ma yok anmehwante, ak anmehwante pa yok annichilitikat?

¹⁶Wan in takat yewal kipiwaloya in yehyekat amokwal, otsikwin ipa yehwante wan omomikti ka miyak chikawaliste moshte takam kisaloya pa in kal katkaloya nakatilme wan takokoltilme. ¹⁷Kimani omomat in, pa moshte in yudiyo' wan in gereko' yehwante ompa mochantiloya pa Epesos, momaptiloya moshte yehwante wan yok katkaya tanotsaliste we ni'itokaliste in TATS Yehshwa.

¹⁸Wan inik myak yehwante taneltokaloya pa Yehshwa asiloya wan motapohpowililoya ininta'ihetakoliste in ten yewal kichiwaloya, ¹⁹wan myak katkaloya yehwante kichiwaloya tashoshaliste kinnichikok ininamamtakwihkwilolme, kinchichinoloya ininishpa moshte; kimani kinpowak kishki



© 1996 David C. Cook

*Myak katkaloya yehwante kichiwaloya
tashoshaliste kinnichikok ininamantakwihkwilolme,
kinchichinoloya ininishpa moshte (19:19)*

kostaroloya inik amattakwihkwilolme, wan hame katka 50 mil tomiPlata. ²⁰Mochiptiyaya ka miyak chikawaliste nitahtolme in TATS wan myak masewalme taneltokatiyaloya.

²¹Kwan opan in, Pawlos okital ni'espiritu pa kimani panowaya pa in talme Makedonya wan Ahaya, pa yaskya Yerushalém. Kitowaya kwah niyas pa Yerushalém, niyok monek pa niyas niktas in Wepweblo Roma. ²²Kwakin okintitan pa Makedonya ome nitapalewilme, TimoTe'os wan Erastos, wan Pawlos mokawaya sek tonatim pa in tal AsíYah.

Mokwalantiloya pa in Wepweblo Epesos

²³Pa inik tonatim katkaloya sek masewalme yehwante hyero kichiwaloya ika ni'ot in TATS, ²⁴katka se itoka Demetriyos, yewal kinchiwaya takopinalme ka plata yewal nesiloya kina in se tyopWe kaha kitankwaketsaliloya in dyosa Artemis, wan miyak tomi kitaniloya moshte kishki tekipanoloya inak yewal. ²⁵Kwakin okinnichik ka oksek yehwante kichiwaloya in tekipanoliste, wan kinmili:

—Takam, ankimatil kina miyak tomi tiktanil ka in tekipanoliste yewal tikchiwal; ²⁶kina ankitak wan ankikakik yewal in Pawlos pek kintakichilitinem kampa in dyose' tachiwalme ka takam amo dyose'; wan yok myak masewalme taneltokaloya, amo hanwel nika han pa Epesos hanwel pa mochi kishki tal AsíYah. ²⁷Wan amo hanwel onka poliwiliste pa in totekipanoliste, hanwel niyok tami niwetanotsal pa nityopWe in wedyosa Artemis onka pa se poliwiliste in kal kaha kitankwaketsalil moshte yehwante pa AsíYah wan pa mochi kishki tal.

²⁸Kwah kikakik in, hyero mokwalantik, wan tsatsiloya:

—Ma ye we in Artemis nidyosa in Epesos!


²⁹Pa haniman in Wepweblo moshte masewalme hyero kichiwaloya, yok moshte oyak pa in weKal te'atro, wan kiwilanaloya Gayus wan Aristarko', in omente takam pa Makedonya yehwante yaloya inak Pawlos. ³⁰Wan Pawlos kinekiya kalakiskya pa tahtoskya ka in masewalme, ma yok in moneshtililme amo kimakawaltik. ³¹Wan niyok sek ka ininmasewalme in wehwetatakewalme pa in tal yewal katkaloya ninihniwan Pawlos, kititanilik sek tahtolme, kitahtaniloya pa amo kalakiskya pa in wekal te'atro. ³²Wan katkaya miyak taketsaliste pa in tanichikoliste kaha motahusgarowaya, sek

tsatsiloya se tachiwaliste wan noksek oksek tachiwaliste, wan myak masewalme amo kimatilo ya pates ompa nichikotikatka-loya. ³³Ma yok sek yehwante katkaloya itsala masewalme taketsaloya kina takatkaya pa in taketsaliste ka Alesandros, akyewal inik yudiyo' kitopewaloya pa yaskya ta'ishpa ka moshte. Alesandros kichiwaya taneshtiliste ka nimahwa pa amo nawatitiyaloskya, kinekiya tahtoskya pa kinpalewiskya ni'ishpa in masewalme. ³⁴Ma yok kwah kimatik kampa yewal katka yudiyo, moshte tsatsiloya pa se tahtol kina pa ome ora kitoloya:

—Ma ye we in Artemis pa in Epesos!

³⁵Kwakin owal yewal kinkwihkwilo in امام ka in wetatakewan, kinyolsewi in masewalme, kinmili:

—Takam epeseyo', moshte ankimatil kampa in Wepweblo Epesos yewal kikwitawi in wetyop ka in dyosa Artemis, wan in takopinal yewal walwets pa in takpakllwikak. ³⁶Amo'ak kwal kitos kampa in amo melawak, ma yok simoyolsewik wan shihmatik kwal ten ankinakil ankichiwaska. ³⁷Pates ankinwalikak inik takam, yehwante amo ta'ishtikiyanilme pa inik tyopalme wan amoten kitol ka nityop todyosa tehwan. ³⁸Ma yok, ta Demetriyos wan inik yehwante tekipanol inak yewal



© 1996 David C. Cook

*In wetatakewan pa in Wepweblo Epesos
kinyolsewi in masewalme (19:35)*

kipiyal tateshpawiliste ika pek ak, kampa kat hwese' wan kaha motahusgaro'; shiyak wan shiktenewak moteshpawiliste sek ika oksek. ³⁹Ta ankipiyal oksek tachiwaliste pa kitenewaske, niyok monek pa yes tatenewiliste ompa kaha monichikol inik tatakewalme pa in Wepweblo; ⁴⁰ka in ten opan ashka, tikpiyal tamaptiliste kampa tiyeske ka tateshpawiliste kampa tikchiptikat se momiktiliste we, kampa amo tikpiyal ten tikitoske ika ka in we kwalaniliste ka in masewalme.

⁴¹Kwah otam okinmil in, oyek tatamiliste inik taketsaliste pa in tanichikoliste kaha motahusgarowaya.

Pawlos yawiya pa Makedonya wan pa Gerékya

20¹Kwah moyolsewiloya ka ininkwalaniliste in masewalme, Pawlos okinnots in taneltokalme pa Kristo wan haniman kinchikawalti; kwakin okintahpal yehwante wan opanoti pa Makedonya. ²wan panowaya pa inik talme kinchiwalityaya kishki taneltokaloya pa Kristo, kwakin o'as pa Gerékya. ³Ompa omoka pa yey meste, han tipik katka pa takisaskya pa se barkit pa in tal Sirya, ma yok sek yudiyo' kinakiloya pek ten kichiwililoskya ika yewal. Kwakin otamat pa mokwepaskya pa Makedonya. ⁴Pawlos kitokatiyaloya yehwante Sópater, in nikon Piros yewal otakat pa Beroya, wan niyok Aristarko' wan Segundo yewal otakat pa tesalonikense, wan Gayus yewal otakat pa in Wepweblo Derbe, wan Timo-Te'os, wan niyok ka Pawlos yaloya Tíhiko' wan Trópimos yewal otakatik pa in tal AsíYah. ⁵Wan inik ta'ishpa oyak ka tehwanete wan tishchishtikatkaloya pa in Wepweblo Tro'as. ⁶Wan tehwanete, otiyak pa se barko pa in Wepweblo Pilipos kwah otam mitotiliste nitonatilme kwah kikwal pan yewal amo kipi taposhawalti, wan pa makwil tonatim timo'itak ka in noksek pa Tro'as, kampa timokawak ompa chikome tonatim.

Pashalo Pawlos pa Tro'as

⁷In ta'ishpa tonat ka in chikomeTonatim timonichikok moshte pa tikwaloskya nitakwaliste tyotak in toTats. Wan Pawlos kinmashtiyaya in taneltokaloya pa Dyos, kina mostatik kisaskya yok okintakichiliti pa ipanta yowal. ⁸Tikatkaloya tanichikolme pa se kalitik takpak, wan katkaloya myak tawiliste; ⁹wan se takatYankwik itoka Ewtikos, yewal yowatikatka

pa se bentan, okipewalti kochmikiliste. Kina Pawlos wehkap-tikatmaya ka nitaketsaliste, wan moka hyero koshtik wan owets pa in bentan, katmaya takpak pa yey kahkalito, wan oyak oki'ahkokik, katmaya mihke. ¹⁰Ma yok otem Pawlos, omotankwakets, okinapal. Wan kinmili:

—Amo shimomaptik; kampa yewal yoltik.

¹¹Wan oksep oteho Pawlos; okishel in pan, wan otakwa yok okintakichiliti pa mochi yowal pa tahtaneshti, kwakin panoti. ¹²In takatYankwik kiwikak, yolki icha wan moshte mochikawaltiloaya miyak.

Kisaloya ompa Tro'as pa yaloskya pa Miletos

¹³Tehwante otiyak ta'ishpa pa se barko pa Asón kampa ompa timo'italoskya inak Pawlos yewal kinekiya mowikaskya pa in tal wan yok asiskya Asón. ¹⁴Wan kimani otishnamik Pawlos ompa pa Asón, otihwikak ka tehwante pa in barko, otiyak pa Mitilene. ¹⁵Wan mostatik otikisak ompa pa in barko wan ti'asik pa ta'ishpa Kíyos, wan pa okse tonat oti'asik Samos. Wan in okse tonat oti'asik pa Miléto'. ¹⁶Kampa Pawlos hanse kinekiya panoskya pa Epesos wan amo kinek mowehkawal-tiskya pa in tal AsíYah, kampa kipiayaya isewiliste pa asiskya pa Yerushalém pa nitonat itok Pentekostés.

Pawlos kintakichili nitahtolme Kristo in Abwelolme Wehwetsim taneltokaloya pa Epesos

¹⁷Kwah katkaloya pa Miléto', Pawlos tatake pa kinnotsaloskya inik Abwelolme Wehwetsim pa in tanichikolme taneltokalme Epesos, ¹⁸kimani asik ka yewal kinmili:

—Anmehwante ankimatil kina niyoliyaya pa kimani oni'as pa AsíYah wan ankitak kina nimochantiyaya mochi inik tonatim kimani nikatmaya ka anmehwante. ¹⁹Niktekipanoli amo ka tashtawaliste in TATS ka mochi noyol amo we nitamatiya wan nichokaya, wan nipanowaya takokoliste yewal kineki-loya nishchiwililoskya in yudiyo'. ²⁰Ankimatil kampa amo nimokawaya pa annimichiliskya ten yewal katka kwal pa anmehwante, hanwel nihmashtiyaya taketsaliste ininishpa masewalme wan pa kalme. ²¹Nikinmiliyaya moshte yudiyo' wan yehwante gereko' kichiwaloskya ten kwal pa kineshtiloskya kampa kikweptikatkaloya ininta'ilnamikiliste wan

kineshtitikatkaloya kampa kikweptikatkaloya ininyolme ka Dyos ka inintachiwaliste kwahkwalmé wan pa taneltokaloskya pa toTats Yehshwa. ²²Wan ashka, shikitak, nishtitantik in EspirituSanto pa niyas pa Yerushalém, wan amo nihmat ten yewal nishpanos ompa. ²³In hanwel nihmat kampa pa mochi Wepweblo' in, EspirituSanto nichili melak kampa nishchiyal tatsakwaliste wan tayolkokoliste. ²⁴Amoten nitamat ta monek pa nimikis hanwel nihnek pa nitamis nikchiwas in tekipanoliste yewal in Tats Yehshwa onishtake pa nikinmilis nitamashtilisteKwal ka in ta'ihnili pa Dyos.

²⁵Ashka nihmat kampa amo'ak ka anmehwante, ika aki nirehnemtinem pa nikintakichilitinem nitamashtilisteKwal ka nireynaroliste Dyos, nihmat kampa yahmo annichitaske. ²⁶Kampa yok, ashka animichili anmehwante, kampa newal amoten nikpi ika anmehwante ta pek ten anmishpan, ²⁷kampa animishmashti nitahtolmeDyos mochi kina Dios, kinek pa ankichiwaske anmehwante. ²⁸Yok, shimokwitawik anmehwante anmoselte, wan shikinkwitawik inik taneltokalme pa Kristo. Shikilnamikik kampa in EspirituSanto anmishmak in tekipanoliste kina wehwetatakewalme pa in masewalme, pa ankinkwitawiske moshte yehwante Dyos okinkisti pa in poliwiliste ipa niyEste nikon. ²⁹Newal nihmat kwah nipanotiyas, walaske oksek masewalme kalakiske pa in tani-chikol wan kina koyom kinekiske kintamiske inik borrego'. ³⁰Wan ka anmehwante moselte yeske masewalme yehwante tamashtiske ka takwamanaliste, wan inik moneshtililme kintokaske yehwante. ³¹Yok shitachishtiyak, shikilnamikik kampa pa yey shiwim pa tahka wan tayo, ka chokaliste, amo nimomakawaya pa animishtakichilitiyas kina kwal ammochantiloskya.

³²'Wan ashka animishka anmehwante inak Dyos wan ka nitaketsaliste ka nita'ihniliste, yewal kipi chikawaliste pa anmishpalewis wan anmishmakas takawaliste ka moshte inik nita'onanalme nitekipanolme Dyos. ³³Amo'ik onihnek amo'ak nitomiPlata nitomiOro nishashal pa amo'ak; ³⁴anmehwante moselte kwal ankimatil kampa ka in nomahwam nitekipanowaya pa nihkowaskya ten nishteshmonekiya wan niyok in yehwante katkaloya nonawak. ³⁵Hanse animishneshtil kampa monek pa antekipanoske wan ankinpalewiske

yehwante kintateshmonek, shikilnamiktiyak nitahtolme in Tats Yehshwa: “Kipi miyak pakiliste se yewal timak, amoyok kipi in se yewal konan.”

³⁶Wan otam okinmil in, omotankwakets Pawlos ka moshte yehwante wan okitahtolti Dyos. ³⁷Wan chokaloya moshte, kinapaloloya Pawlos wan kitenamikiloya. ³⁸Moyolkokotikatkaloya kampa Pawlos kinmiliyaya yahmo kitaloskya nishayak oksep. Kwakin oyak okikawak Pawlos pa in barko.

Pawlos ya pa Yerushalém

21 ¹Wan kimani otipanotiyak ka yehwante otitehkok pa barko, wan otiyak melahka pa in wehwe'atim itok Kos, wan mostatik tiyak pa Rodas wan ompa pa Pátara. ²Kampa ompa tikitak se barko yewal yawiya pa in tal Poynikya wan otitehkok pa yewal. ³Kwah ompa tipanoloya otikitak in tal tipichi ipanta wehwe'atim itok Kipros, wan tikpanawililoya in tal pa nimahwamapoch otiyak hanse pa Sirya wan ompa oti'asik pa in tal wehwe'atim Tiros kaha kitatimowililoskya in barko. ⁴Wan ompa tikinmitak in moneshtililme wan timokawak ka yehwante pa chikome tonatim. Yehwante ika in EspirituSanto, kililoya Pawlos pa amo yaskya Yerushalém. ⁵Kwah panok sek tonatim, otipanotiyak wan otimowikak pa to'ot. Moshte moneshtililme ka ininsiwam wan ininpilwam, yaloya tishkawaloya pa kiyawak in Wepweblo, wan ompa pa itenko in wehwe'atim, timotankwaketsak tiktaholtik Dyos. ⁶Kwah titamik timotahpalok sek ka oksek, wan otitehkok pa in barko wan yehwante mokwepak pa ininicha.

⁷Kwakin tehwan timowikak pa in barko pa Tiros wan oti'asik pa Tolemays, wan ompa tikintahpalok inik tonihniwam taneltokalme wan timokawak ka yehwante se tonat. ⁸Pa mostatik otikisak otiyak pa Kaysareya. Wan timokawak pa nikal Pilipos in taketsaya tamashtilisteKwal, yewal ye se ka in chikome takam tekipanolme. ⁹In Pilipos kinpiyaya nawi ininpilwaSiwam ayamo monamiktiloya, yehwante take-tsaloya nitahtolmeDyos. ¹⁰Tikpiyaloya miyak tonatim, o'as se takat yewal mochantiyaya pa Yudaya se yewal niTaketsal nitahtolDyos itokaya Ágabos, ¹¹kwah o'as ka tehwan okonan in ka mokwehtiyaya Pawlos, omo'ilpi pa nikshiwam wan nimahwam, wan kito:

—Yok kito in EspirituSanto: yok ki'ilpiske in takat yewal niyashka in ka mokwehtil yok ki'ilpiske pa Yerushalém wan kitemakaske ka yehwante amo yudiyo'.

¹²Wan kimani tihkakik in, miyak tiktahtanik tehwan wan yehwan ompa katkaloya pa amo yaskya pa Yerushalém. ¹³Kwakin Pawlos tanankili:

—Pates anchokatikat wan kiyolkokoltitikat noyol? Newal melak nimochika amo han pa nishilpiske, hanwel niyok pa nimikis pa Yerushalém ika ni'itokaliste in Tats Yehshwa.

¹⁴Kina amo okinek otishkak, kwakin tihkawak wan tikilik: —Ma ye kina kinek in TATS.

¹⁵Kwah panok sek tonatim, kwah tikpiyaloya ten motesh-monekiskya pa ot otiyak pa Yerushalém. ¹⁶Niyok ka tehwan yaloya sek moneshtililme taneltokalme yewal mochantiloya pa Kaysareya, yehwan tishwikak pa ni'icha se itok Menasón, kampa timokawaloskya in otakat pa Kipros in tal ipanta pa in wehwe'atim yewal kipiyya miyak shiwim pa in taneltokaliste katka se ka in moneshtililme.

Pawlos kipashalo Yakobo

¹⁷Kwah ti'asik pa Yerushalém, tonohniwan taneltokalme tishnamikiloya ka pakiliste. ¹⁸Pa mostatik, Pawlos oy tonawak pa tikitaloskya Yakobo, wan moshte Abwelolme Wehwetsim ompa katkaloya ka Yakobo. ¹⁹Kwah otam okintahpal Pawlos okintakichil mochiten yewal okichi Dyos ka nitekipanoliste ika yehwan amo yudiyo'. ²⁰Kwah kikakik, kitoloya tahtolme wehwe pa Dyos. Kwakin kililoya Pawlos:

—Tonihni, tewal tikit kishki miles ka yudiyo' kat yewal ashka taneltokal pa Kristo, wan moshte yehwan tamatik kampa motishmonek pa kichiwasse kina kito Nitanaawatil-Moshé. ²¹Wan yehwan otakakik kampa tikinmashti moshte inik yudiyo' yehwan mochantil ika inik amo yudiyo' pa kikaske NitanaawatilMoshé, wan amo kipiyaloskya takotonili nikwerit kaha mashishal ininpilwam, yahmo monek pa yok kichiptiloskya inik tachiwaliste. ²²Ashka ten tikchiwaske? Moshte in yudiyo' yehwan taneltokal pa Kristo kimatiske kampa ashka otival. ²³Yok shikchi in yewal timichiliske: Kat ka tehwan nawi takam taneltokalme yewal kichiwak se tahtoliste ka Dyos ashka kipiyal pa tamiske kichiwasse

tatinewiliste ka Dyos. ²⁴Tewal shikinwik in masewalme, shimopohpo inak yehwante wan shitashta, pa yok yehwan-te moshimaske. Yok kimatiske in yudiyo' kampa in yewal momashtik nahtewal amo melawak, hanwel kampa tewal niyok tihneltokatik NitanawatilMoshé. ²⁵Pa kishki in amo yudiyo' yehwante taneltokal pa Kristo, tehwan-te tikintitanilik se amatTakwihkwilol pa amo kikwaske tamakaliste yewal kintalilil i'ishpa inik dyose' tachiwal ka tal, wan niyok amo shikwak yEste, wan niyok amo shikwak nakat ka yolikilme yehwan-te oyek tasalolme, wan amo shimotekatiyak sek ka ok-sek ka yewal amo motawikal wan yewal amo mosiwa.

Kikitskik Pawlos pa in tyopWe

²⁶Kwakin Pawlos mostatik okinwik in nawi takam, wan omopohpo kina se yudiyo kwah kichi se tahtoliste ka Dyos kwakin okalak pa in tyopWe pa kinnawatiskya in totatsim kishki tonatim yeloskya pa tamiloskya ka in tapohpowaliste wan kichiwaloskya in temakaliste pa sesen ka yehwan-te.

²⁷Kwah monamiktiyaloya inik chikome tonatim, sek yudiyo' yehwan-te mochantiloya pa in tal AsíYah walaloya ka Pawlos pa in tyopWe wan kinkwalantiloya in masewalme. Kikitskik Pawlos ²⁸tsatsitikatkaloya:

—Nimasewalme Isra'El, shitishpalewik! Ina yewal in se takat yewal nihnemtik pa kaha han kinmashtitik in masewalme inik ten amokwal ika topweblo, pa amo kineltokaske Nitanawatil-Moshé wan ika in tyopWe; niyok ashka okinwalik pa in tyopWe sek takam gereko', wan takatsawaltitikat pa in tatasot tyopWe.

²⁹Kampa in kitoloya ompa kitaloya in Trópimos, in Epe-sos, pa in Wepweblo Yerushalém inak Pawlos wan tamatiloya kampa Pawlos kikalaktiya pa in tyopWe.

³⁰Moshte masewalme monichikoloya, motaloloya wan kikitkiloya Pawlos wan kiwilanaloya pa kiyawak in tyopWe, haniman kintsakwak inik tatapolilme. ³¹Kwah tipit katka pa kimiktiloskya, kimani in niwetatakewan ka 600 gwacho', pa Roma okinawatik kampa moshte inik masewalme kwalantikatkalo-ya pa Yerushalém. ³²Kwakin haniman okinonan sek gwacho' wan sek niwetatakewalme gwacho' wan motaloloya kaha katkaloya inik masewalme. Kwah okitak in we kapitan ka 100 igwacho' wan iningwacho', kwakin inik masewalme



© 1996 David C. Cook

Tipit katka pa kimiktiloskya Pawlos, kimani in niwetatakewan in gwacho', pa Roma okinawatik haniman okinonan sek gwacho' wan sek niwetatakewalme gwacho' wan motaloloya kaha katkaloya in masewalme (21:32)

okimakawak Pawlos yahmo kitehtewiloya. ³³Kwakin omo'asilti in wetatakewan ka Pawlos, okikitski wan otatake pa ki'ilpiloskya ka ome kadena. Kwakin otahtan kampa akyewal katka wan ten okichiwaya. ³⁴Ma yok sek tsatsiloya sek tahtol wan noksek okse tahtolme, wan kina in wetatakewan amo kimatiya melak pates tsatsitikatkaloya yehwante, kwakin kinmili nigwacho' pa kiwikaloskya Pawlos pa kalitik ininkalme in gwacho'. ³⁵Kimani Pawlos o'as pa in eskaler, in gwacho' kimamaloya kampa in masewalme hyero kwalantikakatkaloya; ³⁶kampa in masewalme takwitap kintokatiyaloya in gwacho' tsatsitiyaloya:
—Shihmiktik!

Mopalewi Pawlos ika in masewalme

³⁷Kimani in gwacho' kiwikatiyaloya pa kalitik pa ininkal in gwacho', Pawlos okitahtanil in wetatakewan:

—Kwal pa nitahtos pa nimichilis ten?

In wetatakewan kinankili:

—Tewal tihmat titahto gereko? ³⁸Kwakin, amo titewal in egiptiyo yewal okipewalti se momiktiliste kipi sek tonatim

wan okinwik nawi mil takam ka in tamiktinilme pa se tal kaha amo'ak mochantiyaya?

³⁹Pawlos kinankili:

—Newal nitakat yudiyo, wan onitakat pa Tarso, in se Wepweblo hyero we monots nital Kilikya; shinishmakawalti pa nitahtos ka in masewalme.

⁴⁰Kwakin in wetatakewan okimakawalti pa tahtoskya Pawlos, wan omokets pa in eskaler, okinchiwil se taneshtiliste ka nimahwam pa amo nawatitiyaloskya. Kimani moshte yahmo nawatiloaya, kinwaltakichil ka hebreteko, kitowaya:

22¹—Masewalme nonohniwan taneltokalme wan anmehwante wehwe monotsalme, shinishkakik ten ashka nikitos pa nimopalewis.

²Kwah okikakik Pawlos tahtotikatka ka inintahtol hebreteko, yehwante monawatiloaya, wan Pawlos kitowaya:

³—Ninewal nitakat yudiyo. Onitakat pa Tarso pa in nital Kilikya, ma yok onimo'apa nika pa Yerushalém oniye pa in kal kaha nimotaneshtili wan Gamali'El ye notamashtini, yewal nishtanishtiliyaya pa nihneltokaskya in tahtolme yewal tishmakak towichalme ka in Nitawanatilmoshé. Hanse tonatim nikchiwaya kina kitowaya nitahtolmeDyos yok kina anmehwante ashka ankichiptikat. ⁴Nikintohtokaya pa nikinmiktiskya yehwante kitokaloya ni'ot Yehshwa, wan ninkinkitskiyaya takam wan siwam nitatakewaya pa kintsakwaloskya. ⁵In TotatsWe wan moshte in Abwelolme Wehwetsim kimatiloaya kampa melawak okitak kampa yehwante nishmakak amatTakwihkwilolme pa nikinwikiliskya tonohniwan taneltokalme yudiyo' pa Damaskos, niyaya ninkinkitskiyaya inik taneltokalme pa Yehshwa pa nikinwalikaskya pa Yerushalém pa kintakokoltoskya.

Pawlos kinpowil kina otaneltok pa in Tats Yehshwa

(TaMeTa^o 9:1-19; 26:12-18)

⁶Kwakin kwah niyaya pa in ot, kwah ni'astiyaya pa in Wepweblo Damaskos, katkaya takwalispa, se tawiliste hyero we nishminaya pa in takpakllwikak, ⁷wan oniwetis pa tal, Wan onihkak se tahtol kitowaya: “Sha'ul, Sha'ul, pates

^o 22:6 TaMeTa in kinek kito: Tapewaliste Melawak Tanawatilme/Hechos.



© 1996 David C. Cook

“Sha’ul, Sha’ul, pates tinishtohtokatik?” (22:7)

tinishtohtokatik?”⁸ Wan nikahtanili: “Ak tewal, TATS?” In tahtol kito: “Newal niYehshwa in nasareteko, in yewal tewal tiktohtokatik.”⁹ Inik yehwante katkaloya nonawak kitak in tawiliste, ma yok amo kikakik in tahtol yewal taketsaya nahnewal.¹⁰ Kwakin nikili: “Ten monek nikchiwas, TATS?” Wan in TATS nichili: “Shimokets, shi pa Damaskos, wan ompa michiliske in ten yewal tikpiyas pa tikchiyas.”¹¹ Wan kina amo nitachiyaya ka in tawiliste hyero we, yok nishwikak nonihniwam nishkitskitiyak pa nomahwam wan nishwikak pa Damaskos yehwante katkaloya ka newal.

¹² Wan ompa katkaya se takat itoka HananYah pa Damaskos, se takat yewal hanse tonatim kichiwaya kina kichiwaloya in yudiyo' wan kichiwaya kina kitowaya NitanawatilMoshé, wan moshte in yudiyo' kitasotaloya miyak kampa HananYah katka se takat kwal.¹³ Owal kaha newal in HananYah, o'as wan nichili: “Nonihni Sha’ul, titachiyas oksep.” Wan haniman onitachi wan nikitaya yewal.¹⁴ Kwakin nichili: “In Dyos pa yewal taneltokaloya towichalme mishtahtolti pa tihmatis ten yewal kinek pa tikchiwas, yewal kinek pa tikitas Yehshwa in melawak wan pa tihkakis nitahtol ka ikamak.¹⁵ Kampa tewal titahtos ka yewal pa ni'ishpa moshte masewalme pa mochital, yewal otikit wan otihkak.¹⁶ Wan ashka, pates tiwehkAptik? Shimokets shimokwatek, wan shikpak mokatsawiliste, ka nitanotsaliste ni'itokaliste in Tats Yehshwa.”

**Pawlos kinmili kina Dyos okititan
ka yehwante amo yudiyo'**

¹⁷Kimani nimokwepaya pa Yerushalém, wan nikahtoltitikatka Dyos, pa in tyopWe nitachiyaya kina nita-timiktiyaskya. ¹⁸Wan onikit in Tats Yehshwa, nichiliyaya: “Shimo'isiwilti, shikis nika pa Yerushalém amo shiwehka, kampa yehwante nika amo mishneltokaske ka in taketsaliste pa newal.” ¹⁹Wan newal nikili: “TATS, yehwante iselte ki-matil kampa newal nikintsakwaya wan nikinwitekiyaya pa inintyopYudiyo' yehwante mishneltokal tewal, ²⁰kwah kimik-tik ototok niyEste Estepan, newal nihmatiya kampa melawak onikit, ompa nikatkaya newal wan nikatkaya ka in tahtolme pa kimiktiloskya, wan nikinkwitaptikatka ininshashal-me inik kimiktitikatkaloya.” ²¹Ma yok in TATS nichili: “Shi, kampa newal nimishtitanis wEhka kaha kat in yewal amo yudiyo'.”

Pawlos ka niwetatakewan in gwacho'

²²Wan masewalme kikaktikatkaloya Pawlos; kwah okinmil in tahtolme wan okipewaltik tsatsiliste kitoloya:

—Shikpololtik pa in tal! In takat amo monek pa yolis!

²³Yehwante tsatsitikatkaloya wan kitasaloya inintakemtil wan kitasaloya nipokteTal, ²⁴in wetatakewan tatake pa kikalaktiloskya Pawlos pa ininkal in gwacho', tatake pa ki-tahtaniloskya ka tawitekiliste pa yok kimatiskya pates yok tsatsitikatkaloya ika yewal. ²⁵Kimani ki'ilpitiyaloya ka kadena' pa kiwitekiloskya, Pawlos kili in wetatakewan yewal ompa katka:

—Anmehwante kwal pa kiwitekiske se masewal romano, yewal ta ayamo'ok kihusgarol?

²⁶Kwah okikak in, in wetatakewan kapitan oy wan okinawat wetatakewan gwacho:

—Tihmat tewal ten tikchiptik, kampa in masewal se yewal romano.

²⁷Owal ka Pawlos in nikapitan gwacho, omo'asilti wan kili:

—Shinichil tewal se masewal romano?

Pawlos kito:

—Haha.



© 1996 David C. Cook

Owal ka Pawlos in niwetatakewan gwacho omo'asilti ka Pawlos, wan kili: Shinichil tewal titakat romano? (22:27)

28 In wetatakewan kito:

—Newal nitakat romano wan onitashta miyak tomi pa nimochiwaskya romano.

Wan Pawlos kili:

—Kampa newal onitakat nika pa Roma.

29 Inik katkaloya pa kitahtanililoskya haniman opanotiyak ka yewal; kwah kimatik kampa Pawlos katka se takat yewal otakat pa Roma, in wetatakewan momaptiyaya kampa yewal se takat romano wan yewal oki'ilpiyaya ka kadena'.

Pawlos ininishpa in tanichikolme tatakewalme yudiyo'

30 Kwakin pa mostatik in wetatakewan gwacho' kinek kimatiskya pates kiteshpawililoya inik yudiyo' Pawlos, kwakin okintake inik TotatsimWehwe wan moshte inik tanichikolme tatakewalme yudiyo' pa monichikoloskya. In wetatakewan

gwacho' otatake pa kikistiloskya kadena' wan okiwik Pawlos pa in taketsaliste tanichikoliste kaha motahusgarowaya ni'ish-pa moshte yehwante.

23¹Kwakin Pawlos moka kinmitati in tanichikolme tatakewalme yudiyo', wan kinmili:

—Nonohniwan, newal ka mochi nota'ilnamikiliste kwal nimochantitik ka sewiliste inak Dyos wan pa ashka.

²Wan in totatsWe itok HananYah, kintake yehwante ompa moketstikatkaloya inak Pawlos, pa kiwitekiloskya pa nikamak.

³Kwakin Pawlos kili in totatsWe:

—Tewal niyok Dyos mishwitekis kampa tewal, kina se tepante katsak yewal ye tapakal! Wan tewal tiyowatik tita-husgarotik kina kitowaya nitanawatil nitahtolmeMoshé? Wan titatake pa nishwitekiske ma yok amo tikmawishtilitik kina kito nitanawatil nitahtolmeMoshé?

⁴Yehwante ompa moketstikatkaloya kilik:

—Kina timochika pa tikilis in tahtolme totatsWe yewal Dyos kitahtolti?

⁵Pawlos kito:

—Nonohniwan taneltokalme, amo nihmatiya kampa yewal katka in totatsWe; kampa onka takwihkwiloli: “Amo shikil ten amokwal yewal reynaro pa mopweblo.”

⁶Kwakin Pawlos kimatiya kampa sek katkaloya nitamatiliste inik saduseyo' wan oksek nitamatiliste inik parisheyo', kwakin Pawlos wehwe waltahto pa in tanichikoliste kaha motahosgarowaya:

—Nonohniwan, newal niparisheyo' wan notats se parisheyo. Ashka ni'onka tatusgaril kampa newal nikchishtik in tonat pa kimani walyoliske oksep.

⁷Kwah kito in, okipewak kwalaniliste inik parisheyo' wan inik saduseyo', wan ye tashelol in tanichikol ka in masewalme.

⁸Kampa inik saduseyo' kitoloya kampa amo yoliloya oksep, wan amo katkaloya nitanawatilanhelme, wan yehyekatim kwahkwalm wan amo kwahkwalm; ma yok in parisheyo' kineltokal mochi inik. ⁹Kwakin oye se kwalaniliste we; wan moketsak sek Tamashtinilme NitanawatilMoshé yehwante katkaloya parisheyo', wan kitoloya:

—Amo tikital amoten pa in takat; hanwel aso amo okitakichil se Espiritu wan se nitanawatilanhel.

¹⁰ Wan in kwalaniliste omochi se momiktiliste we, in we-tatakewan gwacho omomapti pa kichiwililoskya tahtahko Pawlos. Kwakin okintake in gwacho' pa temoloskya pa kikistiloskya ompa pa kiwikaloskopya oksep pa nikal gwacho'.

¹¹ Wan pa nokse yowal in TATS omoneshti ka Pawlos, wan kili:

—Amo shimomapti, yok kina tihmashtiyaya notahtolme pa Yerushalém, yok niyok monek pa tihmashti notahtolme pa Roma.

Kichiwak tahtoliste pa kimiktiske Pawlos

¹² Pa mostatik, kichiwak in yudiyo' se tahtoliste pa kimiktiloskya Pawlos, wan mochiwilik se tahtoliste melak pa i'ishpa Dyos mo'ililoya iselte kampa amo takwaloskopya wan amo takoniloskya pa kimani kimiktiloskya in Pawlos. ¹³ Katkaloya amoyok han kina 40 takam yehwante monichikoloya ka in se tahtoliste melawak. ¹⁴ Kwakin oyak ka in TotatsimWehwe wan Abwelolme Wehwetsim wan kinmilik:

—Tehwante timochiwilik se tahtoliste melawak, inak Dyos pa amoten tikwaske pa kimani tihmiktiske Pawlos. ¹⁵ Ma yok ashka anmehwante wan inik oksek inik tanichikolme tatake-walme yudiyo', shiktahtanik in wetatakewan ka chikwase mil gwacho' yewal pa kwalikas mosta pa anmo'ishpa anmehwante, pa kichiwiliske tahtaniliste, yewal tehwanse tikchishtiyaske pa in ot pa tihmiktiske.

¹⁶ Ma yok kimani nikon ninohniSiwat Pawlos otakak kina kinekiloya kimiktiloskya okalak pa nikal inik gwacho', wan



© 1996 David C. Cook

*Kimani nikon ninohniSiwat Pawlos otakak
kina kinekiloya kimiktiloskya okalak pa
nikal gwacho wan okinawat Pawlos (23:16)*

okinawat Pawlos. ¹⁷Wan Pawlos okinots pa walaskya se nikapitan in gwacho' wan kili:

—Shihwik in takatYankwik kaha in wetatakewan gwacho kampa, kipi ten pa kilis.

¹⁸Yok in nikapitan gwacho okiwik ka in wetatakewan wan kili:

—In tatsakwal Pawlos onishnots newal wan onishtahtan pa nimishwalikiliskya in takatYankwik, kampa kipi ten pa michilis.

¹⁹In wetatakewan gwacho okikitski pa nimahwa in takatYankwik, wan okiwik oksela wan kitahtanili:

—Ten tihnek tinichilis?

²⁰In takatYankwik kili:

—In yudiyo' motalik pa se tahtoliste pa mishtahtaniske tewal kampa mosta tihwikas Pawlos pa in tanichikolme takewalme yudiyo', pa kichiwiliske tahtaniliste ika in ten amokwal okichi yewal. ²¹Wan tewal amo shikinneltok, kampa miyak kat amo han 40 takam, yehwante kichishtikat pa ot pa kimiktiske Pawlos. Yehwante mokawak ka se tahtoliste pa i'ishpa Dyos pa amoten kikwaske wan amoten koniske pa kimani tihmiktiske Pawlos. Wan ashka hanwel kichishtikat motanankiliste.

²²Kwakin in wetatakewan gwacho okitetan pa ni'ot in takatYankwik, kili in tahtolme amo'ak shikil amoten in ten otinichil.

Pawlos kiwikal pa Kaysareya

²³Kwakin okinnots omente ininkapitan in gwacho', kinmili shikinpiyak 200 gwacho' pa yaske nikshi wan 70 gwacho pa kabayo wan 200 gwacho' ka tepostim ka momiktiliste, kampa yaske pa Kaysareya pa in yowal kina pa chiknawi ora. ²⁴Niyok tatake pa kinwalikaloskya kabayo' pa motaliskya Pawlos, okiwikak pa ot pa amoten kipanoskya kwal oki'asiltiloskya ka in takat itok Félis in wetatakewan pa in tal Kaysareya. ²⁵In wetatakewan gwacho okitetanil se amat-Takwihkwilol yewal kitowaya:

²⁶“Kela'udyus Lisyas in tasotili niwetatakewan pa in tal Félis, Nimishtahtalo. ²⁷In takat kikitskik in yudiyo' wan kinakiloya kimiktiloskya, yehwante kampa nihmat yewal se

takat romano, wan onihkisti ka nogwacho. ²⁸Nihnekiya nihmatskya ten ika kiteshpawilitikatkaloya yewal, wan onihwik ininishpa nitanichikolme wehwetatakewalme in yudiyo', ²⁹wan onihat kampa kiteshpawilitikatkaloya kampa amoyok kinek kichiwas kina kito nitanawatil nitahtolmeMoshé ka yehwante, ma yok amo katka tateshpawiliste pa ten ika kimiktiloskya wan pa kitsakwaloskya. ³⁰Kwah nishnawatik kampa sek yudiyo' kichiwaloya se tahtoliste pa kimiktiloskya in takat, kwakin haniman onitatake pa mishwalikiloskya tewal. Niyok onikintake inik kiteshpawilitikatkaloya pa michililoskya mo'ishpa tewal in ten ika kiteshpawilitikat yewal.”

³¹Yok in gwacho' konanak Pawlos kina kinmili in wetatakewan, wan okiwikak tayo pa Antípatris. ³²Pa mostatik yehwante gwacho yaloya nikshi walmokwepaloya pa nikal gwacho', pa Yerushalém wan yehwante yalowa pa kabayo' kitokatiyaloya Pawlos. ³³Wan in gwacho' yaloya pa kabayo' asik pa Kaysareya, wan kimakak in amatTakwihkwilol in takat niwetatakewan pa in tal wan niyok okitemakak Pawlos. ³⁴Yok niwetatakewan in tal, Félis, kwah otam okit in amatTakwihkwilol; wan otahtan pa kati tal otakat yewal kimani okimat kampa otakat pa in tal Kilikya, ³⁵kwakin Félis kili:

—Nimishkakis pa kimani walaske inik mishteshpawilitikat.

Kwakin tatake pa kikwitawiloskya Pawlos kaha niweKal Herodes.

Pawlos mopalewi ika in wetatakewan Félis

24 ¹Panok makwil tonatim, wan otem pa Kaysareya HananYah, in totatsWe ka sek Abwelolme Wehwetsim, wan inak yewal takets ipa se pa tapalewis itok Tértulo. Yehwante yaloya pa kiteshpawililoskya Pawlos ka in Félis niwetatakewan pa in tal. ²Wan okinotsak pa walaskya Pawlos, wan Tértulo okipewalti tateshpawiliste kitowaya:

—Tasotili Félis, tikpiyal miyak sewiliste wan kwal kat tachiwalme in yewal ten tikhusgaro pa masewalme ika tewal. ³Wan pa kaha han wan kina han, timishnamikil kwal tasotili Félis, ka miyak tashtawiliste. ⁴Ma yok amo nihnek nimishwehkawaltis, minishtahtani ka ta'ihniliste pa titishkakis ka sek tahtolme. ⁵Tikitak in takat kinkwalantinemi ka inik yudiyo' wan takwamantinemi pa mochi kishki tal, in

se yewal nitsontek nitamatiliste in Yehshwa inintanichikolme in nasareteko'. ⁶In niyok okinek okichi in ten tatatsot pa in tyopWe; kampa yok tihkitskik; ⁷ma yok owal Lisyas nikapitan gwacho', wan ka chikawaliste we otishkistil ⁸tewal mosel tihkakis kwah tiktahtanilis in mochten tehwanthe timichilitikat in ten tikteshpawilitikat.

⁹Wan in yudiyo' yehwanthe ompa katkaloya kitoloya kampa melak katkaya. ¹⁰Kwakin niwetatakewan in tal Félis okichiwiwitaneshtiliste Pawlos pa tahtoskya, wan Pawlos kito:

—Kampa nihmat tewal, tikpi myak shiwim kampa ti-reynarotik pa in tal, ka miyak pakiliste nimichilis ten nikchiptikatkaya kwah nishkitskik. ¹¹Tewal mosel kwal pa titahtanis kampa melawak in ten nikitotik, han kipi ¹²tonatim kampa niyaya niktaholtiyaya ka tankwaketsaliste Dyos pa Yerushalém. ¹²Inik nishteshpawilitikak amo nichitak ta nimokwalantitikatkaya pek ak inak pa in tyopWe, wan niyok pa inik nityopalmeYudiyo', wan niyok pa amo kaha pa in Wepweblo. ¹³Yehwanthe amokwal pa mishneshtiliske ta melawak onka in yewal ten ashka nishteshpawilitikat. ¹⁴Ma yok hanwel annimichilis melak niktaholti niDyos towichalme, niktokati ni'ot Yehshwa yewal inik masewalme kilil se ot ka nitamatiliste Yehshwa, wan nitaneltok pa mochi NitanawatilMoshé ten tamashti wan pa mochi in ten onka takwihkwilolme pa niTaketsalme nitahtolmeDyos. ¹⁵Newal niyok nikchishtik pa in Dyos in ten yehwanthe kichishtikat inik yudiyo' kampa yes yoliliste oksep, ka yehwanthe kwahkwalme wan yehwanthe amo kwahkwalme. ¹⁶Kampa nikchi ten nitamat kwal onka pa i'ishpa Dyos wan pa moshte masewalme.

¹⁷Wan nikpiyaya miyak shiwim amo niwalaya, ashka oniwal pa Yerushalém pa nikipalewis nonohniwan taneltokalme yudiyo' in amoten kipiwal wan temakaliste pa in tyopWe. ¹⁸In nikchiptikatkaya pa in tyopWe, kwah tamiyaya in tachiwaliste ka tapohpowaliste, amo katkaloya masewalme wan amo nikchiptikatkaya kwalaniliste. ¹⁹Wan sek yudiyo' pa in tal AsíYah ompa katkaloya, yehwanthe kipiyaloya pa wala-loskya wan inik yeloskya pa nishteshpawilitiyaloskya ta ten kipiyaloya pa kitoloskya ika newal. ²⁰Ma kitok yehwanthe nika kat ten amokwal onikchi newal kimani oniye ininishpa in tanichikolme tatakewalme yudiyo'. ²¹Ina han kwal pa kitoske

pa kimani oniye ininishpa yehwante ina han onikit ka wehwe: “Ashka nika ni'onka tahusgaril kampa nitaneltok pa yoliske oksep yehwante mikil.”

²²In Félis kimatiya miyak nitamatiliste ni'ot Yehshwa-Kristo, kwakin okika pa okse tonat ka in tahtaniliste ka in tani-chikolme wan kito:

—Kwah walas in wetatakewan Lisyas, kwakin annimichilis kina nikit in tateshpawiliste.

²³Kwakin Félis kili nikapitan gwacho pa kikwitaptiyaskya Pawlos, niyok kili pa kikawiliskya pa kichiwaskya ten kinekiskya, wan pa amoten kitasotiliskya Pawlos wan kinmakawiltiskya pa kiwikililoskya ten kiteshmonektiyaskya.

²⁴Kwah panok sek tonatim, owal Félis, inak nisiwa itoka Derusila, yewal katka yudiya, otatake pa kwalikaloskya Pawlos wan okikak in taketsaliste ka in taneltokaliste pa Kristo Yehshwa. ²⁵Wan kitakichiliyaya Pawlos kina kipiyya pa yoliskya ka chipawaliste pa niyol wan chikawaliste pa isel wan asis in tonat yeske tahusgarilme moshte, kwakin momaptiyaya Félis, kiliyaya:

—Ashka, yewal han, ta amo nikpi ten nikchiwas pa okse tonat nimishnotsas pa tiwalas ka newal.

²⁶Félis niyok kichishtikatka kampa Pawlos kitiniwiliskya tomi; kampa yok hanse tatakewaya pa kwalikaloskya pa take-tsaskya inak yewal. ²⁷Wan yok panok ome shiwim, kwakin Félis yahmo katka niwetatakewan in tal wan in se yewal itokaya Porkiyus Festus yewal katka niwetatakewan in tal. Ma yok Félis kinekiya mokawaskya kwal inak in yudiyo' okika tatsakwal Pawlos.

Pawlos otahtan pa kihusgaroskya Kaysar

25 ¹Kwakin o'as Festus pa konanaskya niwetatakewan pa in tal Kaysareya, kimani panok yey tonatim opanoti pa Kaysareya wan pa Yerushalém. ²Wan inik TotatsimWehwe wan inik wehwetatakewalme yudiyo' yehwante kitoloya teshpawiliste ika Pawlos kitahtaniloya miyak yewal. ³Kitahtaniloya, se ta'ihniliste ika yewal pa kiwikaloskya pa Yerushalém. Wan ompa pa ot kichishtiyaloskya sek yudiyo' pa kimiktiloskya; ⁴ma yok Festus kinankili Pawlos onka tatsakwal pa Kaysareya, wan newal amo niwehkAwawas pa nimokwepas ompa. ⁵Ma yak:

—Sek inik kat wehwetatakewalme yudiyo pa anmehwante, ma temok ka newal pa Kaysareya, ta okichi ten amokwal in masewal, ompa ma kiteshpawilik.

⁶Omoka in Festus ompa pa Yerushalém kina pa chiknawi wan matahti tonatim, kwakin omokwep pa Kaysareya. Wan pa mostatik okinnots nitanichikolme in Abwelolme Wehwetsim wan otatake pa kwalikaloskya Pawlos. ⁷Wan kimani o'as Pawlos, kiyawaloloya moshte in yudiyo', yehwante walaloya inak Festus pa Yerushalém, wan miyak tateshpawiliste wehwe kwalikaloya, ma yok amo kipiialoya kina kineshtiloskya ika in ten kitoloya melawak. ⁸Kwakin Pawlos omopale kinmili:

—Amoten onikchi ten amokwal ika, NitanawatilMoshé ka in yudiyo' wan ika nityopalme, wan ika in wetatakewan in Kaysar.

⁹Festus kinekiya pa mokawaskya kwal inak inik yudiyo', kwakin kitahtanili Pawlos:

—Tihnek tiyas pa Yerushalém, pa tiyes tahusgaril ompa no'ishpa newal?

¹⁰Wan Pawlos kito:

—Nimoketstik ni'ishpa in Kaysar nika kaha motahusgarol, kampa monek pa niyes tahusgaril. In yudiyo' amoten onikinchiwil ten amokwal, kina tewal niyok tihmat. ¹¹Ta onikchi ten amokwal yewal monek pa nimiki, kwakin amoten nikito ma nimik; ma yok ta amo melawak in ten nishteshpawilitikat in yudiyo', kwakin amo'ak kipi pa nishtemakas ka yehwante. Newal nitahtani pa niyes tahusgaril ka in Kaysar.

¹²Kwakin, otam otahto ka inik wehwe inintamatiliste, Festus kili:

—Kampa otitahtan pa tiyes tahosgaril pa in Kaysar. Kwakin tiyas ka in Kaysar.

Pawlos ka in weRey Agripa wan Berenike

¹³Panok sek tonatim, walak pa Kaysareya ininweRey in yudiyo' yewal itokaya Agripa wan Berenike walak kitahpalok in weRey Festus. ¹⁴Wan kina ompa oyek miyak tonatim, Festus okitakechil Agripa kina kiteshpawililoya Pawlos, kiliyaya:

—Se takat onka tatsakwal yewal okika nika Félis kwah reynarotikatka. ¹⁵Kwah oniye pa Yerushalém, owalak ka tateshpawiliste inik TotatsimWehwe wan Abwelolme

Wehwetsim yudiyo', tahtaniloja ika yewal pa yeskya tamik-til. ¹⁶Yehwante nikinnankili kampa totahtolme tehwan-til. ¹⁶Yehwante nikinnankili kampa totahtolme tehwan-til. inik romano' amo tiktemakal ka okse masewal pa yes ta-husgaril, monek pa yes ta'ishpa ka tahtaniliste ka inik yehwante kiteshpawilitikat, yok yewal kipi pa mopalewis ka in ten kiteshpawilitikat ika yewal. ¹⁷Kampa yok, kwah tiwalak pa nitek ika yehwante, wan amo oniwehka pa onik-pewalti in tahtaniliste, onimotal ka inik wehwetatakewalme wan onitatake pa kwalikaloskya in takat. ¹⁸Kimani ompa moketstikatkaloya yehwante kiteshpawilitikatkaloya wan amoten tachiwaliste kiteshpawililoja ika in ten nitamatiya. ¹⁹Hanwel kipiwaloya ika yewal tateshpawiliste kina yehwan-te kineltokaloya ininDyos, wan ika se yewal itok Yehshwa yewal omik wan Pawlos kito kampa melak yoltik. ²⁰Newal amo nihmatiya ten nikchiwaskya ika in tahtaniliste, yok newal niktahtanil Pawlos ta kinekiya yaskya pa Yerushalém wan ompa yeskya tahusgaril ka in mochten pa ininishpa yehwante. ²¹Ma yok Pawlos otahtan pa yeskya tahosgaril ika in weRey Kaysar, kwakin onitatake pa kipiwaloskya tatsakwal nika pa kimani niktitanis pa kiwikiliske in weRey Kaysar.

²²Kwakin Agripa kili Festus:

—Newal niyok nihnekiskya nihkakiskya in takat.

Festus kili:

—Mosta tihkakis tahtos.

²³Yok pa mostatik, kwah walak Agripa wan Berenike ka tatakimiltilil kwal wan kalakiloja pa in kalitik kaha moni-chikoloya in weReye' ika in wehwetatakewalme gwacho wan ininweReye' in Wepweblo. Kwakin Festus tatake pa kwalika-loskya Pawlos, ²⁴kwakin Festus kito:

—WeRey Agripa, wan moshte masewalme nika kat ka te-hwante, nika ankipiyal in takat. In se yewal moshte ka in tanichikolme yudiyo' walak ka newal pa Yerushalém wan nika tsatsitikat kampa yewal amo kipi pa yolis. ²⁵Ma yok newal amo nikit se tachiwaliste amokwal, yewal kipi pa yes tamiktil; ye-wal isel kinek pa yes tahosgaril ka in weRey Kaysar, onitahtan pa kiwikaske pa Roma. ²⁶Ma yok kina amo nikpi melak se tahtol pa nikwihkwilolis ka in tats weRey Kaysar, onihwalik pa nitek ka anmehwante, hanwel ka tewal, weRey Agripa, pa


tiktahtanilis in mochten, wan yok newal nikpiyas ten nihkwih-kwilos. ²⁷Nitamat kampa amo kipi ta'ilnamikiliste ta oniktitan se tatsakwal wan ta ayamo onka tanawatil ten ika onka tateshpawilil.

Pawlos i'ishpa ka in weRey Agripa

26 ¹Kwakin Agripa kili Pawlos:
—Timishmakawaltitikat pa titahtos, pa timopalewis tewal.

Kwakin Pawlos oki'ahkok nimahwa, wan yok okipe tahtolme:

²—WeRey Agripa, ka miyak pakiliste nimo'itatik ka tewal ashka kampa tinishmakawiltitik pa nimopalewis ika mochi ten in yewal nishteshpawilitikat in yudiyo', ³ma yok kampa tewal tikinmat mochi inik tachiwaliste wan inik tahtolme in ten kinneltokal in yudiyo' wan tihmat mochi in taketsaliste yewal kitoloya in yudiyo'. Yok nimishtahtani pa amo tisyawis pa tinishkakis.



© 1996 David C. Cook

Pawlos i'ishpa ka in weRey Agripa (26:2)

**Pawlos kinmili kina yoliyaya kwah
ayamo'ok ki'ishmatiya Kristo**

⁴Moshte in yudiyo' kimatil kina niyoliyaya kwah nikat kaya takat Yanwik kwah nimo'apaptiyaya pa notal wan pa Yerushalém. ⁵Yehwante nishishmatil pa miyak shiwim, wan kwal pa tahtoloskya pa newal ta kinekiloskya, kampa newal niyoliyaya kina se pariseyo, yok kina kichiwal parisheyo' inik kichiwaloya kina taneltokaloya pa Nitanaawatil Moshé. ⁶Wan ashka nish-teshpawilitikat, kampa nikchishtik, in tahtol melawak yewal Dyos kinmak towichalme. ⁷Tomasewalme inik 12 tanichikolme Isra'El kichishtikat pa kitaske mochiwas nitatenewiliste wan kitekipanoske Dyos pa tahka wan pa tayo. Ika in yewal newal nikchishtik, oh weRey, ika yewal inik yudiyo' nishteshpawilitikat. ⁸Kampa antamatil anmehwante kampa Dyos amo kipi chikawaliste pa yoliske oksep inik mihmihki?

Pawlos kinkitskiyaya inik taneltokaloya

⁹Newal melawak nitamatiya pa nikchiwaskya ten han ika ni'itokaliste Yehshwa in nasareno, ¹⁰in niyok onikchi pa Yerushalém, newal onikintsakwa miyak yehwante nita'onanalme nitekipanolme Dyos, ka inintatakewaliste in TotatsimWehwe, wan kimani kinmiktiloya, newal nikinmakaya notahtol pa yeloskya tamiktilme. ¹¹Wan pa mochi inik inintyopalme Yudiyo' pa hanse nikintakokolliyaya inik taneltokalme pa kinkawaloskya in taneltokaliste ka Yehshwa, hyero nikinkwalaniliyaya yehwante wan niyaya pa oksek Wehwepweblo' ta nikinmitaya nikintakokolliyaya.

Pawlos kinpowili oksep kina okineltok Kristo

(TaMeTa^p 9:1-19; 22:6-16)

¹²Yok niyaya pa se tonat pa Damaskos, ka chikawaliste wan ka inintatakewaliste TotatsimWehwe. ¹³Katkaya takwalispa, weRey Agripa, kimani niyaya pa ot, onikit se tawiliste pa in takpakllwikak hyero we taminaya amoyok kina nita-wiliste tonat, nishyawalowaya newal wan niyok yehwante yaloya nonawak. ¹⁴Wan moshte tiwetsik talpa, wan newal

onihkak yewal nichiliyaya ka tahtol hebretoko: “Sha’ul, Sha’ul, pates tikintohtokatik yehwante nishneltokal? Timokokoltitik mosel, timomiktitik inak se yewal kipi miyak chikawaliste in amokwal kina tiktanilis.” ¹⁵Kwakin nikili: “Ak tewal, TATS?” In Tats nishnankili: “Newal niYehshwa, yewal tiktohtokatik. ¹⁶Ashka shimokets ka mokshiwalmé, kampa nimoneshti ka tewal pa tinishtekipanolis wan tihmat kampa melawak otikit in mochten wan yewal ten nimishneshtilis. ¹⁷Nimishkistis ka mopweblo wan ka yehwante amo yudiyo' nimishtitanis ashka. ¹⁸pa tikinishtapolis ininishtololwam, yehwante amo yudiyo' pa kisaske pa in tayowaliste wan pa kalakiske pa in tawiliste, ma kipanoltik nichikawaliste inik kineltokal Satán pa nichikawaliste in Dyos, yok kipiwaske ta'ihniliste ka ininkatsawiliste wan yok kipiwaske takawaliste moshte yehwante kishki ta'onalmé inik taneltokalme pa newal.”

Pawlos kintakichiliyaya in yudiyo' wan in amo yudiyo

¹⁹Yok yewal, weRey Agripa, onitaneltok pa in tachiyaliste kina tatemikiliste yewal onishnots ompa pa in ilwikak, ²⁰yok onikpe ta'ishpa ka in masewalmé pa Damaskos, wan niyok pa Yerushalém wan pa mochi kishki Yudaya, wan niyok yehwante amo yudiyo', pa kikwepaloskya ininta'ilnamikiliste wan kineshtiloskya kampa kikweptikatkaloya ininyolme ka Dyos, ka inintachiwaliste kwahkwalmé. ²¹Ka in nishkitskik inik yudiyo' pa in tyopWe wan kinekiloya nishmiktiloskya. ²²Ma yok nishpalewiyyaya Dyos ompa pa in tonatim wan pa ashka, yok yewal ashka nika ni'onka nitakestik in tamshtiliste-Kwal, ka in takam amo wehwe monotsal wan ka in takam wehwe monotsal. In ten han nikitotik hanwel in niTaketsalmé nitahtolmeDyos wan Moshé kitoloya kampa in panoskya, ²³kampa in Kristo kipiyyaya pa panoskya takokoliste, pa mikiskya wan yewal yeskya in se ta'ishpa pa yoliskya oksep ka in mihmihke, wan kwalikaskya tanawatiliste ka tawiliste pa in yudiyo' wan amo yudiyo'.

Pawlos kichiwaltiyaya pa kineltokas Agripa pa yeskya se nitaneltokaliste Yehshwa

²⁴Kwah Pawlos kitowaya inik tahtolme ka mopaleptikatka, Festus waltahtoWehwe, kito:

—Amo tikpi ta'ilnamikiliste, Pawlos! Kampa timotaneshtili miyak ka in amatTakwihkwilolme yewal onishchiwil pa tik-polos mota'ilnamikiliste.

²⁵Pawlos kinankili:

—Amo nikpolo nota'ilnamikiliste, tasotili Festus; in ten nikitotik melawak wan ka nota'ilnamikiliste melawak nikitotik. ²⁶Kampa in weRey kimat in mochten nikitotik wan yok nitahtotik ni'ishpa ka mochi tamakawaliste. Newal nihmat kampa yewal kimat mochi in, kampa amo opan kaha amo'ak kimatiskya. ²⁷Tewal, weRey Agripa, titaneltok tewal pa niTake-tsalmel nitahtolmeDyos? Newal nihmat kampa tewal titaneltok.

²⁸Wan Agripa kili Pawlos:

—Pa han tipit katka pa nitaneltokaskya pa Kristo.

²⁹Wan Pawlos kito:

—Han ka tipik, han ka miyak niktahantik Dyos han amo pa tewal, hanwel niyok pa moshte inik takaktikat ashka, ma yek kina newal ni'onka, ma yok amo yeske ta'ilpilme kina newal ka in kadena'.

³⁰Wan omokets in weRey Agripa, wan niyok in wetatakewan Festus, wan Berenike wan yehwante ompa yowatikatkaloja ka yehwante, ³¹kwah omowikak kitoloja sek ka oksek:

—In takat amoten okichi pa yeskya tamiktil, wan pa yeskya tatsakwal.

³²Wan Agripa kili Festus:

—Yewal kwal katka pa yeskya tamakawal, ta amo tahtanskya pa yeskya tahusgaril ka in weRey Kaysar.


Pawlos yawiya pa se barko pa Roma

27 ¹Kimani omokawak ka in tahtol pa tiyaloskya pa se barko tehwanke pa Italya, okitemakak Pawlos wan oksek takam katkaloya tatsakwalme ka se wetatakewan itok Yulyo, yewal tatakewaya ka 100 gwacho', yehwante niyok katkaloya pa in we tanichikol ka in Kaysar Awgustus.^a ²Ti-tehkok pa se barko yewal katka kaha asiloya in barko pa Adramityon yewal yayaptiyaya pa AsíYah. Niyok ka tehwanke yawiya Aristarko', yewal katka TesaloNike pa in Wepweblo

^a **27:1** In we tanichikol yewal kipiyya 600 gwacho' katkaloya tatakewalme ka in Kaysar Awgustus.

Makedonya. ³Pa mostatik ti'asik pa Tsidón, wan Yulyo kwal okichiwil Pawlos, wan okimak pa kinpashaloskya ininnihniwan taneltokalme pa Tsidón, pa yok kwal kichiwililoskya. ⁴Pa Tsidón tiwalkisak pa in barko wan tipanoloya pa in wehwe'atim Kipros kampa tishnamikiyaya yehyekat. ⁵Kwah otipanok in Wehwe'atim pa Kilikya wan Panpilya, wan oti'asik pa Mira pa in Wepweblo itok Likya.

⁶Ompa okit in niwetatakewan gwacho se barko Alesandríya, yewal yawiya pa Italya, wan otishtake pa titakisaloskya. ⁷Wan pa miyak tonatim tiyaloya yolikit pa in barko wan ka miyak chikawaliste ti'asik pa Kenidos. Kampa in yehyekat tishnamikiyaya chikawak, kwakin tipanok i'ishpa Salmoná, titayawalok pa in wehwe'atim Keréta; ⁸wan ka miyak tekipanoliste tipanok in wehwe'atim wan oti'asik kaha asiloya barko ta'itok Bwenos Pwertos, amo wehka mokawaya in Wepweblo Lasaya.



Pa miyak tonatim tiyaloya yolikit pa in barko wan ka miyak chikawaliste ti'asik pa Kenidos (27:7)

⁹Kina opanoya miyak tonatim, wan katka tamaptiliste pa panoloskya pa in wehwe'atim kampa omopanolti in tonat mosawaloya. ^rPawlos kinnawatiyaya, ¹⁰kinmiliyaya:

—Masewalme, nikit kampa amokwal tishyas pa to'ok wan miyak motapolo, amoten ika han nitamamal barko hanwel niyok toyoliliste tehwane.

¹¹Ma yok niwetatakewan gwacho' amo okinek okikak Pawlos yok okonan ni'ot, okichi kina kitowaya in tats nibarko

^r27:9 In tonat mosawaloya nikolinchim Lewí in kinek kitos, in se tonat ka temakaliste. Se tonat ka tasotaliste kampa inik yudiyo' kichiwaloya mitotiliste pa in shopanta kampa onka miyak tapakyawaliste.

wan nikapitan barko. ¹²Wan kaha asiloya in barko amokwal pa panoloskya sewalko, kwakin miyak kitoloya pa tikisaloskya wan ta kwal ti'asiloskya pa Poynikes, yewal kaha asiloya barko pa Keréta yewal moka pa tatsintaSur wa niyok takpakNorte, wan ompa tipanoloskya sewalko.

Yehyekaya hyero pa in wehwe'atim

¹³Kimani, walyehyek yolikit pa in tatsintaSur, tamatiloya kampa kipiyaloya in ten kinekiloya ka in yehyekat. Yok kinahkokik in tapihpilolme wehwe yehyetik, wan tikonanak itenko in tal tipichi itok Keréta. ¹⁴Panok sek tonatim kwakin hyero owalyehyek ka tapakyawaliste itokaya Noreste, ¹⁵wan in barko okiwilan yehyekat wan amokwal kina timowikaloskya pa ta'ishpa kampa yehyekat tishnamikiyaya, yok timomakawaltik pa tishwikaskya. ¹⁶Titayawalok pa se tal tipichi ipanta wehwe'atim itok Kla'uda, ompa kaha amo kongana yehyekaya, wan ka miyak chikawaliste tihkistik in barkit ka timokistiloskya toyoliliste. ¹⁷Pa kimani kitakistik in barkit ikpak in webarko, kwakin kilyarok ka kabresto ki'ilpik barko. Timomaptitiyaloya kampa barko tiliniskya pa in shalWe kampa amo wehkat katka yewal itoka Sirte, kintemowik in shashalme wehwe wan momakawaltik pa kinwikaskya yehyekat. ¹⁸Pa mostatik hyero yehyekatikatka yok okintasak nitamamal in barko pa wehwe'atim; ¹⁹wan pa yey tonatim, ka ininmahwam okintasak pa wehwe'atim in ten kitishmonekiya se barko. ²⁰Wan pa myak tonatim amo tikitaloya tonat wan inik sitalme, wan se we tapakyawaliste tishasiyaya, kampa tikpololoya mochi totamatiliste amo tikchiyaloya pa tiyoliloskya.

²¹Tikpiyaloya miyak tonatim ayamo titakwaloya, yok yewal Pawlos omokets ipanta ka moshte wan kito:

—Nonohniwan taneltokalme, ta anmehwante annishkakiloskya kina annimichiliyaya ta amo tikisaloskya pa Keréta wan yok amoten kipanoskya barko wan tehwante. ²²Ma yok ashka shimochikawaltik kampa amo'ak ka anmehwante kipolos niyoliliste, hanwel mopolos in barko. ²³Wan pa tayo omoneshti in NitawatilanelDyos, yewal newal niktekipanoli wan yewal inak ni'onka, ²⁴wan nichili: “Amo shimomapti Pawlos, tikpi kampa timoneshti ka in Kaysar wan Dyos mishpalewis pa tiyolis wan moshte yehwante kishki yal pa in

barko.”²⁵ Yok shimochikawaltik, tatsim! Kampa newal nikpi taneltokaliste pa Dyos wan nihmat kampa yok motachiwas kina nichili in Nitawatilanelhel. ²⁶Yok yeheykat kipi kampa tishashilti pa se tal tipichi ipanta wehwe'atim.

²⁷Kimani tikpiyaloya 14 yowalme wan in yeheykat tishwikatinem, ipa in wehwe'atim itok Adriyatéko, yok pa ipanta yowal inik masewalme tamatiloya kampa ti'astiyaloya pa tal. ²⁸Kitamachiwaloya kishki wehkat katka in at wan katka 36 metro' wehkat,^s wan amo wEhka oksep okitamachiwak katka 27 metro'^t wehkat. ²⁹Momaptitiyaloya pa motewiloskya ika se tet, okinmakawak nawi tapihpilolme wehwe yeheyetik ikwitapBarko, wan kitahtaniLOYA Dyos pa tanesiskya. ³⁰Wan in masewalme yaloya pa in barko kinekiLOYA chololoskya, wan kitemowiloya in barkit pa in wehwe'atim, mokwamantikataloya kichiwaloya kina ta yehwante yaloya kitasaloya in tapihpilolme wehwe yeheyetik ta'ishpa pa in barko. ³¹Kwakin Pawlos kili niwetatakewan gwacho' wan iningwacho:

—Ta inik takam amo mokawal pa in barko, anmehwante amokwal mokistiliste anmoyoliliste.

³²Kwakin inik gwacho' kinkotonik kabresto pa in barkit yewal ilpitikatka wan kimakawak pa wetsiskya pa in wehwe'atim.

³³Pa kimani tahtanistiwalaya, Pawlos kintahtaniyaya moshte pa kikwaloskya ten, kinmiliyaya:

—Ankipiyal 14 tonatim kampa anmehwante ayamo antakwal kampa ankichishtikat ten panos. ³⁴Annimishtahtani kampa anshikwak ten kampa anmishteshmonek pa anyeske takistiliste pa poliwiliste. Kampa amo'ak kipolos ni se tsonte pa nitsontek.

³⁵Kwah kito in, Pawlos okonan se pan okimak tashtawaliste Dyos ininishpa moshte. Kwakin okishel pan wan otakwa. ³⁶Kwakin moshte mochikawaltik wan niyok otakwak. ³⁷Pa in barko titakaloya, 276 masewalme. ³⁸Moshte titakwak kishki tihnekik, kwakin, kitasak trigo pa in wehwe'atim pa amo yetik yeskya barko.

^s27:28 In 36 metro' in kinek kito 20 brasas.

^t27:28 In 27 metro' in kinek kito 15 brasas.

In barko opolak pa in wehwe'atim

³⁹Kimani otnes, in tal amo ki'ishmatiloya wan okitak kaha moketsaloya barko yewal tashaltik takatka wan kitaloya ta kwal ki'asiltiloskya ompa in barko. ⁴⁰Kinkotonak kabresto' yewal ka ilpitikatkaloya tapihpilolme wehwe yehyetik pa wehwe'atim, wan kinkahkashanak ka kinehnmiltiloya barko. Haniman kitakistik shashal tilawak yewal katka ta'ishpa kampa yehyekatikatka kaha takwak yok in barko mo'asiltitiyaya pa itenko in wehwe'atim. ⁴¹Ma yok omoka tilintik in barko pa shal amokwal moliniskya ta'ishpa, wan takwitap shitintiyaya kampa hyero kongana motawitekiyaya at. ⁴²Kwakin in gwacho' kinekiloya kinmiktiloskya in takam tatsakwalme, pa yok amo motasaloskya pa chololoskya. ⁴³Wan niwetatakewan gwacho kinekiya kipalewiskya pa in mikiliste Pawlos, wan amo kinka in gwacho pa kichiwililoskya ten amokwal, han otatake pa motasaloskya inik kimatiloya taneloloya pa asiloskya itenko, ⁴⁴wan yehwante amo kimatiloya taneloloya mopaleptiyaloya ka tabla' wan niyok ka nitahtahko in barko. Yok opan kampa moshte kwal asik pa tal.

Pawlos pa in tal tipichi ipanta wehwe'atim Malta

28 ¹Kwah moshte tikatkaloya takistiliste ka toyoliliste, tihmatik kampa in tal tipichi ipanta wehwe'atim itoka Malta. ²Yok in masewalme yehwante mochantiloya ompa kwal tishchiwilik, kampa otatatik hyero sewa katka wan kiyaptikatcaya, otishnotsak pa timototoniloskya. ³Kwakin Pawlos kipehpenaya kwawit, wan kitastikatka pa teshoshte, kwah owalkis se kowat ka in totonki wan okikwa pa nimahwa. ⁴Kimani okitak inik masewalme salotikatcaya kowat pa nimahwa Pawlos, wan mo'ilik sek ka oksek:

—In takat se yewal tamiktiyan, kampa yok mokistil niyololiste pa in wehwe'atim, ma yok in dyosa tahosgaro amo okika pa yoliskya.

⁵Ma yok Pawlos okitsehtsel nimahwa in kowat tamaka wan owets pa teshoshte wan amoten okipan. ⁶Wan kichishitikatkaloya moshte pa posawaskya wan pa wetsiskya mihke; wehkawak kitatiyak, kampa okitak amoten kipanowaya, yahmo yok tamatiloya wan kitoloya kampa Pawlos katka se dyos.



© 1996 David C. Cook

Pawlos kipehpenaya kwawit, wan kitastikatka pa teshoshte, kwah owalkis se kowat ka in totonki wan okikwa pa nimahwa (28:3)

⁷Amo wehka katka nitalme in takat itoka Publiyus, se wetatakewan ka yehwante mochantiloya pa itenko in tal tipichi ipanta wehwe'atim, yewal otishtenamik kwal pa ni'icha wan ompa otimokawak pa yey tonatim. ⁸In nitats Publiyus katka kokoshke kipiyyaya atonawiste wan mapitsaya yEste. Pawlos oy okipashal, wan kitahtoltiyaya Dyos pa yewal, wan okitalil inmahwam ipa yewal wan okipahti. ⁹Ka in, walak moshte kokoshkim yehwante mochantiloya ompa pa in tal tipichi ipanta wehwe'atim, wan oyek tapahtilme. ¹⁰In masewalme pa in tal tipichi ipanta in wehwe'atim tishtenamikik ka myak tamawishtiliste wan kimani tiwalmokwepaloya otishmakak mochiten tishteshmonekiskya pa ot.

Pawlos asi pa Roma

¹¹Kwah opanok yey meste, wan otipanotiyak pa se barko yewal ompa opanoya sewalko, katka in barko pa Alesandriya, kiwikaya se takopinal ka in ome dyose' ka Kástor wan Pólukes.^u

^u28:11 Kástor wan Pólukes in omente dyose' yok nesiloya in kinek kitos, Dióscuros kina se dyos kinpalewiyyaya kishki nehnemiloya pa barko.

¹²Ti'asik kaha asiloya in barko pa Sirakusa, kampa timokawak yey tonatim, ¹³wan ompa titayawalok pa in wehwe'atim itok Regyon. Pa mostatik walyehyekaya kaha tatsintaSur wan pa in ome tonatim ti'asik pa Putóli. ¹⁴Ompa tikinmitak sek tonohniwan taneltokalme yehwante tishtahtanik pa timokawaloskya inak yehwante pa chikome tonatim, wan amo otiwehkawak otiyak pa Roma. ¹⁵Inik tonohniwan pa Roma kipiyaloya tanawatiliste ika tehwan; yok yaloya tishnamikiloya pa Poro in Apyos wan kaha ta'itokaya in yey Tabernas. Kwah okinmit, Pawlos okimak tashtawaliste Dyos wan kwal tamat. ¹⁶Kwah oti'asik pa Roma, in nikapitan gwacho' otimak inik tatsakwalme ka in wetatakewan kaha tatsakwal, Pawlos kikawak mochantiti oksela, ka se gwacho yewal kikwitawiyaya.

Pawlos kintakichili nitahtolDyos pa Roma

¹⁷Wan panok yey tonatim Pawlos tatake pa kinnotsaloskya in wehwetatakewalme yudiyo' pa Roma, wan pa kimani monichikok, kinmili:

—Nonohniwan, newal amoten onikchi ten amokwal ika in yudiyo wan niyok ika in ten kimatiloya kichiwaloya yewal kintemakak ininwichalme, ma yok niye tatsakwal pa Yerushalém ka in romano'. ¹⁸Kwah inik romano nish-tahtanililoya miyak tachiwaliste, ma yok amoten nishitilik ipa newal pa niyeskya tamiktil, kwakin kinakiloya nish-makawaloskya. ¹⁹Ma yok in yudiyo' mokwalantik wan yok onitahtan pa yok niyeskya tahosgaril ka Kaysar, amoten nikchi pa nopweblo. ²⁰Kampa yok nihnek annimichitaskya wan annimishnots anmehwante, kampa nitaneltok pa in Kristo kina moshte pa Isra'El, kampa ni'onka tatsakwal ta'il-pil ka kadena'.

²¹Kwakin yehwante kilik:

—Tehwante amo kaha tishasi amattakwihkwilol ka in Yudaya ika tewal wan niyok amo'ak ten kito ka inik tonohniwan yudiyo' yehwante o'asik nika amoten tichilil ten amokwal ika tewal.

²²Kampa tehwan tihnikil timishkakiske ten titamat, kampa tihmatil pa kaha han motakets ika in se yankwik tanichikol.

²³Yok kwakin, kitalik se tonat, wan pa in tonat asik myak masewalme kaha Pawlos moseptikatka. Wan pa watsinko

wan pa tyotak Pawlos kintakichiliyaya nireynaroliste Dyos. Kinekiya pa taneltokaloskya ka in Yehshwa, kipewaltiyaya ka NitawawatilMoshé wan pa in amam ka niTaketsalme nitahtolmeDyos. ²⁴Sek masewalme okineltokak Pawlos ten yewal kintachiliyaya, wan in oksek amo okineltokak; ²⁵wan amo katkaloya ka in se tahtol ika yehwante, yok han sesen panotiyak. Kwakin Pawlos kinmili:

—Kwal kitowaya in EspirituSanto ka anmowichalme ika niTaketsal nitahtolDyos YeshaYah, kitowaya:

²⁶Shi wan shikinmil inik masewalme:

Anmehwante antakakiske, wan amo ankimatiske ankikakiske;

wan ankitaske, amo ankimatiske ankitaske;

²⁷kampa inik masewalme kinchikawaltik ininyolme, wan anmotsakwilik inninakaswam, wan ankintsakwak annishtololwam ta amoyok yeskya, kimatiloskya kitaloskya in ten ankitak, wan in ten ankikakik, wan yok kimatiloskya takakiloskya ka ininyolme, wan amo kinekil walmokwepaske ka newal wan amo kinekil kampa newal nikipanti.

²⁸Pawlos kinmili, kampa Dyos okiwaltitan nitahtol pa yehwante kishki amo yudiyo', wan yehwante takakiske.

²⁹Kwakin Pawlos kito, in yudiyo' miyak mokwalantiloaya ika yehwante.

³⁰Pawlos moka mochantiti ome shiwim pa in kal kaha motane pa Roma, wan kwal kinnamikiyaya kishki yaloya kipashaloloya. ³¹Amo'ik tamakas ka nireynaroliste Dyos wan niyok kinmashtiyaya ka tamashtilisteKwal Yehshwa-Kristo, amo'ak kitsakwiliyaya ika yewal ten kichiwaya.